

Va sen sinaale-so lawiing-ato

Yesu nêêl nambe navu biing Vavi Vaambuung naam

1 ¹“O Tiopilas, vakasin sen sa kaavu neep munggin-ato^b ond sa kaavu lak va pin sen Yesu wiing osin tatekin tanasin vu hil-ato, ²“vu munggin-ambe hatu busin sen Anutu hako yi laah baandonii-to. Ond naahen nando voon-ande vu kul vu yite sinaale-so sen bôôy holin sil-ato, ond vu kul lak Vavi Vaambuung-ate niwêêk. ³“Bôôy hako nivaane be yimb, de kandi lak atombe nando voon lohvu busin doo-yuuh, be navu taato yi vu yite sinaale-so in nambe lanjak ni naambe nando metumin, tombe nêêl vakasin sen Anutu nanggin yite hil-ato vu sil. ⁴“De yoo naahen nando having sil-ato ond nêêlin sil nambe, “Ham-ame gavuuu Yelusalem e, ham oo mando ganggin va sen saanêêl vu ham bôôy nambe Aamangg nêêl nambe le bu naam-ato. ⁵“De Jon lipis hil-ato ond lipis sil lak bel, de ngaaho lak in Anutu navu biing Vavi Vaambuung naas mando gaving ham.”

⁶“Tombe sinaale-so lasupin dando lavuh ti le mem lalingin yi nambe, “Omaaho Bop, mak peey e onavu gambiing-ambe yiii Islel oo ganggin yiii naah a?”

⁷“Le nêêl vu sil nambe, “Ham-ame hamate va in nambe ham anjak ta osin busin sen Mangg oo hatung-ato ni le, yik Mangg timu yoo nanggin vaa-jo. ⁸“Lemu Vavi Vaambuung e jakana ham-ambe bu niwêêk vu ham, tombe mem ham e naanêêl sa haalengg vu Yelusalem de vu Yudia pin osin vu Samaalia be na nohvu taaku nanyendangga pin.”

^a 1:1 Luk 1:1-4 ^b Sinaale 1:1 Gangge Luk 1:1-4 ond gale gangge naambe Luk kaavu banye nivasaa-ju la vu Tiopilas, om yik Luk-anju sen kaavu sinaale-sote kaapiyaa-jo having. ^c 1:2 Mak 16:19; Luk 24:49-51 ^d 1:3 Luk 24:36-49; Sin 10:41 ^e 1:4 Luk 24:49; Jon 14:16-17; Sin 2:33 ^f 1:5 Mat 3:11 ^g 1:6 Luk 24:21 ^h 1:7 Mak 13:32
ⁱ 1:8 Mat 28:19; Luk 24:48; Sin 2:32; 3:15; 5:32; Ep 3:16

Yesu lakalaah baandoni
(Maak 16:19-20; Luk 24:50-53)

^{9j}Yesu nêêl vakasin-anjo lung la, tonde layi de valu-nala baandoni, tombe bayiimb ti hako yi be la, tonde me-layi yi yesin laah e. ^{10k}Naahen nalak-ande sil oo mondalaah mend ak in, tombe omaaho yuuh lato daale having sil pavis, ond yuuh lalop lolop anivalôôy, ^{11l}tonde yuuh lanêêl nambe, “Ham Galili, nambe vaati sen ham naale mem nangget baandoni? Yesuu-ju sen Anutu vu vêêl in ham-ande hako be la baandoni, ond yik le nom naambe sen ham ahe la baandoni gêên-anju.”

Laholin Matias lukalaah Yudas ahembaan

^{12m}Sil vu kandu Oliv-ambe lalaah Yelusalem. Kanduu-ju ngaaho daka vu Yelusalem lohvu 1 kilomita mu. ¹³ⁿLala lato Yelusalem-ambe lalakala bayêên alopayo baandoni ti sen sil oo dando hôôk-ato. Hil-anju ond Pita yuuh Jon, de Jems ayuuh Endru, de Pilip ayuuh Tomas, de Batolomai yuuh Matai, de Jems sen Alpias noow-ato yuuh Simon sen naanjiihin hil Yuda in nambe gatiy hil Lom lanaa-to, de Yudas sen Jems noow-ato. ^{14o}Hil-anju pin laving vêêh heey, de Malia sen Yesu tangganaan-ato osin Yesu halindin, ond sil alondpayo lavuh ti de mondalohak dando.

¹⁵De busin ti tombe hil 120 dando lavuh ti, tombe Pita kandi naale hôôk sil amend-ambe nêêl nambe, ^{16p}“Halingg-aso-e, bôôy ond Vavi Vaambuung wiing-ambe Devit nêêl vakasin munggin lak Yudas sen gêên taato mopaatôôv vu hil-ambe lalôôh Yesuu-to, ond vakasin-anjo nôôn ak lung la. ¹⁷Yudas-anju ond hey ti sen hey ahondoos naawiing kul timuu-to, ^{18q}tombe mone sen hako lak yite nipayaa-to lala laanggo ngaanggis ti lak, ond Yudas-anju lupake be ninaavi vapuuh-ande ahe kaasêêh. ¹⁹Tombe hil pin vu Yelusalem langoyin-ambe lanêêl taaku tii-ju hôôk sil lavand nambe Akeldama, dangga nambe ngaanggis ngaamong nihees-ate. ^{20r}Vakasin-anjo neep hôôk kaapiya Saam nambe,

‘Yite bayêên e mando malis,
de omaaho ti me-le mando jak e.’

De Saam ango nêêl nambe,
‘Omaaho ango le biing yite kul.’

²¹Om hil sen hey ahondoos having Omaaho Bop Yesu hey ala de aalom, de sil dando having hey lôôt, ^{22s}vu busin sen Jon lipis hil-ambe tok laam busin sen Anutu hako Yesu laah in yiiy-ato, ond hil-anja ti kandi jak gaving hey

^j 1:9 Jon 6:62 ^k 1:10 Luk 24:4 ^l 1:11 Mat 26:64; Luk 21:27; Taato 1:7

^m 1:12 Luk 24:50-53 ⁿ 1:13 Mat 10:2-4 ^o 1:14 Jon 7:5 ^p 1:16 Saam 41:9

^q 1:18 Mat 27:3-10 ^r 1:20 Saam 69:25; 109:8 ^s 1:22 Jon 15:27

in naanêel Yesu-te vakasin sen kandi lak-ato langaah gaving e.”

²³Pita nêel nambêenju tombe sil lanêel omaaho yuuh haalend, ango Yusep sen danêel nambe Basabas, de haale ango nambe Jastas, ond yuuh Matias. ²⁴“Tonde lalohak nambe, “Omaaho Bop, goo galak hil pin alondpayo ni, om otaato naambe gaholin omaaho yuuh-anjo ango tana ²⁵in nambe gako kul sinaale sen Yudas havuuh neep-ande la valok-atêêto.” ²⁶Lalohak lung la tonde sil kaavu yuuh haalend ak tatuuh-ande sil kalo, tombe Matias-ate tatuuh kalov hato sil amend, om lawiing Matias la having sinaale-so nomaayuuh-ambe laam tii-to.

Vavi Vaambuung lukalaam voon

2 ¹Hôôk busin Pentikos tombe sil pin lavuh ti be dando, ²de pavis atombe daandun ti laam vu baandoni nambe sen vavi jambaa-to be lohvu bayêên alo sen dando hôôk-ato. ³“Tonde layi vati nambe kin dalaan-ato laam-ambe nando lak sil ti ti pin, ⁴“tonde Vavi Vaambuung lukala sil alondpayo lôôt, be lakaas bayêên bu ti ti lavand lohvu Vavi Vaambuung oo wiing-ambe sil lakaas-ato.

⁵De hil Yuda vu taaku pin sen kand navu sapa Anutu be lala dando Yelusalem-ato, ⁶ond lango daandun-anju tombe sil pin lasupin lalaam-ambe daale dango de sinaale-so dakaas sil sen daalêê-jôôto lavand ti ti, om lavindis lôôt. ⁷“Sil pin lavindis-ande kand yu-yuuh lôôt-ambe lanêel nambe, “Ham gango. Hil pin sen dakaas-anjo sil vu Galili me malis? ⁸Nambe vaati om yiyi nango de dakaas yiyi lavangg sen atak-aso lako yiyi-ambe yiyi nakaas-ato? ⁹Yiyi vu taaku Patia, de Midia de Ilam, osin yiyi vu Mesopotemia de vu Yudia, de vu Kapadosia yuuh Pontas de Esia, ¹⁰de vu Plisia, Pampilia, osin Ijip, de vu Libia vahaan sen ngaaho vu Sailinii-to, de yiyi vu Lom sen yalaam nandôô-jo. ¹¹Yiyi Yuda de hil vaalu sen lako Yuda-te gambum-ato, de yiyi vu Klit osin Alebia, yiyi pin hango de danêel va bopaata sen Anutu wiing-ato langaah hôôk yiyi lavangg ti ti.” ¹²Om sil pin lavindis lôôt-ambe kand yu-yuuh, tombe yoo lanêel vu sil nambe, “Vaa-jo dangga nambe vaati?” ¹³Lemu vaalu danêel sil pale nambe, “Ma-o, lanum wain moos ngeeyaata lôôt.”

Pita nêel vakasin

¹⁴De Pita naale having sil nomaayuuh-ambe laam tii-to tombe nêel bopaata vu hil pin nambe, “Ham Yelusalem de ham Yuda pin, sa tatekin vaa-jo vu ham-ambe ham gango le. ¹⁵Hamambe hil-anjo lanum wain ngeeyaata? Malis lôôt. Manyinjo naahen samiinaanôn-anjo, ¹⁶lemu Joel-ate vakasin bôôy-ato nôôn ak nambe,

¹ 2:4 Jon 2:25 ² 2:1 Lev 23:15-21; Diu 16:9-11 ³ 2:3 Mat 3:11 ⁴ 2:4 Sin 4:31; 10:44-46; Sin 19:6; Mak 16:17 ⁵ 2:7 Sin 1:11 ⁶ 2:9 2Ti 1:15

17^a“Anutu nêêl nambe, “Vu busin taamusin e mem sale aambiing-ambe sate Vavi Vaambuung jakana hil pin, be noom-aso nomaavêêh-aso le daanêêl vakasin langaah, de hamate himbop-aso le lanji mavin, tonde hamate maanggêem-aso le lanji taahu taahu. 18 Keen, hôôk busin-anju sale aambiing sate Vavi Vaambuung jakana sate hil moow osin vêêh in daanêêl vakasin langaah. 19 Tonde sale aambiing taahu taahu bopaata vu yendak osin saambiing taahu taahu niwêêk vu voon. Nihees de kin osin ahelu, 20 de taaku mekaalus e mekanu dôôk, tonde kwaav e nihees dôôk vêêl e mem Omaaho Bop-ate busin bopaataa-to naatok naam. 21 “Tombe hil pin sen lavand nahôôk Omaaho Bop haalêê-to ond le dôôvu sil.’ ”

22^b“Ham Islel, ham gango sate vakasin-anjo le, naambe Yesu Nasaale ond ham alak ni nambe Anutu taato yi vu ham lak taahu taahu bopaata osin niwêêk vaha vaha, de kaandu yi be wiing vu ham ambaam-ato. 23^c“Vu bôôy ond Anutu yoo ka vu be samu vakasin lung la le mem vu Yesuu-jo lukala ham namam, tombe sim ham avu yi lukala hil sen melawii-having tanasin-ato namand-ambe layiis ak haah pako be yimb. 24^d“Le sim Anutu vu vêêl yi in nivaane yimbin-ate de wiing-ambe kandi lak laah, de yimbin-ame lohvu nambe naapuvu yi lôôt e, 25^e“in Devit nêêl vakasin lak yi nambe,

‘Saahe Omaaho Bop naale sa mengg osin sa namangg vasa lak busin pin in nambe vati me-le biing-ambe saandupake le. 26 Om nambêênja sa longgpaya nivasa de sa dalaangg naapêêlis vu Anutu, de sa ningg naavi mando mongganggin va nivasa, 27^fin game le gavuuu sa kanungg na mando hil yimbin-ate taaku lôôt e, de game le gambiing-ambe gate Omaaho Vaambuung naavi panyek e. 28 Otaato mopaatôôv sen sa mando metumin-ate lung la vu sa, de gale mando gaving sa om sale naapêêlis lôôt.’

29^g“Halingg-aso, sa naanêêl langaah vu ham naambe yate himbop Devit yimb bôôy-ambe lahaav, de yite bandumb neep hôôk yiyi lavuun-ambe gêên-anjo. 30^h“Devit-anjo yi omaaho sen nanêêl Anutu-te vakasin langaah-ato be yoo lak ni nambe Anutu nêêl vu keen baandoni nambe, ‘Sa navu aambiing-ambe gate hil vu taamusin-ato ti le gako haale lulemak dukanaah gahembaan.’ 31ⁱ“Ond Devit oo lak ni munggin ondeey nêêl vakasin lak omaaho sen Anutu yoo holin yi vulôôt in nambe dôôvu yiyi-ato nambe le kandi jak naah, om nêêl nambe, ‘Anutu me-havuuu yi la nando hil yimbin-ate taaku lôôt osin ninaavi me-panyek e.’ 32^j“Ond Yesuu-ja, Anutu wiing-ambe kandi lak-ambe hey pin aahe yi lung la

^a 2:17-21 Joel 2:28-32 ^a 2:21 Lom 10:13 ^b 2:22 Jon 3:2 ^c 2:23 Sin 4:28; 1Pi 1:20

^d 2:24 Sin 3:15 ^e 2:25-28 Saam 16:8-11 ^f 2:27 Sin 13:35 ^g 2:29 1King 2:10; Sin 13:36

^h 2:30 2 Sml 7:12; Saam 89:3-4; 132:11 ⁱ 2:31 Saam 16:10 ^j 2:32 Sin 1:8

ondeey hey naanêl langaah-anjo. ³³ ^kOm gêên Anutu hako lakalaah baandoni be la nando nama vasa lung la, de wiing Vavi Vaambuung sen Mangganaan nêl vu yii-to lom-ambe Vavi Vaambuung yoo wiing va sen ham nahe osin ham nangôl-to. ³⁴ ^lDevit-ame la baandoni le, lemu Devit nêl nambe,

‘Omaaho Bop nêl vu sate Omaaho Bop nambe, “Omando sa namangg vasa, ³⁵ de sale aambiing-ambe hil sen dayi hong payaa-to le langgulis hong vaalu kambi.” ’

³⁶ ^m“Om ham Islel pin ond yanjak ni vanuh naambe Yesuu-jo sen ham ayiis ak haah pakôl-to, ond Anutu wiing-ambe tu Omaaho Bop osin omaaho sen Anutu yoo holin yi vulôl in nambe dôlvu yiyi-ato.”

Hil ngeeyaata lahilin londpayo de lalipis bel

³⁷ ⁿHil lango vakasin-anjo be la hanggwang sil alondpayo, tombe lanêl vu Pita having sinaale-so nambe, “Halingg-aso, hey aambiing vaati peey?” ³⁸ ^oLe Pita nêl vu sil nambe, “Ham anggilin ham alompayo de ham pin anjipis bel jak Yesu Kalisi haale in kawiiy hamate nipaya na, le mem Anutu le biing Vavi Vaambuung naas vu ham. ³⁹ ^pYik Anutu yoo nêl nambe bu vu ham o noom-aso osin omaahonôn pin vu taaku diin. Keen, yate Omaaho Bop Anutu nêl lung la nambe le bu vu hil pin sen teey sil-ato.”

⁴⁰ ^qDe Pita nêl tanasin ngeeyaata lôl vu sil, osin vu kôlvu sil nambe, “Ham ganggin ham in hil anipayaa-ja.” ⁴¹ ^rTombe hil sen lawii-having Pita-te vakasin-ambe lalipis bel-ato ond sil ngeeyaata lôl lohvu 3 taosen lalukalaam having Omaaho Bop-ate hil hôl busin tii-ju.

Kalisi-te hil

⁴² ^sHil-anju yoo dangoyin sinaale-sote tanasin, de sil alondpayo lavuh ti be daya vanôn hôl ti osin dalohak navuh ti. ⁴³ ^tTombe yik hil pin layêenin lôl in sinaale-so lawiing taahu taahu ngeeyaata lak Anutu-te niwêk. ⁴⁴ ^uTonde hil pin sen lawii-having Yesuu-to dando lavuh ti, de va sen silate vaa-to ond sil pin-ate va. ⁴⁵ ^vTonde lavu silate ngaanggis ayuuh kupak-ambe hil laanggo de lako mone be lala latiiy vu hil sen dativak in va yuuh amêl-to. ⁴⁶ ^wDe sil lavuh ti be dala Anutu-te dumb bop alo lak busin pin, tonde daya vanôn hôl sil ambaand ond daya osin ahend anivasa be dapêlis, ⁴⁷ ^xde sil lavand nahôl Anutu tombe hil pin dayi sil

^k 2:33 Mak 16:19; Sin 1:4; 7:55-56; 1Pi 3:22 ^l 2:34-35 Saam 110:1 ^m 2:36 Sin 5:30-31
ⁿ 2:37 Luk 3:10,12; Sin 16:30 ^o 2:38 Luk 24:47; Sin 3:19 ^p 2:39 Ais 57:19
^q 2:40 Diu 32:5; Pil 2:15 ^r 2:41 Sin 2:47; 4:4; 5:14 ^s 2:42 Sin 20:7 ^t 2:43 Sin 5:11-12;
6:8 ^u 2:44-45 Sin 4:32-35 ^v 2:46 Luk 24:53 ^w 2:47 Sin 2:41; 6:7; 11:21,24

anivasa, de Omaaho Bop oo nahilin hil vaalu londpayo nalak busin pin-ambe dalukalaam having sil.

Omaaho vaha paaya ti nivasa lak

3 ¹*Busin ti Pita yuuh Jon lala Anutu-te dumb bop hôôk soosin lohvu taaku me yaal in nambe lanohak, nohvu sen hil pin oo dalohak-ato. ²Tombe omaaho ti tangganaan hako yi vaha nipaya be nando, ond lohvu busin pin daaku be lala datung nando ngaaho vu dumb avi sen danêêl haale nambe Mengalii-to, in nambe kataangg va vu hil sen dalukala dumb alôô-to. ³Ond omaahôô-ju yi de Pita yuuh Jon lalup in nambe landukana dumb alo, tombe kataangg yuuh in nambe yuuh lambu vati vu yi. ⁴*Le Pita yuuh Jon amend la vu yi, tombe Pita nêêl vu nambe, “Gangge haay e.” ⁵Tombe omaahôô-ju ka vu nambe yuuh davu lambu vati vu yi om nayi yuuh, ⁶le ma de Pita nêêl vu nambe, “Sak mone ma, lemu va sen nando vu saa-to ond sa navu aambu vu hog. Lak Yesu Kalisi Nasaale haale sa naanêêl vu hong naambe okandi jak-ambe gana.” ⁷Tombe Pita laandiiy hôôk nama vasa be kandi naale, tombe sim omaahôô-juuto vaha tambaat osin vaha dambi niwêêk ak pavis, ⁸tonde mem pasong-ambe la naale be la, tombe lukala dumb alo having yuuh-ambe kalov baando baando osin hako Anutu haale lak-ambe la. ⁹Hil pin layi nambe nako Anutu haale lak-ambe nala, ¹⁰tombe lalak ni nambe omaaho sen nando mokataangg va hôôk dumb avi sen danêêl nambe Mengalii-to, ond yik yii-ju, om layi de nivasa hôôk atombe lavindis-ambe kanund la lôôt.

Pita nêêl tanasin hôôk Anutu-te dumb bop alo

¹¹Omaahôô-ju puvu Pita yuuh Jon tatin, tombe hil pin latup-ambe lasupin lala vu yaal vu dumb alo ti sen danêêl haale nambe Solomon-atêêto, tombe sil lavindis in lôôt. ¹²Pita yi hil-anju tombe nêêl vu sil nambe, “Ham Islel, ham avindis in? De ham amem laam vu haay lôôt in? Hamambe haay oote niwêêk osin nivasa wiing-ambe laa-jo? ¹³*Anutu sen tu Abalaam ayuuh Isak-ande Yaakop osin yate himbop-aso bôôy pin silate Anutuu-to, ond hako yite kul vaha Yesu haale lak. Yesuu-ja sen ham avu lukala Pilata nama be wiingin nambe kavaayin vu ham, le ma de ham haluuh damim vu yi hôôk Pilata me, ¹⁴lemu ham haluuh damim vu omaaho vaambuung osin nivalok, de ham kataangg Pilata nambe kavaayin omaaho sen nayiis hil-ato vu ham. ¹⁵*De sim omaaho metumin danggakook ond ham ayiis-ambe yimb, lemu Anutu wiing-ambe

* **3:1** Sin 10:3,9,30 ^y **3:2** Jon 9:1; Sin 14:8 ^z **3:4** Sin 14:9 ^a **3:6** Sin 3:16; 4:10; 16:18

^b **3:8** Sin 14:10; Jon 5:14 ^c **3:13** Eks 3:6,15; Mat 22:32; Sin 2:23; 7:32; Luk 23:13-25

^d **3:14** Mak 15:6-15 ^e **3:15** Sin 1:8; 2:32; 4:10; 5:30

kandi lak laah vu hil yimbin-ate, tombe haay aahe ondeey haay naanêel tatekin-anjo. ¹⁶De omaaho sen ham ahe osin ham alak nii-to, ond yik wii-having Yesu haale, ondeey haalêê-ju wiing-ambe vaha nivasa lak. Yik Yesu yoo kaandu yi be wii-having, ondeey wiing-ambe naale nala nivasa hôok ham amem-anjo.

^{17f}“Halingg-aso, sa lak ni nambe ham doosin ondeey ham ayiis Yesu be yimb, de hamate yêêv bop-aso doosin having nambêênja. ^{18g}Lemu Anutu wiing-ambe hil sen danêel yite vakasin langaah bôôy-ato ond sil pin lanêel nambe yite omaaho sen yoo holin yi vulôôt in nambe dôôvu yiyi-ato ond le gako nivaane. Om gêên Anutu wiing-ambe silate vakasin-anju nôôn ak, lak va sen ham awiing vu Yesuu-to. ^{19h}Om nambêênja ham anggilin ham alompayo naah vu Anutu in nambe kawiiy hamate nipaya na valok-ate, ²⁰de Omaaho Bop-ate samu samu naam naakuuh vu ham, de biing Kalisi sen yoo holin yi vu ham lung la bôôy-ato be naas vu ham, ond yik Yesuu-ju. ²¹Lemu yoo le mando baandoni vêel e in ganggin busin sen Anutu wiing-ambe yite hil vaambuung-aso lanêel langaah bôôy-ato nambe Anutu le samu va pin naatu nivasa naah. ²²ⁱDe Mose nêel nambe, ‘Omaaho Bop Anutu yoo le golin ham o halim-aso ti naatu hamate omaaho ti in naanêel Anutu-te vakasin langaah naambe sen holin saato, de vakasin pin sen naanêel vu ham-ato ond ham gambe nanyem in. ²³Tombe hil pin sen me-gambe nanyend in omaahôô-ju yite vakasin-ato, ond Anutu le kawiiy sil, de sil-ame le mando gaving Islel naah e.’ ²⁴De hil pin sen danêel Anutu-te vakasin langaah bôôy-ato, ond Samuel having hil vaalu vu taamusin-ato, ond sil pin lanêel vakasin lak busin gêên-anjo. ^{25j}Vakasin sen Anutu nêel lung la lak yate himbop-aso bôôy, de lak hil sen danêel Anutu-te vakasin langaah-ato ond silate hil vu taamusin ham-ato, ond vakasin-anja nêel vu Abalaam nambe, ‘Saambiing gate hil vu taamusin ti yite samu samu na dôôvu omaahonôôn nohvu taaku pin.’ ^{26k}Om Anutu holin yite kul vaha be wiing laam nyendoos vu ham in nambe samu ham-ande biing-ambe ham anggilin ham alompayo ti ti be ham gavuuu hamate nipaya vaha vaha na.”

Pita yuuh Jon daale kaansol-aso mend

4 ^{1l}Ngaaho lak in taaku naambus na tombe Pita yuuh Jon daahen mondanêel vakasin vu hil, tonde kul vaha sen datung salivangin-ato laving yêêv sen nanggin Anutu-te dumb bop-ato osin hil Sadusi lala lalup vu yuuh. ^{2m}Hil-anju ahend kalin vu yuuh in nambe yuuh davu

^f 3:17 Luk 23:34; 1Ti 1:13 ^g 3:18 Luk 24:27,44,46 ^h 3:19 Sin 2:38

ⁱ 3:22 Diu 18:15,18-19; Sin 7:37 ^j 3:25 Jen 22:18; Gal 3:8 ^k 3:26 Sin 13:46

^l 4:1 Luk 22:4,52 ^m 4:2 Sin 23:8

taahu hil osin yuuh danêêl vakasin sen Yesu kandi lak laah om hil yimbin pin e kandi jak naah-ato, ³tombe lalôôh yuuh-ambe lala laayiy vinavi in yuuh in nambe yuuh mando be samiinaanôôn e mem. ⁴Lemu hil sen lango Pita-te vakasin-ambe lawii-having-ato, ond hil-anju moow ngeeyaata lôôt lohvu 5 taosen.

⁵Samiinaanôôn atombe silate yêêv bop-aso laving himbop-aso de tanasin dangga-so be lasupin vu Yelusalem, ⁶ond sil lasupin having kul vaha sen datung salivangin-ato silate yêêv bop Anas, de Kaiapas ayuuh Jon, de Aleksanda, tonde yêêv bop Anas-ate hil pin. ⁷Tombe lalaah sinaale yuuh-anjuuto daale sil amend, le mem lalingin yuuh nambe, “Muuh nawiing vaa-jo lak lati-te niwêêk osin haale?” ⁸Tombe Vavi Vaambuung hôôvu Pita, om nêêl vu sil nambe, “Ham sen ham atu hil-ate yêêv bop-ato osin himbop-aso pin, ⁹gêên-anjo haay samu vakasin vu ham in samu samu sen haay aawiing vaha paaya ti nivasa hôôk-ato, de haay tatekin danggakook vu ham. ¹⁰Om nambêênja ham pin-ande Islel pin, ond ham oo anjak ni naambe omaahôô-jo nivasa lak-ambe gêên naale hôôk ham amem lak Yesu Kalisi Nasaale haale, sen ham ayiis ak haah pako, lemu Anutu wiing-ambe kandi lak laah vu hil yimbin-atêêto. ¹¹Ond Yesuu-ju ‘tatuuh sen ham hil kul-aso yoo nimbaya lôôt nambe ham-ame andaav bayêên ak-ato, lemu gêên tu bayêên ahelasu-te kook aniwêêk.’ ¹²Omaaho ti me-lukalaah nambe dôôvu yiyi e, de vu taaku pin ond Anutu me-taato omaaho ti haale vu yiyi nambêênja in nambe dôôvu yiyi e, yik Yesu timu.”

¹³Tombe kaansol-aso lavindis lôôt in Pita yuuh Jon danêêl tanasin osin niwêêk de yuuh-ame dayêênin e, tombe lalak ni nambe yuuh-ame vu hil tanasin-ate le, yuuh vu hil malis-ate, lemu lalak ni having nambe

bôôy yuuh dando having Yesu. ¹⁴Tombe layi de omaaho vaha paayaa-to nivasa lak lung la be naale having yuuh, om silanêênd vakasin sen daanêêl naah vu yuuh-ato ma. ¹⁵Yik lanêêl vu yuuh amu nambe yuuh gavuuu kaansol-aso de lana voon, om yuuh lala de sil oo mondakaas in nambe, ¹⁶“Yale aambiing naambe vaati vu omaaho yuuh-anju? In hil Yelusalem pin layi nambe yuuh lawiing taahu taahu bopaata osin niwêêk tii-ju, om yame aalohvu nambe yanjak alungg in e. ¹⁷Lemu vakasin-anjo le na nohvu hil pin, om yaambu kôôvu yuuh naambe yuuh-ame daanêêl vakasin vu omaaho ti jak Yesu haale jesin

naah e.” ¹⁸Tombe lateey yuuh lalom-ambe lavu kôôvu yuuh nambe yuuh-ame daanêêl Yesu haale osin yuuh-ame taahu hil jak Yesu haale jesin naah e. ¹⁹Le Pita yuuh Jon lanêêl laah vu sil nambe,

ⁿ 4:3 Sin 5:18 ^o 4:4 Sin 2:41; 5:14 ^p 4:7 Mat 21:23 ^q 4:8 Mat 10:19-20; Sin 7:55

^r 4:10 Sin 3:6,13-16 ^s 4:11 Saam 118:22; Mat 21:42; 1Pi 2:4,7 ^t 4:12 Mat 1:21;

Sin 5:34-35 ^u 4:16 Jon 11:47 ^v 4:17-19 Sin 5:28-29,40

“Ham akam oo bu vêêl e, naambe haay gangoyin ham lavam ond haay nanyengg doos vu Anutu, tombe naambêênjo Anutu me-le ji nivasa le. ²⁰ Va sen haay aahe osin haay hango ond me-lohvu nambe haay anjak alungg in e, haay oo aawiiingin nambe naanêêl vakasin-anjo lôôt.” ²¹ Tombe kaansol-aso salo mopaatôôv in nambe lambu nivaane vu yuuh, lemu layi de hil pin lako Anutu haale lak in va sen yuuh lawiing-ato, om lavu kôôvu yuuh yesin laah, de lanêêl-ambe yuuh lala. ²² De omaaho sen yuuh lawiing-ambe nivasa lak-ato ond yite ta doo-yuuh lung la.

Kalisi-te hil lalohak in nambe daanêêl Anutu-te vakasin niwêêk

²³ Pita yuuh Jon lalaah lato vu yuuhate hil, tombe yuuh lanêêl vakasin pin sen kul vaha sen datung salivangin-ato silate yêêv-aso osin himbop-aso lanêêl vu yuuh-ato vu sil. ²⁴ “Tombe sil lango lung la, tonde sil pin alondpayo lavuh ti be lalohak vu Anutu nambe, “O Omaaho Bop, hong sen ohatung yendak osin ngaanggis, de lôôy osin va pin sen nando lohvu taaku pin-ato, ²⁵ *de gate Vavi Vaambuung wiing vakasin ti la vu heyate himbop bôôy Devit sen tu gate kul vahaa-to, ond Vavi Vaambuung nêêl nambe,

‘Nambe vaati om hil vaalu sen sil-ame Yudaa-to ond ahend kalin-ambe davu daandun bopaata, de yate hil Islêl ond kand navu vakasin malis amu? ²⁶ De hil lulemak-aso vu taaku pin osin yêêv bop-aso pin lasupin lalaam in nambe lanyiiis ngaamong ak Omaaho Bop gaving yite omaaho sen yoo holin yi vulôôt in nambe dôôvu yiyi-ato.’

²⁷ y“Keen lôôt, Helot ayuuh Pontias Pilata laving hil vaalu osin hil Islêl ond hil-anjo lasupin lalaam taakuu-jo in nambe lanyiiis ngaamong vu gate kul vaha omaaho vaambuung Yesu sen goo gaholin yii-to, ²⁸ zond sil lasupin in nambe lanyiiis Yesu nohvu goo gakam vu niwêêk-ambe osamu lung la nambe nôôn jak-ato.

²⁹ a“O Omaaho Bop, gêên-anjo gakam bu vakasin sen lavu kôôvu hey-ato, be gandôôvu gate hil hey in hey naanêêl gate vakasin niwêêk lôôt, de hey-ame aanjêênin e. ³⁰ Otalo namam in biing-ambe hil anilakin nind vasa jak, de gandôôvu hey in hey aambiing taahu taahu osin niwêêk jak gate kul vaha omaaho vaambuung Yesu haale.”

³¹ bLalohak lung la tonde bayêên sen lasupin-ambe dando hôôk-ato yêêy, tombe Vavi Vaambuung hôôvu sil pin, om sil lanêêl Anutu-te tanasin niwêêk lôôt de me-layêênin e.

^w 4:24 Eks 20:11; Nie 9:6; Saam 146:6 ^x 4:25-26 Saam 2:1-2 ^y 4:27 Mat 27:1-2;
Luk 23:7-11; Sin 3:13 ^z 4:28 Sin 2:23 ^a 4:29 Ep 6:19 ^b 4:31 Sin 2:4

Kalisi-te hil pin alondpayo lavuh ti

³² ^cHil ngeeyaata sen lawii-having osin ahend having sil-ato ond londpayo lavuh ti pin, de va sen sil ti ti yooto vaa-to ond ti me-nêêlin yite vati nambe yoo yite va nivalok e, malis, va sen silate vaa-to ond yik sil pin-ate va. ³³ ^dAnutu vu niwêêk bopaata vu sinaale-so be sil tatekin va sen Omaaho Bop Yesu kandi lak laah-ato langaah lôôt, tombe hil pin layi nambe Anutu-te samu samu bopaata nando having sil. ³⁴ ^eTombe silate omaaho ti me-nativak in vati le, in dangga nambe lavu ngaanggis osin bayêên-ambe hil laanggo, de lako mone be ³⁵ lala lavu vu sinaale-so, tombe latiiy monêê-jo vu omaahonôôn vaalu sen silanêênd va yuuh ame ma de dativak-ato.

³⁶ ^fDe Liwi-te hil vu taamusin-ato ti baan Saipias, haale nambe Yusep, de sinaale-so lanêêl haale ango nambe Banabas, haalêê-jo dangga nambe omaaho sen navu niwêêk, ³⁷ ond vu yite kul ti vu omaaho ti vaanggo de hako mone pin-ambe la vu vu sinaale-so.

Ananaias ayuuh Saapila-te vakasin

5 ¹De omaaho ti haale nambe Ananaias, de vane haale nambe Saapila, ond yuuh lavu yuuhate ngaanggis boow ti be hil laanggo, ² ^gtombe sim Ananaias vun mone sen yuuh lako lak ngaanggis-ato vaalu be vane yi, de hako vaalu be la vu vu sinaale-so. ³ ^hTombe Pita nêêl vu nambe, “Ananaias, nambe vaati sen Saalang lukala galompayo be gavun mone vaalu? Gawiingin nambe tatuhin Vavi Vaambuung a? ⁴Om naambe bôôy-ato gate ngaanggis oo nanjip, le ma de gavu be hil laanggo lung la, om naambe gate mone yoo mando. Le sim nambe vaati sen gakam oo vu vakasin nambêênja hôôk galompayo? Gambe otatuhin omaahonôôn a? Malis, manyinja otatuhin Anutu.” ⁵ ⁱAnanaias hangoyin vakasin-anju tombe lupake be yimb meta, tombe sim hil pin sen lango banyêê-to layêênin lôôt, ⁶ tombe maanggêem-aso kandi be layum hôôk tôômb, de laaku be lala lahaav.

⁷De taaku mekaalus yaal lung la le mem Ananaias vane valup, le doosin va sen tovu layaa-jôôto, ⁸ tombe yik Pita lingin nambe, “Onaanêêl vu sa le, naambe mone sen muuh hako lak ngaanggis-ato ond yik lung laa-jo?” Tombe Saapila liinggis nambe, “Êê-e, yik lung laa-ja.” ⁹ ^jOm Pita nêêl vu nambe, “Nambe vaati sen malompayo lavuh tii-jo? Mawiingin nambe sahi Omaaho Bop-ate Vavi Vaambuung a? Om gangge le, hil sen lahaav layam-ato ond lalu-daale vinavii-ja in davu baaku hong-ambe lana.” ¹⁰Om pavis atombe vêêh-anjôôto lupake be la yimb meta neep

^c 4:32 Sin 2:44 ^d 4:33 Sin 2:47 ^e 4:34 Sin 2:45 ^f 4:36 Sin 11:22-26; 13:2-3

^g 5:2 Sin 4:34-35 ^h 5:3 Jon 13:2 ⁱ 5:5 Sin 2:43 ^j 5:9 1Ko 10:9

hôôk Pita vaha, tombe hil sen lahaav layaa-to layi nambe yimb, om lalukala laaku be lala lahaav having laya. ¹¹De hil bel-ate pin osin hil vaalu sen lango vakasin-anjo banyêê-to ond layêênin lôôt.

Sinaale-so dawiiing taahu taahu ngeeyaata osin niwêêk bopaata

¹²^kSinaale-so yoo mondawiiing taahu taahu ngeeyaata osin niwêêk hôôk hil lavuun, de hil pin sen lawii-having-ato ond londpayo lavuh ti be dasupin dala Anutu-te dumb bop alo ti sen danêêl haale nambe Solomon-atêêto. ¹³Tombe hil vaalu dayêênin-ande me-dasupin having sil e, lemu hil dako sil haalend ak, ¹⁴^ltombe moow ayuuh vêêh ngeeyaata lôôt dawii-having Omaaho Bop-ambe dalukala having yite hil. ¹⁵Om hil daaku hil anilakin-ambe lala dambe sil deep ak kaanye yuuh ame hôôk mopaatôôv nanyendangga, in nambe Pita balu-na de taaku naambiiy jak yi be kanu mu jêês sil e mem nind vasa jak. ¹⁶^mDe hil ngeeyaata vu taaku bo-bop sen neep ngaaho vu Yelusalem-ato, ond lako hil anilakin osin hil sen mamu nipaya nahôôvu sil-ato be lasupin lalaam timu vu sinaale-so be dawiiing-ambe sil anind vasa nahôôk pin.

Angela vu vêêl sinaale-so in bayêên kalaambus

¹⁷ⁿTombe sim kul vaha sen datung salivangin-ato silate yêêv bop osin hil pin sen dando having yii-to ond sil vu hil tanasin vaha ti sen danêêl sil nambe Sadusii-to, ond ahend anipaya vu sinaale-so lôôt, ¹⁸om lalôôh sil-ambe latung sil lalukala kalaambus-ate bayêên bop. ¹⁹^oLemu busin atombe Omaaho Bop-ate angela ti hato hataahin vinavi de giyy sil-ambe lala voon, de nêêl nambe, ²⁰“Ham ana baale Anutu-te dumb bop alo be ham naanêêl tanasin sen ham mando metumin-atêêto langaah pin vu hil.”

²¹Sinaale-so lango vakasin-anju tombe samiinaanôôn lalukala dumb alo pavis-ambe lanêêl tanasin vu hil. Tombe yêêv bop salivangin-ate having yite hil, ond lateey Islel-ate kaansol-aso osin himbop-aso be lasupin lavuh ti pin, le mem lanêêl-ambe hil lala in nambe gako sinaale-so vu bayêên kalaambus naam. ²²Om ahevaavu-so lala bayêên kalaambus-ambe layi sinaale-so, le ma de taaku malis. Tombe lalaah-ambe lanêêl nambe, ²³“Hey ala hato bayêên kalaambus e laayiiy vinavi be niwêêk lôôt, de ahevaavu-so yoo daale danggin vinavi ti ti, tombe hey hataahin vinavi le omaaho ti me-nando hôôk bayêên alo le.” ²⁴Tombe yêêv sen nanggin Anutu-te dumb bop-ato having yêêv salivangin-ate lango vakasin-anju be kand yu-yuuh lôôt nambe vaa-jo le naambe vaati. ²⁵Le omaaho ti valup-ambe nêêl vu sil nambe, “Ham ange, hil sen ham hatung sil hôôk kalaambus-ato ond lala

^k 5:12 Sin 2:43; 14:3 ^l 5:14 Sin 2:41; 21:20 ^m 5:16 Mak 6:56; Sin 19:11-12

ⁿ 5:17-18 Sin 4:1-3,6 ^o 5:19 Sin 12:7-10

daale danêel tanasin vu hil hôok dumb alo ni.” ²⁶Tombe yêêv sen nanggin Anutu-te dumb bop-ato osin ahevaavu-so lala lako sinaale-so, lemu me-layiis sil e, malis, in yêêv-aso layêênin hil nambe le lanyiis sil lak tatuuh.

Sinaale-so me-layêênin kaansol-aso le, lanêel vakasin langaah

²⁷Lako sinaale-so lalaam-ambe lalaah sil daale kaansol-aso mend, de yêêv bop salivangin-ate nêel vu sil nambe, ²⁸“Hey aavu kôôvu ham bôôy nambe ham-ame taahu hil jak omaahôô-ju haale le, le ma de hamate tanasin lohvu taaku Yelusalem pin, de ham awiingin tatuhin vakasin jak hey naambe hey oo aayiis omaahôô-ju.” ²⁹Lemu Pita having sinaale-so lanêel laah vu sil nambe, “Yik hey oo gango Anutu lava mu kaluuh omaahonôôn lavand. ³⁰Yesu sen ham ayiis ak haah-ambe yimb-ato, ond yate himbop-aso bôôy silate Anutu wiing-ambe kandi lak. ³¹Tombe Anutu hako yi lak-ambe la nando nama vasa, be tu yate yêêv bop in nambe dôôvu yiyi osin biing-ambe yiyi Islel yaanggilin yalonggpaya na vu yi be mem kawiiy yate va nipaya na. ³²“Vakasin-anjo hey aahe osin hey hango, de Vavi Vaambuung sen Anutu navu vu hil sen nanyend vuun-ato hôôvu hey having, ondeey hey oo monaanêel tatekin.”

Gamaaliel vu kôôvu kaansol-aso

³³“Kaansol-aso lango vakasin sen Pita nêel-anjo tombe kund sil alondpayo in nambe lanyiis sinaale-so be lanjimb pavis. ³⁴“Lemu kaansol-asôônjôôto ti haale nambe Gamaaliel, yi Palisai ti ond tu kaputung tanasin dangga ti sen omaahonôôn pin dako yii-ju haale lak, ond kandi naale de nêel-ambe hil lako sinaale-so be lato lala voon vêel e ³⁵mem nêel vu kaansol-aso nambe, “Ham Islel, ham awiingin nambe ambiing vati vu hil-anja, ond halingg-aso, ham akam bu nivasa le mem. ³⁶“In bôôy ond Tiudas hatee yi lak in nambe naatu omaaho osin haale bop, tombe moow ngeeyaata lohvu 400 lawii-having yi, lemu gaaman layiis-ambe yimb, de hil pin sen lawii-having yii-to lavuuh taale, de silanêend kul nôôn ma. ³⁷De vu taamusin hôok busin sen yêêv-aso navu kaavu hil haalend-ato, ond Yudas vu Galili hatee yi lak, om hako hil vaalu be lala in nambe lambiing ngaamong vu gaaman, le ma de layiis-ambe yimb having, de yite hil pin sen lawii-having yii-to lavuuh taale. ³⁸Om gêên-anjo sa naanêel vu ham naambe ham gavuu hil-anja be lana, in naambe silate kul-anjo vu omaahonôôn akand ond le na paya, ³⁹le naambe kul-anjo danggakook vu Anutu ond ham-ame alohvu nambe kawiiy e, in ham e naambe hil sen dayiis ngaamong vu Anutuu-to.”

^p 5:26 Mat 14:5 ^q 5:28 Sin 4:18; Mat 27:25 ^r 5:29 Sin 4:19 ^s 5:30 Sin 3:15

^t 5:31 Sin 2:33-34; Ep 1:20; Hiblu 2:10; 12:2 ^u 5:32 Sin 1:8 ^v 5:33 Sin 7:54

^w 5:34 Sin 22:3 ^x 5:36 Sin 21:38 ^y 5:37 Luk 2:1-2

Sinaale-so lapêêlis in lako nivaane lak Yesu haale

⁴⁰ ^zTombe kaansol-asôônju lawii-having Gamaaliel-ate vakasin om lateey sinaale-so lalom-ambe laveek sil, de lavu kôôvu sil niwêêk lôôt nambe me-daanêêl tanasin jak Yesu haale jesin naah e, tonde lanêêl-ambe lato lala voon. ⁴¹ ^aTombe sinaale-so lavuuh kaansol-aso de lala osin kand vasa lôôt, in Anutu yi nambe sil lalohvu om liinggis-ambe hil lawiing nindanjeen vu sil lak Yesu haale. ⁴² ^bTombe lak busin pin vu Anutu-te dumb bop alo de vu sil ambaand ond sil oo motaahu hil osin sil oo mondanêêl Yesu Kalisi-te banye nivasa langaah.

Laholin hil namaavaalu be vindak yuuh in landôôvu sinaale-so

6 ¹ ^cYesu-te hil latu ngeeyaata lak, tombe vaalu sen dakaas lavand Glik-ato dayi vaalu sen dakaas lavand Hibluu-to paya lak busin pin sen datiiy va yuuh amêê-to nambe, “Ham akam nalingin heyaneêngg vahaahôôv-aso.” ² Om sinaale-so nomaayuuh-ambe laam yuuh-ato lateey Yesu-te hil pin lalaam, le mem lanêêl vu sil nambe, “Me-lohvu nambe hey oo monggatiy vanôôn-ande hey gavuu Anutu-te vakasin e. ³ ^dOm halingg-aso, ham anggolin hamate hil sen hil pin dayi sil anivasaa-to namaavaalu be vindak yuuh, ond hil sen Vavi Vaambuung hôôvu sil osin sil alundkook anivasa, be yiy gatung sil oo ganggin kul sil gatiy va yuuh ame nivalok, ⁴ de hey-anjo yoo monaanohak osin hey monaanêêl Anutu-te vakasin.” ⁵ ^eTombe hil pin sen lasupin-anjôôto lango vakasin-anjo be nivasa, om laholin Stiven in yoo wii-having niwêêk-ambe Vavi Vaambuung hôôvu yi, de laholin Pilip ayuuh Plokolas, de Naikena yuuh Timon, de Pamenas ayuuh Nikolas. Nikolas-anjo yi vu Antiok ond bôôy hilin lopayo be lukalaam having Yuda-so. ⁶ ^fTombe lalaah hil-anjo lala daale sinaale-so mend-ambe sinaale-so lalohak lung la, tonde lambe namand ak sil. ⁷ ^gKe, om Anutu-te tanasin tu ahepataas ak, tombe hil Yelusalem ngeeyaata latu Yesu-te hil, tonde yik kul vaha sen datung salivangin-ato ngeeyaata lawii-having.

Yuda lalôôh Stiven

⁸ ^hStiven-anjo omaaho niwêêk bopaata osin samu samu danggakook, de nawiing taahu taahu bopaata osin niwêêk-ambe hil dayi, ⁹ tombe hil vaalu kandi be sil o Stiven-aso lanêêl sil in tanasin. Sil vaalu vu Sailini osin Aleksandlia, de sil danêêl silate dumb nambe hil sen lavu vêêl sil vêêl in omaaho ango namand lung laa-to silate dumb. De sil vaalu vu Silisia osin Esia having. ¹⁰ ⁱOm sil o Stiven-aso lanêêl sil, le ma de Vavi Vaambuung vu

^z 5:40 Sin 4:18 ^a 5:41 Mat 5:10-12; 1Pi 4:13 ^b 5:42 Sin 9:22; 17:3 ^c 6:1 Sin 4:35

^d 6:3 1Ti 3:7 ^e 6:5 Sin 8:5 ^f 6:6 Sin 13:3; 14:23 ^g 6:7 Sin 2:41; 16:5 ^h 6:8 Sin 2:43

ⁱ 6:10 Luk 21:15

kakook anivasa vu Stiven om hil-ame lalohvu yite vakasin e. ^{11j}Tombe lala lanêêl hôôk hil vaalu ahend nambe daanêêl vakasin tatuhin jak yi naambe, “Hey hango de nêêl Mose yuuh Anutu pale.” ¹²Mondanêêl atombe vakasin-anju kund hil pin alondpayo, om himbop-aso tanasin dangga-so lala lâlôôh Stiven, de sil laandiiy-ambe lala vu kaansol-aso, ^{13k}tombe lanêêl vu tatuhin ambu-so vaalu om lalaam-ambe lanêêl nambe, “Omaahôô-jo yoo monanêêl vakasin anipaya lak taaku vaambuung-anjo osin Mose-te tanasin, ¹⁴de hey hangoyin nêêl nambe Yesu Nasaale e kawiiy dumb-anjo de gilin tanasin sen Mose vu vu yiyi-ato.” ¹⁵Tombe kaansol-aso hil pin sen dandôô-juuto ond sil amend la vu Stiven niwêêk lôôt e layi de mekaalus lohvu angela me.

Stiven nêêl yite vakasin vu kaansol-aso

7 ¹Kul vaha sen datang salivangin-ato silate yêêv bop lingin Stiven nambe, “Vakasin-anju keen a?” ^{2l}Tombe Stiven nêêl vu sil nambe, “Halingg-aso mangg-aso, ham gango sate vakasin e. Vu bôôy yate himbop Abalaam naahen nando Mesopotemia de me-la nando Halan e, tombe melangaah danggakook Anutu taato yi vu, ³be nêêl vu yi nambe, ‘Onggavuuh gate taaku nanjip osin gate hil mando, de gana taaku ti soo le taato vu hong.’ ⁴Tombe Abalaam havuuh hil Kaldia-te taaku de la nando Halan, tonde mangganaan yimb lung la le mem Anutu hakoseey yi vuu-ju be lom nando taaku sen gêên ham nandôô-jo. ^{5m}De Anutu me-vu ngaanggis daka vu Abalaam in nambe yoo yinêên nivalok e, malis lôôt, lemu Anutu nêêl nambe taamusin e mem, le bu ngaanggis-anjo vu yi osin yite hil vu taamusin in naatu silate ngaanggis. Busin-anju Abalaam noow ma, de Anutu nêêl vakasin-anjo, ⁶ⁿond nêêl nambe, ‘Gate hil vu taamusin le lana mando hil bamaan-ate taaku, be daatu silate hil kul vaha malis amu, de lambiing nindanjeen vu sil lôôt nohvu ta 400.’ ^{7o}De Anutu nêêl having nambe, ‘Hil sen lambiing nindanjeen vu sil-ato, ond sale aambu nyevahaan naatovu sil jung na le mem gate hil e lanom-anjo be lanohak vu sa vu taakuu-jo.’ ^{8p}Tonde Anutu nêêl vu Abalaam nambe galaah unoopasiv anind naavi in taato naambe latu Anutu-te hil, om vu taamusin sen Abalaam hako noow Isak, tombe busin namaavaalu be vindak yaal lung la le mem halaah ninaavi. Isak-anju noow Yaakop, de Yaakop noow-aso ond yate danggakook-aso nomaayuuhambe laam yuuh, ^{9q}tombe yate danggakook-asôônju londpayo nipaya vu Yusep om lala lavu be hil laanggo de lako be lala Ijip. Lemu Anutu nando having yi ^{10r}om vu vêêl yi in va nimeen pin, de samu yi tombe Ijip-ate omaaho lulemak Pelo yi nambe omaaho osin lukook anivasa, om holin yi be tu Ijip-ate yêêv bop osin hanggin Pelo-te bayêên ayuuh va pin.

^j 6:11 Mat 26:59-61 ^k 6:13 Jer 26:11 ^l 7:2-5 Jen 11:31-12:7 ^m 7:5 Jen 15:18; 17:8

ⁿ 7:6 Jen 15:13-14; Eks 12:40 ^o 7:7 Eks 3:12 ^p 7:8 Jen 17:9-14; 21:4 ^q 7:9 Jen 37:11,28; 39:1-3,21-23 ^r 7:10 Jen 41:37-44; Saam 105:21

¹¹ ^s“Tonde meep bopaata tovu Ijip osin taaku Kanaan pin, tombe yate himbop-asôônju dando meep-ande vanôôn ma, om latovu nimeen bopaata. ¹² ^tLemu Yaakop hango banye nambe vanôôn nando Ijip, om nêêl-ambe yate himbop-asôônju lala nyendoos. ¹³ ^u“Tonde lalaah balon ango yesin atombe Yusep nêêl yi langaah vu halindin, tombe mem Pelo lak Yusep-ate halindin anind. ¹⁴ ^v“De Yusep nêêl vakasin la vu mangganaan Yaakop nambe gaving yite hil pin-ambe lanaam vu yi, ond hil-anju pin lohvu 75. ¹⁵ ^wYaakop la hatu nando Ijip vêêl e mem yimb, de yate himbop-asôônju layimb having, ¹⁶ ^xtombe laaku sil anind naavi be lalaah lambe neep hôôk lavandangga vu Sekem sen bôôy Abalaam vaanggo lak mone vu Hemo noondin-aso vu Sekem-ato.

¹⁷ ^y“Tonde busin sen Anutu navu biing vakasin sen nêêl vu Abalaam bôôy-ato nôôn jak nambe, ‘Gate hil vu taamusin le lanom-anjo be lanohak vu sa vu taaku-jo’ ond ngaaho lak, de hil Islel datu ngeeyaata nalak vu taaku Ijip-ambe ¹⁸ ^ztok laam busin sen lulemak ti yoo nindoos lukalaah-ambe hanggin taaku Ijip-ato. Lulemak tii-ju doosin Yusep-ate dangga, ¹⁹ ^aom tatuhin yate hil-ande nawiing nindanjeen vu sil nambe sil gaate noondin kaangêêndak na taavêêt alo be lanjimb. ²⁰ ^b“De Mose tangganaan hako yi, tombe yi nambe yoo nivasa lôôt, om yoo mondanggin hôôk bayêên alo lohvu kwaav yaal, ²¹ ^ctonde mem lala lambe neep hôôk bel nanyendangga, tombe sim Pelo nowaavêêh hako yi be la vaat tu noow-ambe bop ak. ²² Tombe sil taahu Mose hôôk hil Ijip-ate kakook anivasa pin, be tu omaaho nanêêl vakasin osin nawiing kul aniwêêk.

²³ ^d“Mose-te ta doo-yuuh lung la, tombe ka vu nambe na ji yite halindin-aso Islel. ²⁴ ^eTombe sim yi de Ijip ti nawiing nindanjeen vu Islel ti, om hôôvu Islel-ambe vu nyevahaan vu Ijip tii-ju de yiis-ambe yimb. ²⁵ Tombe ka vu nambe yite hil lalak ni nambe Anutu holin yi lung la in dôôvu sil, le ma de sil doosin. ²⁶ Tonde samiinaanôôn atombe Mose laah valup e yi de omaaho yuuh mondayiis yuuh, tombe wiingin nambe bu mamaal vu yuuh om nêêl vu yuuh nambe, ‘Maayuuh, muuh halim dangga timu, le nambe tana mawiingin ambiing muuh paya?’ ²⁷ Lemu omaaho sen yoo wiing ngaamong munggin vu hali-to, ond vakôôh Mose la de nêêl vu nambe, ‘Lati hatung hong in nambe onaatu yêêv-ambe ongganggin hey? ²⁸ Mak gawiingin nambe ganyis sa naambe vasêên gayiis Ijip tii-to?’ ²⁹ ^fNêêl nambêênju tombe Mose pak-ambe la tu bamaan nando hil Midian-ate taaku, tombe hako vêêh-ambe hako noow moow yuuh vuu-ju.

^s 7:11 Jen 41:54 ^t 7:12 Jen 42:1-5 ^u 7:13 Jen 45:1-4,16 ^v 7:14 Jen 45:9-11;

46:27 ^w 7:15 Jen 46:1-7; 49:33 ^x 7:16 Jen 23:2-20; 33:19; Jos 24:32

^y 7:17-18 Eks 1:7-8 ^z 7:19 Eks 1:10-22 ^a 7:20 Hiblu 11:23; Eks 2:2 ^b 7:21 Eks 2:3-10

^c 7:24-29 Eks 2:11-15,21-22 ^d 7:29 Eks 18:3-4

^{30 e}“Nando ta doo-yuuh vu Midian lung la, tombe sim busin ti la taaku lumbalaamb ngaaho vu kandu Sinai, tombe angela ti la hato vu hôôk kin mala, ond kin-anju natum hôôk haah aniyin ti. ³¹Mose yi kin-anju tombe vindis lôôt, om la ngaaho in nambe ji nivasa, le sim Omaaho Bop lava laam vu yi nambe, ³²‘Gate himbop-aso bôôy silate Anutu sa. Abalaam ayuuh Isak-ande Yaakop yaalate Anutu sa.’ Tombe Mose hees-ande yêênin lôôt nambe me-ji le, ³³le Omaaho Bop nêêl vu nambe, ‘Okavaayin suul na in taaku sen onaalêê-ja ond taaku vaambuung. ³⁴Saahe davu nivaane lôôt vu sate hil sen dando Ijip-ato, de sa hango silate susin lung la, om saalukalaam in saambu vêêl sil in nimeen-anju, om saambe gana Ijip.’

³⁵“Mosêê-jo ond bôôy sil mahôôh yi nambe, ‘Lati hatung hong in nambe onaatu yêêv-ambe ongganggin hey?’ Ond omaahôô-ju Anutu wiing angela la hato vu yi hôôk haah aniyin alôô-to, tombe angela wiing-ambe la lohvu yêêv bop osin omaaho sen dôôvu hil-ato. ^{36 f}Mose giyy sil-ambe lala de wiing taahu taahu bopaata osin niwêêk vaha vaha vu Ijip de vu Lôôy Hees, tonde vu taaku lumbalaamb lohvu ta doo-yuuh. ^{37 g}Mosêê-ju ond yik nêêl vu hil Islêl nambe, ‘Anutu yoo le golin ham o halim-aso ti naatu hamate omaaho ti in naanêêl Anutu-te vakasin langaah naambe sen holin saa-to.’

^{38 h}Mosêê-ju ond yik nando having hil Islêl vu taaku lumbalaamb. Nando having yate himbop-aso bôôy de angela sen nêêl vakasin vu yi vu kandu Sinai-to, ond hako Anutu-te vakasin metumin-ate be vu vu yiyy. ^{39 i}Lemu yate himbop-aso bôôy nind baya nambe sil-ame gango lava le, malis. Sil kalêêh lava de lahilin londpayo laah vu Ijip, ^{40 j}de lanêêl vu Aalon nambe, ‘Osamu heyate anutu heey in daanggiy hey, in Mose sen giyy hey vu Ijip-ambe hey alaam-anjôôto, ond hey doosin mak vaati wiing.’ ⁴¹Om lanêêl atombe sil samu kao noow ti kanu, be latung salivangin osin lapêêlis vu silate anutu tatuhin vaha sen sil oo samu lak namand-anjuuto. ^{42 k}Tombe Anutu haluuh dami vu sil, de hilin sil alondpayo la vu taaku mekaalus ayuuh kwaav-ande matam-ambe mondalohak vu, lohvu Anutu-te vakasin sen hil lanêêl langaah bôôy-ambe neep hôôk kaapiya nambe, ‘Ham Islêl, vu bôôy ham nando taaku lumbalaamb lohvu ta doo-yuuh, de ham ayiis kao osin bik sipsip-ambe ham hatung salivangin. Mak ham awiing vaa-ju vu sa? Malis. ⁴³De anutu tatuhin vaha sen haale nambe Molok-ato ond ham vaaku yite dumb sel having anutu tatuhin vaha Lapan-ate matam kanu be va kanuu-ju ham samu be ham alohak vu, om sale gakoseey ham ana mando dinaandiin na Babilon vaalu.’

^e 7:30-35 Eks 3:1-10 ^f 7:36 Eks 7:3; 14:21; Nam 14:33 ^g 7:37 Sin 3:22 ^h 7:38 Eks 19:3; Diu 5:5; 9:10; Sin 7:53 ⁱ 7:39 Nam 14:3 ^j 7:40-41 Eks 32:1-6,23 ^k 7:42 Jer 19:13; Emo 5:25-27

⁴⁴“De Anutu-te dumb sel sen nando hôôk yate himbop-aso lavuun bôôy vu taaku lumbalaamb-ato, ond taato nambe Anutu nando having sil. Dumb-anjo Anutu nêêl vu Mose, tombe yik sil samu lohvu sen Mose yi kanuu-to. ⁴⁵“Dumb sel-anju yate himbop-aso vu taamusin lako lak-ambe lala having Yosua be lala lako hil bamaan-ate taaku, de Anutu hatiiy hil bamaan-anju lala vêêl in sil, de latung dumb sel-anju nando be tok laam Devit-ate busin having. ⁴⁶“Tombe Anutu yi Devit anivasa, om Devit kataangg Anutu in nambe jiinggis e mem le daav bayêên ti vu Yaakop-ate Anutuu-ju, ⁴⁷“le ma de Solomon haav.

⁴⁸“Lemu Anutu baandoni me-nando hôôk bayêên sen omaahonôôn dahaav ak namand-ato le, lohvu omaaho ti nêêl Anutu-te vakasin langaah nambe,

⁴⁹“Omaaho Bop nêêl nambe, “Baandoni ond sate sia, de ngaanggis ond sa vahangg-ate in jambaale. Ham awiingin nambe andaav bayêên nambe vaati vu sa? De sa baangg sen sa sawaah-ato nando tana? ⁵⁰Mak sa namangg-ame yoo samu va pin-anja le?”

⁵¹“Ham alumkook aniwêêk, de ham alompayo mekanu osin ham nanyem doos. Ham oo monatiiy Vavi Vaambuung nalak busin pin, om ham alohvu hamate himbop-aso bôôy. ⁵²“Hil sen danêêl Anutu-te vakasin langaah-ato ond ti tana nando bôôy-ambe hamate himbop-aso me-lawiing nindanjeen vu le? Malis. Hil sen danêêl vakasin langaah nambe Omaaho Nivalok e naam-ato ond hamate himbop-aso bôôy layiis sil-ambe layimb, om gêên ham oo anêêl yi langaah vu hil-ambe layiis-ambe yimb. ⁵³“De ham-anjo ham hako tanasin vu angela-so, le ma de ham-ame samu le.”

Layiis Stiven ak tatuuh-ambe yimb

⁵⁴“Lango vakasin-anju be kund sil alondpayo, tombe sil langa navund vu Stiven. ⁵⁵“Le Vavi Vaambuung hôôvu Stiven om valaah me lak baandoni, tombe yi Anutu-te nikaapulil osin yi Yesu naale Anutu nama vasa. ⁵⁶“Tombe Stiven nêêl nambe, “Ham hil-e, saahe baandoni hataahin-ande Omaahonôôn Noow naale Anutu nama vasa.” ⁵⁷Tombe lawiing lavand bopaata lôôt osin sil lavu jeen sil nanyend, de sil pavis-ambe lambuuh Stiven tatup, ⁵⁸“de lakôôh-ambe la taaku nanyendanga in nambe lanyiis ak tatuuh-ambe jimb. De hil sen tatuhin vakasin lak yii-to, ond lakaah silate lolop-ambe lala latung hôôk maanggêem ti haale nambe Saul vaha. ⁵⁹“Tonde sil tanga Stiven lak tatuuh lôôt, de Stiven kataangg

¹ 7:44 Eks 25:40 ^m 7:45 Jos 3:14-17; 18:1; 23:9 ⁿ 7:46 2 Sml 7:1-16; Saam 132:1-5

^o 7:47 1King 6:1,14 ^p 7:49-50 Ais 66:1-2 ^q 7:51 Eks 32:9; Jer 9:26; Ais 63:10

^r 7:52 2Kro 36:16; Mat 23:31 ^s 7:53 Sin 7:38; Gal 3:19; Hiblu 2:2 ^t 7:54 Sin 5:33

^u 7:55 Mat 22:44; Sin 2:33-34; 5:31 ^v 7:56 Kol 3:1 ^w 7:58 Sin 22:20 ^x 7:59 Saam 31:5; Luk 23:46

nambe, “Omaaho Bop Yesu, onggako sa kanungg naas.” ⁶⁰Ytonde hatung kaatu be nêêl bopaata lôôt nambe, “Omaaho Bop, game gambu hôôk silate nipaya nyevahaan e.” Nêêl nambêênju tonde yimb la.

Saul nawiing nindanjeen vu hil bel-ate

8 ¹Saul yi nivasa in layiis Stiven-ambe yimb. Tombe hôôk busin-anju hil mondawiing nindanjeen vu hil bel-ate sen dando Yelusalem-ato, om hil bel pin lapak-ambe lavuuh taale lohvu Yudia osin Samaalia-te taaku pin, de sinaale-so yoo daahen dando Yelusalem. ²Hil anivasa vaalu sen kand navu sapa Anutuu-to ond lahaav Stiven-ande lasu bopaata lak yi, ³tonde Saul monawiing nindanjeen vu hil bel-ate pin. Nalukala bayêên alo pin-ambe naandiiy moow ayuuh vêêh danjeen-ambe la natung sil hôôk kalaambus.

Lanêêl banye nivasa vu Samaalia

⁴Hil pin sen lapak-ambe lavuuh taalêê-to ond latup hôôk-ambe lanêêl banye nivasa langaah. ⁵Tombe Pilip la hato Samaalia-te taaku ti be nêêl Kalisi haale langaah vu sil. ⁶Tombe hil ngeeyaata lôôt lango Pilip-ate vakasin, de layi taahu taahu niwêêk vaha vaha sen wiing-ato, be lawii-having yite vakasin osin londpayo timu. ⁷Tonde hil ngeeyaata sen mamu nipaya nahôôvu sil-ato, ond mamuu-ju dawiing lavand bopaata be lato dala, de hil ngeeyaata sen kook navu tasiis osin vahand anipayaa-to sil anind vasa nahôôk laah, ⁸tombe hil sen dando taakuu-juuto londpayo nivasa lôôt.

⁹De omaaho lôômb ti nando taaku Samaalia haale nambe Simon, ond yoo nako yi lak nambe yi omaaho bopaata. Tombe hil pin lavindis in yite kul, ¹⁰hil malis osin hil yêêv pin lawii-having Simon-ate vakasin-ambe lanêêl nambe, “Omaahôô-jo Anutu-te niwêêk, danêêl nambe niwêêk bopaata.” ¹¹Ond lavindis in yite kul mamu lôômb sen yoo nawiing boyambôôy-ato ondeey lawii-having lava. ¹²Lemu Pilip nêêl va sen Anutu nanggin yite hil-ato osin Yesu Kalisi banye langaah vu sil, tombe moow ayuuh vêêh lawii-having-ambe lalipis bel. ¹³Tonde yik Simon wii-having-ambe lipis bel lung la le mem taamuyin Pilip. Om Simon yi de Pilip wiing taahu taahu vaha vaha osin niwêêk bopaata, tombe vindis lôôt. ¹⁴De sinaale-so vu Yelusalem ond lango banye nambe hil Samaalia lako Anutu-te tanasin ak, om lawiing Pita yuuh Jon lala vu sil.

¹⁵Yuuh latok lala be yuuh lalohak in hil-anju nambe Vavi Vaambuung jakana sil, ¹⁶in Vavi Vaambuung-ame lakala sil e, de lalipis bel lak Omaaho Bop Yesu haale mu. ¹⁷Om sinaale yuuh lambe namand ak sil atombe

^y 7:60 Luk 23:34 ^z 8:1 Sin 7:58; 8:4; 11:19 ^a 8:3 Sin 9:1,13; 22:4; 26:9-11 ^b 8:5 Sin 6:5
^c 8:7 Mat 10:1; Mak 16:17 ^d 8:17 Sin 19:6

mem Vavi Vaambuung lakala sil. ¹⁸Tombe Simon yi de sinaale yuuh lambe namand ak sil-ambe Vavi Vaambuung lakala sil, om hako mone be la vu yuuh ¹⁹be nêêl nambe, “Mambu va niwêêk-anja vu sa gaving in naambe sa gambe namangg jak hil ond Vavi Vaambuung jakana sil.” ²⁰Le Pita nêêl vu nambe, “Gambe ombaanggo Anutu-te samu samuu-jo jak mone, om gana menama osin gate mone. ²¹^eVaa-jo game gate va le, malis lôôt. Anutu yi nambe galompayo me-nivalok e, ²²om ganggilin galompayo de onggaluuh damim vu gate va nipaya, de okataangg vu Omaaho Bop in kawiiy va sen galompayo yoo wiingin-ato na. ²³^fSaahe de galompayo nikalin lôôt de gate va nipaya duuh hong tatin.” ²⁴Tombe Simon nêêl laah nambe, “Manohak na vu Omaaho Bop naambe va sen manêêl-anjaato me-naatovu sa le.”

²⁵Sinaale yuuh lanêêl Omaaho Bop-ate vakasin langaah lung la, tonde yuuh lala in nambe lanaah Yelusalem, tombe sim yuuh lanêêl banye nivasa langaah vu Samaalia-te taaku ngeeyaata vu mopaatôôv.

Pilip nêêl tanasin vu yêêv Itiopia ti

²⁶Omaaho Bop-ate angela ti nêêl vu Pilip nambe, “Okandi lak-ambe gana gato mop lavuun sen vu Yelusalem-ambe la hato Gasaa-to.” Mopaatôôv-anju ond taaku lumbalaamb. ²⁷^gOm Pilip kandi lak-ambe la, tombe yi de Itiopia ti hato, ond hil Itiopia-te kwin Kandesi yite yêêv bop sen nangg in yite kupak pin-ato, ond la lohak vu Yelusalem lung la, ²⁸tonde hato laah in na, tombe monasevin omaaho sen nanêêl Anutu-te vakasin langaah-ato Yesaia-te vakasin lakando pêêt sen hôôs

naandiy-ato. ²⁹Om Vavi Vaambuung nêêl vu Pilip nambe, “Gana ngaaho vu omaahôô-ju be mana.” ³⁰Tombe Pilip hatup-ambe la ngaaho vu, le hango de nasevin Yesaia-te vakasin, om lingin nambe, “Vakasin sen onasevin-anja, ond galak danggakook ani me malis?” ³¹^hLe omaahôô-ju nêêl laah vu nambe, “Sa jak ni in lati naanêêl vu sa? Omaaho ti naanêêl tatekin vu sa ond mem.” Om nêêl nambe Pilip jakana mando gaving yi.

³²ⁱKe, omaahôô-ju nasevin Anutu-te vakasin boow ti neep hôök kaapiya nambe,

“Langgiiy yi be lala lohvu bik sipsip sen davu lanyiiis-ambe jimb-ato, de lohvu bik sipsip noow sen daving nivalus-ande me-nasuu-to, ond omaahôô-ju me-vakaas e. ³³Tombe laanggôôl yi lôôt de melanêêl vakasin anivasa ti lak yi le. De yite hil moos dando tana in nambe yiy naanêêl sil langaah? Malis, in havuuh ngaanggis voon-anjo de la.”

³⁴Tombe yêêv tii-jôôto lingin Pilip nambe, “Otatekin vu sa le, naambe Yesaia nêêl vakasin-anjo ond yoo nêêl lak yi me nêêl lak omaaho ango?”

^e 8:21 Saam 78:37 ^f 8:23 Hiblu 12:15 ^g 8:27 Ais 56:3-7 ^h 8:31 Jon 16:13

ⁱ 8:32 Ais 53:7-8

³⁵Om Pilip nêêl vakasin-anju be tatekin Yesu-te banye nivasa langaah vu yi, ^{36j}de yuuh mondala be lala lato bel ti, tombe yêêv tii-jôôto nêêl nambe, “Angge, bel neep-anjo. Lohvu nambe ganjipis sa pavis me malis?” ³⁷[Tombe Pilip nêêl vu nambe, “Galompayo wii-having keen lôôt ond hoow-o.” Le nêêl laah vu nambe, “Saawii-having nambe Yesu Kalisi yi Anutu Noow.”] ³⁸Tonde nêêl vu yite omaaho sen nando having yii-to be puvu hees tatin-ande hôôs naale, tonde yuuh Pilip laluuus-ambe lalukala daale hôôk bel, tombe mem Pilip lipis yi. ^{39k}Tonde yuuh vu belalu be lalakalaah atombe Omaaho Bop-ate Vavi Vaambuung vu vêêl Pilip la pavis, de yêêv-anjôôto me-yi Pilip yesin laah e, om la osin lopayo nivasa lôôt. ^{40l}Tonde Pilip yi nambe la hato Asdot, tombe nêêl banye nivasa langaah lohvu taaku pin-ambe tok la Sisalia.

Yesu hilin Saul alopayo
(*Sinaale 22:4-16; 26:9-18*)

9 ^{1m}Saul nêêl niwêêk lôôt nambe biing nindanjeen vu Omaaho Bop-ate hil de nyiis sil-ambe lanjimb, om la vu kul vaha sen datung salivangin-ato silate yêêv bop, ²be nêêl vu nambe kaavu kaapiya na nohvu hil Yuda-te dumb ti ti vu Damaskas naambe, “Saul naatovu moow ayuuh vêêh sen lawii-having Yesu-te tanasin-ato, ond talu sil-ambe gako na Yelusalem.” ³Om Saul monala be la valup ngaaho vu Damaskas, tombe sim pavis atombe kin ti tum vu baandoni be têtêlang ak yi, ⁴tombe Saul lupake be la neep voon, tonde hango lava ti laam vu yi nambe, “Saul, nambe vaati sen goo monawiing nindanjeen vu saa-jo?” ⁵ⁿTombe Saul lingin nambe, “Omaaho Bop, olati?” Le nêêl nambe, “Sa Yesu sen goo monawiing nindanjeen vu saa-jo. ⁶Om okandi be gana bayêên e mem le daanêêl va sen gambiing-ato langaah vu hong.” ⁷Hil sen laving Saul-ato, ond lango lavaa-ju lemu me-layi omaaho ti le, om lavand ma de yoo daale. ⁸Tombe Saul kandi naale le ma de mekanu hôôk lôôt, om sil laliv namand hôôk-ambe lala Damaskas, ⁹tombe nandôô-ju lohvu busin yaal osin mekanu, de me-ya vanôôn ayuuh me-num bel e.

¹⁰Tonde Yesu-te omaaho ti nando Damaskas haale nambe Ananias, ond nando le yi taahu taahu ti, de Omaaho Bop nêêl vu nambe, “Ananias.” Tombe liinggis nambe, “Omaaho Bop, saa-jo.” ^{11o}Tombe Omaaho Bop nêêl vu nambe, “Okandi jak-ambe gana mopaatôôv sen danêêl nambe Nivalok-ato, tombe onaatovu hil Taasas ti haale nambe Saul, ond monalohak nando hôôk Yudas-ate bayêên, ¹²de yi taahu taahu ti de omaaho ti haale nambe Ananias lukalaam umakalo be hambe nama lak yi in nambe me naatum naah.” ^{13p}Le Ananias nêêl nambe,

^j 8:36 Sin 10:47 ^k 8:39 1King 18:12 ^l 8:40 Sin 21:8 ^m 9:1 Sin 8:3 ⁿ 9:5 Sin 5:39;
1Ko 15:8 ^o 9:11 Sin 21:39 ^p 9:13 Sin 8:3

“Omaaho Bop, sa hango de hil ngeeyaata danêêl nambe omaahôô-ju nawiing nindanjeen lôôt vu gate hil vu Yelusalem, ¹⁴tonde yêêv-aso salivangin-ate lanêêl lung la nambe yoo talu hil pin sen lavand nahôôk ohaalem vuu-jôôto.” ¹⁵Lemu Omaaho Bop nêêl vu nambe, “Gana. Saaholin yi be tu sate hil kul vaha lung la in gako sa haalengg na vu omaahonôôn pin, de vu lulemak-aso osin hil Islel gaving. ¹⁶De nimeen pin sen naatovu yi jak sa haalengg-ato ond soo le naanêêl taato vu yi.” ¹⁷Om Ananaias kandi be la hato lukala bayêên alo, tombe hambe nama lak Saul de nêêl vu nambe, “Hali Saul-e, Omaaho Bop Yesu sen taato yi langaah vu hong vu mop lavuun-ato, ond nêêl-ambe sa laam in nambe gamem naatum naah, de Vavi Vaambuung e naam dôôvu hong.” ¹⁸Om pavis atombe va sen nando hôôk Saul amêê-to lumbin nambe paahuung anikapis-ato, tonde

Saul ame tum laah, tombe kandi lak-ambe lipis bel lak Yesu haale, ¹⁹de ya vanôôn-ambe sake lukalaah.

Saul nêêl banye nivasa langaah vu Damaskas

Saul nando having Yesu-te hil vu Damaskas-anju busin heey, ²⁰ond pavis-ambe nêêl Yesu-te banye nivasa langaah hatup hôôk hil Yuda-te dumb ti ti nambe, “Yesuu-ju ond Anutu Noow yi.” ²¹Tombe hil vaalu sen lango yite vakasin-anjuuto sil pin lavindis lôôt, de lanêêl nambe, “Ayêê, omaahôô-ja nayiis hil sen lavand nahôôk Yesu haale vu Yelusalem-ato, ond laam in naanduuh hil vuu-jo de gako sil lana vu yêêv-aso salivangin-ate, le mak nambe vaatii-jo?” ²²Lemu Saul-ate niwêêk tu bopaata lak, om nêêl taato vu sil nambe Yesuu-ju yi omaaho sen Anutu yoo holin yi vulôôt-ato keen, tombe hil Yuda sen dando Damaskas-ato lango yite vakasin-anju, tombe silanêênd vakasin sen daanêêl naah vuu-to ma.

Hil Yuda ahend kalin vu Saul om pak

²³Tombe busin ngeeyaata la lung la, le mem hil Yuda lasupin-ambe lanjôôy vakasin nambe lanyiis Saul-ambe jimb. ²⁴Saul hango silate vakasin-anju banye nambe hil Yuda dambuuh mop avi lohvu taaku pin hôôk busin-ande langaah in nambe lanyiis-ambe jimb, ²⁵om Saul-ate hil sen dando having yii-to lako yi hôôk busin-ambe lalakala kaatum alu baandoni, tombe latung lukala nando hôôk jaambang bopaata ti, le mem sil taaluuhin yi la voon-ambe la.

⁹ 9:14 Sin 9:1-2,21; 1Ko 1:2 ^r 9:15 Sin 25:13,23; 27:24; Lom 1:5 ^s 9:16 2Ko 11:23-28

^t 9:21 Sin 8:3; 26:10 ^u 9:22 Sin 17:3; 18:5,28 ^v 9:23 Sin 23:12 ^w 9:25 2Ko 11:32-33

Saul la nando Yelusalem

²⁶ *Saul la hato Yelusalem-ambe wiingin nambe na mando gaving Yesu-te hil, le sil pin layêênin Saul lôôt in me-lawii-having nambe Yesu-te omaaho yi le. ²⁷ †Lemu Banabas giyy-ambe yuuh lala vu sinaale-so, de hatulin vakasin sen Saul yi Omaaho Bop vu mop lavuun-ambe Omaaho Bop vakaas vu yii-to, osin nêêl vakasin sen Saul nêêl Yesu haale langaah vu hil vu Damaskas-ande me-yêênin-ato le. ²⁸ Saul nando having sil vu Yelusalem, ond yoo nêêl tanasin lak Omaaho Bop haale niwêêk lôôt de me-yêênin e. ²⁹ Tonde having Yuda vaalu sen dakaas Glik lavand-ato, ond sil papenggin sil in tanasin, tombe sim hil-anju lawiingin nambe lanyiis Saul-ambe jimb. ³⁰ ‡Le sim Omaaho Bop-ate hil langoyin banye tombe langgiy Saul-ambe lala Sisalia, le mem lawiing yi vuu-ju be la Taasas. ³¹ Tombe mem hil bel-ate vu Yudia yuuh Galili, de taaku Samaalia pin, dando nivasa de ngaamong ayuuh ame ma. Layêênin sil vu Omaaho Bop de Vavi Vaambuung vu niwêêk vu sil, tombe mem hil bel-ate latu ngeeyaata lak lôôt.

Pita wiing-ambe Inias anivasa lak

³² Pita monatup hôök lohvu taaku pin-ambe la hato vu Omaaho Bop-ate hil sen dando Lidaa-to, ³³ tombe sim tovu omaaho ti haale nambe Inias vuu-ju, ond kook tasiis-ande yoo neep hôök bayêên alo lohvu ta namaavaalu be vindak yaal lung la. ³⁴ Tombe Pita nêêl vu nambe, “Inias, gêên Yesu Kalisi wiing-ambe ganim vasa lak, om okandi jak-ambe goo gatongin gate kaanye.” Tombe kandi lak pavi-vasa. ³⁵ Tombe hil Lida osin hil vu Salon pin layi be lahilin londpayo la vu Omaaho Bop.

Pita wiing-ambe Tabita kandi lak laah

³⁶ Vêêh ti wii-having Yesu nando Jopa haale nambe Tabita, Glik lavand nambe Dokas, ond lak busin pin yoo navu samu hil, de nahôôvu hil sen dativak in va yuuh amêê-to. ³⁷ Tombe sim busin ti tombe nilak-ambe yimb, om lalipis ninaavi de lambe lakala neep ak bayêên alo ango baandonii-to. ³⁸ Tonde Yesu-te hil langoyin nambe Pita nando Lida sen neep ngaaho vu taaku Jopaa-to, om lawiing omaaho yuuh lala vu be yuuh kataangg yi nambe, “Ganaam pavis vu hey e.” ³⁹ Om Pita kandi lak-ambe la having yuuh. La hato tombe lako yi be lalakala bayêên alo baandoni, tombe vехаahôôv-aso pin lako lolop ayuuh ame sen Dokas nando having sil bôôy-ambe duuh-ato, ond sil taato vu Pita de lasu lak yi. ⁴⁰ “Tombe Pita hatiyy hil pin lala voon, de hatung kaatu be lohak, tonde

* 9:26 Gal 1:17-19 † 9:27 Sin 9:4,20; 1Ko 9:1; 15:8 ‡ 9:30 Sin 11:25; Gal 1:21

ª 9:40 Mak 5:40-41

hilin laah vu omaahonôôn yimbin-ato be nêêl nambe, “Tabita, okandi.” Tombe vêêh-anjuuto me tum-ambe yi Pita de kandi nando, ⁴¹ tombe Pita laandiiy hôôk nama be kandi naale, de teey vехаahôôv-aso osin Omaaho Bop-ate hil pin lalaam-ambe taato vu sil nambe Dokas ame tum laah. ⁴² Tombe hil Jopa pin lango vakasin-anjôôto banye, om hil ngeeyaata lawii-having Omaaho Bop. ⁴³ ^bTombe Pita nando Jopa busin ngeeyaata having omaaho ti haale nambe Simon sen nawiing kul bik naavii-to.

Angela nêêl vakasin vu Konilias

10 ¹ Hil Lom ti nando Sisalia haale nambe Konilias, ond tu hil ngaamong vaha doo-nomaayuuh-ate yêêv sen danêêl sil nambe Itaali-to. ² Ond omaahôô-ju having yite hil-ambe dayêênin Anutu, tonde yoo ka navu Anutu be nalohak lak busin pin, de nahôôvu hil Yuda sen dativak in va yuuh amêê-to. ³ ^dTombe busin ti hôôk taaku me yaal, ond omaahôô-ju nando le yi taahu taahu ti, de Anutu-te angela ti lukalaam-ambe taato yi langaah, be nêêl vu nambe, “Konilias.” ⁴ Tombe Konilias yi be yêênin lôôt tombe nêêl nambe, “Omaaho Bop, nambe vaati?” Tombe angela nêêl nambe, “Gate lohakin osin samu samu sen onahôôvu hil sen dativak in va yuuh amêê-to, ond vaa-ju banye tok laam-ambe Anutu ka navu nando. ⁵ Om peey gambiing-ambe hil lana gako omaaho ti haale nambe Simon, de haale ango nambe Pita, vu Jopa be naam. ⁶ Omaahôô-ju la nando having lengo Simon sen nawiing kul bik naavii-to, ond yite bayêên nando ngaaho vu lôôy nanyendangga.” ⁷ Angela nêêl vakasin vu Konilias lung la de la, le mem Konilias teey yite kul vaha yuuh laving hil ngaamong vaha ti sen yoo ka navu Anutu be nando having Konilias lak busin pin-ato, ⁸ tombe Konilias nêêl vakasin-anju tatekin vu yaal lung la le mem wiing yaal lala Jopa.

Pita yi taahu taahu ti

⁹ Tombe omaaho yaal-anjuuto mondala be lala deep mop lavuun, de langaah ak e mem yaal lala be latok lala bayêên Jopa. De taaku me laam naale lavuun, tombe Pita lakala bayêên alu baandoni in nohak. ¹⁰ Tombe yimb ahe be wiingin nambe ja vanôôn, le daahen dayêêh yite vanôôn, tonde sim Pita yi taahu taahu ti, ¹¹ ^fond yi de baandoni hataahin-ande vati nambe sen tôômb bopaata ti luus-ambe nalaam, ond landuuh hôôk nanyendangga yumbeyuuh de sil taaluuhin-ambe nalaam voon, ¹² tombe vahivak vaha vaha sen naale nala de nahaavak osin manak pin nando hôôk tôômb-anju lopayo. ¹³ Tombe lava ti laam nambe, “Pita, okandi be ganyiis vahivak-anja be gangga.” ¹⁴ ^gLemu Pita nêêl laah nambe,

^b 9:43 Sin 10:6 ^c 10:1 Mat 8:5; Sin 27:1,3 ^d 10:3 Sin 3:1 ^e 10:6 Sin 9:43

^f 10:11 Sin 11:5-17 ^g 10:14 Lev 11:1-47; Esi 4:14

“Omaaho Bop, malis lôôt. Va nipaya osin va bamaan nambêênja ond same naha bôôy e.” ¹⁵ Tombe lava ango lo-hato balon ango having nambe, “Va sen Anutu samu be nivasa lak-ato, ond game ganjêênin naambe nipaya le.” ¹⁶ Omaaho Bop nêêl vakasin nambêênju balon yuuh having tu balon yaal, le mem tôômb-anjuuto lak-ambe laah baandoni pavis, ¹⁷ tombe Pita nando ka monavu va sen yii-to nambe, “Mak peey e vaa-ju danggakook nambe va?”

Ka monavu nambêênju tonde Konilias-ate omaaho yaal sen wiing yaal lalaam-ato, ond lato be lalingin hil, de mondalaam-ambe lato daale Simon-ate bayêên vinavi, ¹⁸ tombe lateey-ambe lalingin nambe, “Simon sen haale ango nambe Pitaa-to ond laas nandôô-ja me malis?” ¹⁹ Tombe Pita yoo nando ka monavu taahu taahuu-ju, le Vavi Vaambuung nêêl vu nambe, “Onggango omaaho yaal lato davu salo hong ani, ²⁰ om okandi jak-ambe ganduus-ambe gana gaving yaal, de game gakam yu-yuuh e, in soo aawiing yaal lalaam.” ²¹ Om Pita luus-ambe laah hatu vu yaal-ambe nêêl nambe, “Omaaho sen ham navu salo yii-to ond yik saa-jo. De ham alaam in vakasin va?” ²² Le yaal lanêêl laah vu nambe, “Konilias sen hil Lom ngaamong vaha doo-nomaayuuu-ate yêêv-ato, ond wiing waay alaam. Omaahôô-ju omaaho nivalok yoo nayêênin Anutu, de hil Yuda pin layi yi nivasa, ond angela vaambuung ti nêêl taato vu nambe biing hil lanaam in gako hong-ambe gana baan, in gango vakasin vu hong.” ²³ Om Pita nêêl-ambe yaal lalukala deep having yi, de samiinaanôôn atombe sil pin kandi be lalaah, tombe Omaaho Bop-ate hil vaalu vu Jopa lala having.

Pita la Konilias ambaan

²⁴ Sil mondala be lala deep busin ti vu mop lavuun, le mem sil latok lala Sisalia. Tonde Konilias teey yite hil sen sil dangga timuu-to osin yite nipaapu vaalu sen ahe naving sil-ato, be sil lasupin-ambe dando mondanggin Pita. ²⁵ Tonde Pita lukala umakalo tombe Konilias laam-ambe hatu pataav baambu neep voon hôôk Pita vaha in nambe gako haale jak, ²⁶ le ma de Pita laandiiy hôôk nama de nêêl vu nambe, “Okandi jak, yik sa omaahonôôn nambe hong-anja.” ²⁷ Pita monakaas vu be yuuh lalukala umakalo, tombe sim yi de hil ngeeyaata lasupin-ambe dando. ²⁸ Tombe Pita nêêl vu sil nambe, “Ham oo alak ni nambe hil Yuda danêêlin nambe sil-ame mando gaving hil vaalu osin me-lana vu sil e, malis lôôt. Lemu sak Anutu nêêl taato vu sa nambe same naanêêl omaaho ti naambe nipaya me nindanjeen e, malis lôôt. ²⁹ Om gêên ham ateey sa be sa laam-anjo ond same aayêênin e, om saanjingin ham

^h 10:15 Mak 7:15,19 ⁱ 10:19 Sin 11:12; 13:2 ^j 10:22 Sin 10:1-2 ^k 10:23 Sin 10:45; 11:12

^l 10:26 Sin 14:13-15; Taato 19:10

naambe ham ateey sa laam in vakasin vaati?” ³⁰ ^mTombe Konilias nêêl nambe, “Gêên busin yumbeyuuh lung la, ond busin ti nyendoos-ato hôôk taaku me yaal nambe sen gêên-anjo, tombe sa monaalohak hôôk sate bayêên alo, le sim saahe omaaho ti osin yite tôômb ayuuh ame nivalôôy lôôt, ond hato naale hôôk sa mengg, ³¹ be nêêl nambe, ‘Konilias, Anutu hango gate lohakin, de ka navu gate samu samu sen onahôôvu hil in dativak in vaa-to, ³² om gambiing hil lana Jopa in gako Simon sen haale ango nambe Pitaa-to, ond la nando having lengo Simon sen nawiing kul bik naavii-to, ond yite bayêên nando ngaaho vu lôôy nanyendangga.’ ³³ Om saanêêl pavis-ambe hil lalaas in hong, le gawiing nivasa be galaam, om gêên hey pin sen hey alaam nandôô-jo lak Anutu haale, hey aawiingin nambe gango vakasin pin sen Omaaho Bop nêêl vu hong nambe onaanêêl-ato.”

Pita wiing tanasin hôôk Konilias ambaan

³⁴ ⁿTombe Pita nêêl nambe, “Gêên-anjo sa lak ni keen lôôt nambe Anutu me-yoo ka navu hil dangga timu le, ma. ³⁵ ^oYik omaahonôôn pin, ti nambe jêênin Anutu de bing va na nivalok, ond le ji yi nivasa. ³⁶ ^pDe Anutu wiing-ambe Yesu Kalisi sen tu yiyi pin-ate Omaaho Bop-ato, ond nêêl banye nivasa osin vakasin melaas langaah vu hey Islêl. ³⁷ ^qDe ham oo alak ni nambe Jon nêêl tanasin lak belipisin vêêl e, mem Yesu Kalisi-te vakasin-anju hil lanêêl vu Galili be la lohvu taaku Yudia pin. ³⁸ ^rIn Yesu Nasaale ond Anutu yoo holin yi be vu Vavi Vaambuung osin niwêêk vu yi, tombe la lohvu taaku pin-ambe nahôôvu hil, de navu samu hil sen Saalang navu nimeen vu sil-ato be nind vasa nalak laah, in Anutu nando having yi. ³⁹ De va pin sen wiing vu hey Yuda-te taaku de vu Yelusalem, osin layiis yi lakala haah-ambe yimb-ato, ond hey aahe, ondeey hey naanêêl tatekin-anjo. ⁴⁰ ^sLemu busin yaal lung la le mem Anutu wiing-ambe kandi lak laah-ambe taato yi langaah, ⁴¹ ^tond me-taato yi vu hil Yuda pin e, malis, yoo taato yi vu hey sen bôôy Anutu holin hey nambe hey naanêêl yite vakasin-ato. De sen kandi lak laah vu hil yimbin-atêeto ond hey aha vanôôn osin hey aanum having yi. ⁴² ^uDe nêêl vu hey nambe hey naanêêl tatekin osin hey naanêêl langaah vu hil naambe Anutu holin yi lung la in gangoyin hil yimbin osin metumin-ate vakasin, be golin nivasa osin nipaya. ⁴³ ^vOnd hil lanêêl Anutu-te vakasin langaah lak omaahôô-ju nambe hil pin sen londpayo la timu vu yii-to, ond haalêê-ju le kawiiy silate nipaya na.”

^m 10:30 Sin 1:10; 3:1 ⁿ 10:34 1 Sml 16:7; Lom 2:11; Gal 2:6 ^o 10:35 Jon 9:31

^p 10:36 Saam 107:20; Ais 52:7; Taato 17:14 ^q 10:37 Mat 4:12-17 ^r 10:38 Mat 3:16;

Luk 4:17-20 ^s 10:40 1Ko 15:4-7 ^t 10:41 Jon 14:19,22-24; 15:27; Sin 1:8; Luk 24:42-43

^u 10:42 Sin 17:31; 2Ti 4:1; 1Pi 4:5 ^v 10:43 Ais 33:24; 53:5-6; Jer 31:34; Dan 9:24

Vavi Vaambuung lakala hil vaalu sen sil-ame Yudaa-to

⁴⁴W^wPita naahen monanêêl vakasin atonde Vavi Vaambuung lakala hil pin sen dando mondango vakasin-anjuuto. ⁴⁵Tombe hil Yuda sen lawii-having Yesu be sil ahondoos Pita-so lalaam-ato, ond lavindis lôôt in Anutu vu Vavi Vaambuung lakala hil vaalu sen sil-ame Yudaa-to having. ⁴⁶x^xTombe lango de hil-anjuuto lakaas bayêên bu ti ti lavand-ambe dako Anutu haale lak, om Pita nêêl nambe, ⁴⁷y^y“Lati le naanêêlin hil-anjo naambe me-lanjipis bel e, in lako Vavi Vaambuung lung la, yik nambe sen yiyi hakôô-to.” ⁴⁸z^zOm nêêl-ambe lalipis bel lak Yesu Kalisi haale, tombe sil kataangg Pita be nando busin heey having sil vêêl e mem laah.

Pita hatulin vakasin vu hil bel-ate vu Yelusalem

11 ¹Sinaale-so osin Omaaho Bop-ate hil vaalu sen dando Yudiaa-to lango banye nambe hil vaalu sen sil-ame Yudaa-to lako Anutu-te tanasin lak, ²om Pita laah valup Yelusalem atombe Yuda pin lanêêl yi. ³a^aLanêêl nambe, “Gala vu hil sen sil-ame Yudaa-to be gaha vanôôn having sil.” ⁴Lemu Pita hatulin va pin sen hango de yii-to vu sil nambe, ⁵b^b“Sa nando monaalohak vu taaku Jopa, tonde saahe taahu taahu ti, ond saahe de vati nambe tôômb bopaata ti luus-ambe laam, ond landuuh hôôk nanyendanga yumbeyuuh, de sil taaluuhin vu baandoni be laam voon vu sa. ⁶Tombe saawiingin nambe anjak vaa-ju ni om saangget lôôt, le vahivak vaha vaha sen naale nala de nahaavak osin manak pin nando hôôk lopayo. ⁷Tombe sa hango lava ti laam vu sa nambe, ‘Pita, okandi ganyiiis vahivak-anja be gangga.’ ⁸Lemu saanêêl nambe, ‘Omaaho Bop, malis lôôt. Va nipaya osin va bamaan nambêênja ond same naha bôôy e.’ ⁹Tonde lava ango lom vu baandoni tu balon yuuh vu sa nambe, ‘Va sen Anutu samu be nivasa lak-ato, ond game ganjêênin naambe nipaya le.’ ¹⁰Omaaho Bop nêêl vakasin nambêênju balon yuuh having tu balon yaal, le mem va pin-anju lak-ambe laah baandoni. ¹¹Tonde pavis atombe saahe omaaho yaal lato daale bayêên sen hey nando hôôk-ato vinavi, ond omaaho ti nando Sisalia nêêl-ambe yaal lalaam in sa. ¹²Tombe Vavi Vaambuung nêêl vu sa nambe, ‘Gana gaving yaal de game gakam yu-yuuh e.’ Tombe halingg-aso namaavaalu vindak ti nganjo laving sa be hey ala hato omaaho sen wiing omaaho yaal lalaam in saa-to baan, ¹³le mem hatulin vu hey nambe yi de angela ti hato naale yite bayêên alo be nêêl vu nambe, ‘Gambiing hil lana gako Simon sen haale ango nambe Pitaa-to vu Jopa be lanom ¹⁴c^cin naanêêl vakasin ti vu hong, ond vakasin e dôôvu hong gaving gate hil pin.’ ¹⁵d^dTombe sa naahen naanêêl vakasin lakala,

^w 10:44 Sin 11:15; 15:8 ^x 10:46 Sin 2:4; 19:6 ^y 10:47 Sin 8:36 ^z 10:48 Sin 2:38

^a 11:3 Sin 10:28; Gal 2:12 ^b 11:5-15 Sin 10:9-48 ^c 11:14 Sin 16:31 ^d 11:15 Sin 2:4

tonde Vavi Vaambuung lakala sil, yik nambe sen lakala yiyi bôôy-ato, ¹⁶“tombe sa kangg vu Omaaho Bop-ate vakasin sen nêêl-ato nambe, ‘Jon lipis hil-ato ond lipis sil lak bel, lemu Anutu navu biing Vavi Vaambuung naas mando gaving ham.’ ¹⁷Om sen Anutu vu Vavi Vaambuung vu sil-anju, ond yik timu sen vu vu yiyi bôôy sen yaawii-having Omaaho Bop Yesu Kalisii-to, om sa vaati sen saanggilin Anutu-te mop jeen in sil?” ¹⁸“Om hil pin sen dandôô-juuto lango Pita-te vakasin-anju be lavand ma, de lako Anutu haale lak nambe, “Om Anutu hilin hil sen sil-ame Yudaa-to londpayo in nambe sil mando metumin gaving.”

Hil bel-ate vu Antiok

¹⁹“Hil sen lavuuh taale hôôk busin sen layiis Stiven-ande lawiing nindanjeen vu sil vaaluu-to, ond hil sen lavuuh taalêê-juuto vaalu lala taaku dinaandiin heey, taaku Pinisia yuuh Saiplas, de Antiok, tombe lanêêl tanasin vu hil Yuda malis, de me-lanêêl vu hil vaalu le. ²⁰Lemu hil vaalu vu Saiplas de vu Sailini ond sil latok lala Antiok, be lanêêl Omaaho Bop Yesu-te banye nivasa vu hil Glik having, ²¹“tombe Omaaho Bop-ate niwêêk nando having sil, om hil ngeeyaata lahilin londpayo be lawii-having Omaaho Bop.

²²“Lawii-having atombe hil bel-ate vu Yelusalem lango banye, tombe lawiing Banabas la Antiok. ²³“La hato le yi nambe Anutu samu sil nivasa, tombe pêêlis de kaandu sil pin lak tanasin nambe yoo londpayo niwêêk, de sil oo mosapa Omaaho Bop timu jak busin pin. ²⁴“Banabas-anju omaaho nivasa, wii-having niwêêk lôôt, de Vavi Vaambuung hôôvu yi, tombe hil ngeeyaata latu Omaaho Bop-ate hil. ²⁵“Tombe sim Banabas la Taasas in nambe salo Saul, ²⁶“tombe tovu yi om giiy-ambe yuuh lalaah Antiok, be yuuh dando having hil bel-ate vu Antiok ta ti lôôt, in yuuh davu taahu hil ngeeyaata hôôk Anutu-te tanasin. Tombe lanêêl Yesu-te hil vu Antiok nyendoos nambe hil Kalisten.

²⁷“Tombe hil sen danêêl Anutu-te vakasin langaah-ato heey vu Yelusalem-ambe lala lato Antiok, ²⁸“ond sil ti haale nambe Agabas, ond Vavi Vaambuung vêêl lu lak om kandi be nêêl vakasin langaah nambe, “Meep bopaata navu naam nohvu taaku pin.” Tombe vakasin-anjo nôôn ak hôôk busin sen Klodias tu Lom-ate omaaho lulemak-ato. ²⁹Om Yesu-te hil lanjôôy vakasin munggin nambe sil pin daasupin mone yuuh ame sen nando vu sil-ato nohvu sil namand pin, be lambu na in dôôvu Omaaho Bop-ate hil vu Yudia hôôk busin sen meep naam-ato. ³⁰“Tombe lasupin lung la, le mem lawiing Banabas ayuuh Saul lako be lala vu himbop-aso vu Yudia.

^e 11:16 Sin 1:5 ^f 11:18 Sin 13:48; 14:27 ^g 11:19 Sin 8:1-4 ^h 11:21 Sin 2:41

ⁱ 11:22 Sin 4:36 ^j 11:23 Sin 13:43; 14:22 ^k 11:24 Sin 2:41; 6:5 ^l 11:25 Sin 9:30

^m 11:26 1Pi 4:16 ⁿ 11:27 Sin 13:1; 15:32 ^o 11:28 Sin 21:10 ^p 11:30 Sin 12:25

Layiis Jems-ambe yimb de lalôôh Pita

12 ¹Busin-anju omaaho lulemak Helot nawiing nindanjeen vu hil bel-ate vaalu, ²de nêêl-ambe layiis Jems sen Jon halii-to lak yipak-ambe yimb. ³“Tonde Helot yi de hil Yuda layi nivasa om nêêl-ambe hil lalôôh Pita having. Vaa-ju lawiing hôôk busin bop busin haluusin sen hil akand navu sen Anutu haluuh hil Islel hôôk vu Ijip bôôy-ato. ⁴Lako Pita be lala latung lukala kalaambus, de lavu lukala hil ngaamong vaha-sote ahevaavu nomaayuuuh-ambe laam namaavaalu vindak tii-to namand in sil ganggin, ond sil yumbeyu-beyuuuh danggin-ambe davu taveyin. Helot aka vu nambe busin bop busin haluusin jung na le mem gako Pita naam baale hil Yuda mend in biing vakasin. ⁵“Om ahevaavu-so yoo mondanggin Pita hôôk kalaambus, lemu hil bel-ate lalohak niwêêk lôôt vu Anutu in yi.

Angela lôôh Pita vêêl hôôk kalaambus

⁶“Tombe busin ti sen Helot hatung in nambe samiinaanôn Pita na baale hil amend-ato, ond landuuh Pita lak hees aniwêêk yuuuh-ambe neep hôôk ahevaavu yuuuh lavuun hôôk busin, de ahevaavu vaalu daale mondanggin vinavi. ⁷Tonde sim Omaaho Bop-ate angela ti hato naale tombe bayêên alo melangaah lôôt. Angela patap Pita baanggesak-ande yêêvu nambe, “Okandi pavis.” Tombe hees yuuuh-anjôôto yêêhin hôôk Pita nama be tok la, ⁸tombe angela nêêl vu nambe, “Onggavêêh let osin onggatung gate suul naah.” Om Pita havêêh let-ande hatung suul laah, tonde angela nêêl vu laah nambe, “Ganjop gate lolop-ambe mem otaamuyin sa.” ⁹Tombe Pita kandi lak-ambe taamuyin angela be yuuuh lala, lemu me-lak va sen angela wiing-anjôôto ni le, de ka vu nambe yoo yi taahu taahu. ¹⁰“Yuuuh lala lato kaluuh ahevaavu ti sen nanggin vinavi nyendoos-ato, de yuuuh lala lato kaluuh vinavi ango having, tonde mem yuuuh lala lato vinavi bop voon sen daayiyi ak aen-ato, tombe vinavi tii-ju yoo hataahin malis amu in yuuuh, de yuuuh lato voon-ambe yuuuh laloh mop pasiv ti be latok lala bayêên bop, tonde angela la mema pavis. ¹¹Tombe Pita kanu lukalaah-ambe nêêl nambe, “Gêên salak ni keen nambe Omaaho Bop wiing yite angela hato vu vêêl sa vu Helot nama, osin vu va pin sen hil Yuda kand navu in nambe lambiing ak saa-to.”

¹²“Lak ni lung la le mem la Jon sen haale ango nambe Maak-ato tangganaan Malia baan. Bayêên-anju hil ngeeyaata lasupin-ambe dando mondalohak. ¹³Pita valup-ambe monayiis ak vinavi vu voon, tombe vêêh

^q 12:3 Sin 4:3 ^r 12:5 Jem 5:16 ^s 12:6 Sin 5:23 ^t 12:10 Sin 5:19 ^u 12:12 Sin 12:25; 15:37

kul ti haale nambe Loda laam in nambe gataahin vinavi, ¹⁴le hango Pita lava be lak ni tombe lopayo nivasa lôôt, om me-hataahin vinavi le, de hatup-ambe laah umakalo be nêêl vu sil nambe, “Pita valu-naale vinavi.” ¹⁵Le lanêêl vu nambe, “Galumkook wiing paya.” Le ma de nêêl niwêêk lôôt nambe, “Malis, Pita keen lôôt.” Tombe lanêêl nambe, “Ôôye, manyinju yite angelaa-ju.” ¹⁶Tonde Pita monayiis ak vinavi lôôt, om lataahin vinavi le

layi Pita tombe sim sil lavindis lôôt. ¹⁷Tombe Pita valaah nama vu sil in nambe lavand nama, tonde mem hatulin va sen Omaaho Bop giij yi vu bayêên kalaambus alo be hato laam voonto, tonde nêêl having nambe, “Ham naanêêl vaa-jo banye vu Jems, de vu halingg-aso pin.” Tonde Pita hato la voon-ambe la taaku ango.

¹⁸Tonde sim samiinaanôôn e ahevaavu-so kandi layi le ma, om sil nahand nalak lôôt-ambe danêêl nambe,

“Peey e Pita la tana?” ¹⁹Tombe Helot nêêl-ambe hil lala salo Pita le me-latovu le, om lingin ahevaavu-so sen danggin vinavii-to lôôt e ma, om nêêl atombe layiis sil-ambe layimb. Tonde Helot vu Yudia be la hato Sisalia be nando.

Helot yimb

²⁰Helot ahekalin bopaata vu hil Taia yuuh Saidon, om sil pin lavuh ti be lasupin lala vu, tombe sil samu vakasin vu Helot-ate yêêv bop Blastas sen nanggin yite bayêên-ato vêêl e, mem sil kataangg nambe omaaho lulemak Helot nyiis silanêênd vakasin jimb, in sil oo daanggo vanôôn vu omaaho lulemak-ate hil. ²¹Om Helot hatung busin ti in nambe naanêêl vakasin vu hil, tombe busin-anju vunak ak lolop lulemak-ate be lakala nando lak sia lulemak-ate, tonde mem monanêêl vakasin vu sil pin, ²²tombe hil pin lateey bopaata nambe, “Ham hil-e, manyinju anutu ti nakaas, de omaahonôôn o ma.” ²³Lemu Helot-ame hako Anutu haale lak e, om Omaaho Bop-ate angela ti yiis pavis lukalaah nyevahaan, de wiing-ambe male ya omaaho lulemak Helot-ambe yimb.

²⁴Tonde Omaaho Bop-ate tanasin tu ahépataas-ambe la lohvu taaku pin.

²⁵Banabas ayuuh Saul lako mone yuuh ame la Yelusalem lung la, tonde yuuh lako Jon sen haale ango nambe Maak-ato having-ambe yaal lalaah.

^v 12:15 Sin 26:24; Mat 18:10 ^w 12:17 Sin 13:16; 19:33; 21:40 ^x 12:18 Sin 5:22-24

^y 12:20 1King 5:11; Esi 27:17 ^z 12:23 Dan 5:20 ^a 12:24 Ais 55:11; Sin 6:7; Sin 19:20

^b 12:25 Sin 11:29-30; 12:12; 15:37

Saul ayuuh Banabas lala kul sinaale nyendoos

13 ¹ Hil sen danêêl Anutu-te vakasin langaah-ato osin kaputung-
aso dando having hil bel vu Antiok ond sil haalend-anjo,
Banabas ayuuh Simon sen danêêl nambe Valiis-ato, de Lusias vu
Sailini, de Manayen sen yuuh yêêv bop Helot unoopasiv-ande yuuh
oo dando hôôk ti bôôy-ato, de Saul. ² ^d Ond busin ti me-laya vanôôn e
de mondalohak vu Omaaho Bop, tombe Vavi Vaambuung nêêl nambe,
“Ham anggolin Banabas ayuuh Saul lana kul sen saateey yuuh bôôy
in nambe yuuh lambiing-ato.” ³ ^e Om lalakin sil in vanôôn-ande me-
laya le, de lalohak yesin laah, le mem lambe namand ak yuuh atonde
lawiing yuuh lala.

Banabas ayuuh Pol lanêêl tanasin vu hil Saiplas

⁴ ^f Tombe Vavi Vaambuung nêêl-ambe yuuh lala. Yuuh lala lato
Selusia le mem yuuh lalak sip vuu-ju be
yuuh lala nalu lavuun Saiplas. ⁵ ^g Tombe mem yuuh latok lala
Saiplas-ate bayêên ti haale nambe Salamis, tombe yuuh lanêêl
Anutu-te tanasin-ambe yuuh latup hôôk hil Yuda-te dumb pin de Jon
nahôôvu yuuh. ⁶ Yaal latup hôôk-ambe lalohvu nalu lavuun Saiplas-
anju pin, be yaal latok lala bayêên Pepos. Tombe vu manyinju yaal
latokak Yuda-te omaaho tatuhin vaha ti haale nambe Baayesu, ond
omaahôô-ju lôômb osin yaavak dangga yi, ⁷ yoo nando having yêêv
Lom ti Sesias Polas. Yêêv-anju lukook anivasa be wiingin nambe
gango Anutu-te tanasin, om teey Banabas ayuuh Saul lala vu, ⁸ ^h le
omaaho palaas Baayesu-ju danêêl haale hôôk Glik lavand nambe
Elimas, ond navu mahôôh Banabas ayuuh Saul in nawiingin nambe
gilin yêêv alo be me-biing gaving tanasin e. ⁹ Lemu Saul sen danêêl
haale ango nambe Pol-ato, ond Vavi Vaambuung hôôvu yi be me la
vu Elimas lôôt, ¹⁰ tombe nêêl nambe, “Hong Saalang noow. Vakasin
tatuhin osin va nindanje-danjeen pup hôôk galompayo, om onawiing
nindanjeen vu va nivasa pin. Naangelis e onggavuuh gate vakasin
sen onavu tatuhin ak Omaaho Bop-ato na? ¹¹ ⁱ Om onggango le, gêên-
anjo Omaaho Bop nama navu nyiis hong-ambe gamem kanu dôôk,
om peey-anjo game le gangge taaku le, de omando busin heey vêêl
e mem.” Pol nêêl nambêênju tonde Elimas amekanu hôôk pavis-
ambe navu kaatuuh hôôk, de navu salo hil in nambe sil daandiiy yi.
¹² Yêêv yi vaa-ju tombe vindis lôôt in Omaaho Bop-ate tanasin be
wii-having.

^c 13:1 Sin 11:27 ^d 13:2 Sin 9:15; Gal 1:15-16 ^e 13:3 Sin 6:6 ^f 13:4 Sin 15:39

^g 13:5 Sin 12:12; 13:13 ^h 13:8 2Ti 3:8 ⁱ 13:11 Sin 9:8

Pol ayuuh Banabas lala Antiok Pisidia

^{13j}Pol ayaal lalak sip vu Pepos-ambe lalakala taaku Pega sen neep Pampilia-te taakuu-to, tombe Jon havuuh yuuh-ande laah Yelusalem. ¹⁴De yuuh vu Pega be lala lalup Antiok sen neep Pisidia-te taakuu-to, tonde busin sawaasin atombe lahuli-lala dando hôôk dumb alo be dando. ^{15k}Tombe lango de lasevin Mose-te tanasin osin Anutu-te vakasin sen yite hil vaalu kaavuu-to lung la, le mem yêêv-aso sen danggin dumb tii-ju lanêêl vakasin la vu Pol ayuuh nambe, “Halingg ayuuh, mawiingin nambe kaandu hil jak tanasin heey ond muuh-o.”

^{16l}Tombe Pol kandi naale be valaah nama de nêêl nambe, “Ham Islel osin ham vaalu sen ham nayêênin Anutuu-to, ham gango le. ^{17m}Yiyy Islel-anjo, yate Anutu holin yate himbop-aso bôôy, be sil lala dando bamaan vu Ijip-ato ond wiing-ambe sil latu ngeeyaata, lemu vu taamusin ond yite nama niwêêk giyy sil vuu-ju be lalaah. ¹⁸ⁿLala latup hôôk taaku lumbalaamb lohvu ta doo-yuuh atombe Anutu lopayo nimeen in davu kalêêh lava lak busin pin, le ma de me-haluuh dami vu sil e. ^{19o}Nganjo yiis Kanaan-ate hil lulemak namaavaalu be vindak yuuh osin silate hil pin, de vu silate ngaanggis vu hil Islel-aso be tu silate va, tombe dando ta ngeeyaata lohvu 450 vêêl e mem. ^{20p}Anutu holin Islel-ate yêêv atombe langgin sil-ambe tok laam Samuel-ate busin, ^{21q}tonde mem sil kataangg nambe Anutu golin silate omaaho lulemak ti, om Anutu holin Kis sen pumak Benyaamin-ato ond noow Saul, be tu omaaho lulemak-ambe hanggin hil lohvu ta doo-yuuh, ^{22r}le sim Anutu lôôh yi vêêl-ande wiing-ambe Devit tu silate omaaho lulemak. Omaahôô-ja ond Anutu nêêl vakasin lak yi nambe, ‘Saahe de Jesi noow Devit lopayo having sa om le biing sate vakasin pin nôôn jak.’ ^{23s}Tombe Anutu yoo wiing lohvu sen nêêl bôôy-ato, om vu Devit-ate hil vu taamusin-ato ti Yesu laam in nambe dôôvu yiyy Islel pin. ^{24t}De bôôy Yesu me-laam-ato, ond Jon nêêl vakasin vu hil Islel pin nambe langgilin londpayo be lanjipis bel. ^{25u}Tonde ngaaho lak in Jon-ate kul jung na om nêêl nambe, ‘Ham akam navu nambe sa lati? Same omaaho sen ham nanggin yii-to le, ma. Omaaho sen navu taamuyin saa-to, ond mem. Same sa ningg vasa in nambe sa kavaayin suul na vêêl in omaahôô-ju vaha le, osin saambiing kul vaalu naambe hil kul-aso dawiiing vu silate yêêv-asôôto le.’

^{26v}“Om halingg-aso sen Abalaam-ate hil vu taamusin ham-ato, de ham vaalu sen ham nayêênin Anutu having-ato, ham gango le. Vakasin

^j 13:13 Sin 12:12; 13:5; 15:38 ^k 13:15 Sin 15:21 ^l 13:16 Sin 12:17 ^m 13:17 Eks 1:7;

6:6; 12:51 ⁿ 13:18 Eks 16:35; Nam 14:34; Diu 1:31 ^o 13:19 Diu 7:1; Jos 14:1

^p 13:20 Yêêv 2:16; 1 Sml 3:20 ^q 13:21 1 Sml 8:5,19; 1 Sml 10:20-24 ^r 13:22 1 Sml 13:14;

16:13; Saam 89:20 ^s 13:23 2 Sml 7:12-16; Ais 11:1 ^t 13:24 Mat 3:1-2

^u 13:25 Jon 1:20,27

sen Anutu nêêl nambe dôôvu yiyi-ato, ond wiing laam lung la vu yiyi,
²⁷lemu hil sen dando Yelusalem osin silate yêêv bop-aso me-lalak Yesuu-
 ju dangga ni vanuh e, de yoo dasevin Anutu-te vakasin sen hil lanêêl
 langaah bôôy-ato nalak busin sawaasin pin, le ma de me-kand vu le. De
 lawiing vakasin ak yii-to, ond lawiing Anutu-te vakasin sen hil lanêêl
 langaah bôôy-ato nôôn ak, ²⁸wde me-latokak yite vakasin keen ti in
 nambe lanyis-ambe jimb e, malis, lemu yoo lanêêl niwêêk lôôt atombe
 Pilata yis-ambe yimb malis amu. ²⁹xOm lawiing Anutu-te vakasin pin
 sen hil lanêêl langaah bôôy-ato nôôn ak lung la, le mem lalôôh ninaavi
 vêêl vu haah pako be lala lambe neep hôôk lavandangga, ³⁰lemu Anutu
 wiing-ambe kandi lak laah vu hil yimbin-ate. ³¹*Kandi lak lung la, le
 mem hil vaalu layi mend ak yi lohvu busin ngeeyaata, ond hil-anju sen
 sil laving yi vu Galili be sil ahondoosin lala lalup Yelusalem munggin-
 ato, ond hil-anju sen gêên danêêl yite banye nalohvu hil Yuda. ³²De
 hey naanêêl banye nivasa vu ham naambe vakasin sen Anutu nêêl vu
 yate himbop-aso bôôy-ato, ³³aond gêên wiing nôôn ak vu silate hil vu
 taamusin-ato yiyi, om wiing Yesu laam vu yiyi lohvu vakasin neep hôôk
 kaapiya Saam Lukook 2 nambe,

‘Sa noongg hong in gêên soo hako hong.’

³⁴bTonde Anutu wiing-ambe kandi lak vu hil yimbin-ate lung la, de
 me-le ninaavi panyek naah e, ond Anutu nêêl langaah hôôk vakasin-anjo
 nambe,

‘Vakasin keen sen saanêêl vu Devit-ato ond
 sale aambiing nôôn jak vu ham.’

³⁵cTonde vakasin boow ango neep hôôk Saam ango having nambe,
 ‘Game le gavuuu gate omaaho vaambuung-ambe ninaavi nanjip
 panyek hôôk lavandangga le.’

³⁶dDe Devit ond wiing va lohvu Anutu nêêl vu yi hôôk yite busin sen yi
 osin yite hil dando memoos vu voon-ato, tonde yimb atombe lambe neep
 having maandin-ande bundin-ambe ninaavi panyek, ³⁷lemu omaaho sen
 Anutu wiing-ambe kandi lak-ato, ond ninaavi me-panyek e.

³⁸e“Om halingg-aso, ham anjak ni naambe tanasin sen hey naanêêl
 langaah vu ham nambe Anutu le kawiiy hamate nipaya naa-to, ond
 tanasin-anjo danggakook Yesu. ³⁹fOm hamate nipaya pin sen Mose-te
 tanasin-ame lohvu nambe kawiiy naa-to, ond ti nambe lopayo na timu
 vu Yesuu-ju, ond Anutu le kawiiy yite nipaya pin na de ji yi nivasa. ⁴⁰Om
 ham ganggin ham in Anutu-te vakasin sen hil lanêêl langaah bôôy-ato
 me-naatovu ham e. Nambe,

° 13:27 Jon 16:3; Sin 3:17 ° 13:28 Mat 27:22-23 ° 13:29 Mat 27:59-60

° 13:30 Sin 2:24 ° 13:31 Sin 1:3,8 ° 13:33 Saam 2:7 ° 13:34 Ais 55:3

° 13:35 Saam 16:10; Sin 2:27 ° 13:36 Sin 2:29 ° 13:38 Sin 10:43 ° 13:39 Lom 10:4

⁴¹ ^s“Ham kalêêsin ambu-so, ham angge be ham ambindis, lemu ham e ana mem nama. In kul ti sa naawiing hôôk busin sen ham nando voon-ato, naambe sil tatekin vu ham ond ham-ame le ambiing gaving e.”

⁴² Pol nêêl vakasin lung la tonde yuuh Banabas lawiingin nambe gato lana voon, tombe hil lalaam-ambe kataangg yuuh nambe, “Yik muuh naanêêl vakasin-anjo jesin naah dôôk busin sawaasin ango taamusin vu hey.” ⁴³ ^hTonde hil pin lato lala voon, tombe hil Yuda osin hil vaalu sen dayêênin Anutu de lako Yuda-te gambum-ato, ond sil ngeeyaata sapa Pol ayuuh Banabas, tombe yuuh lanêêl tanasin osin yuuh kaandu sil niwêêk nambe yoo daapuvu Anutu-te samu samu lôôt.

⁴⁴ Tonde busin sawaasin ango tombe hil taakuu-ju pin lasupin lalaam timu lôôt in gango Anutu-te tanasin. ⁴⁵ ⁱLemu hil Yuda layi hil ngeeyaata lasupin lôôt atombe ahend anipaya vu yuuh, de sil mahôôh Pol-ambe lanêêl yi pale. ⁴⁶ ^jLe Pol ayuuh Banabas-ame layêênin e, de yuuh lanêêl nambe, “Haay aanêêl Anutu-te tanasin vu ham Yuda munggin, le ma de ham haluuh damim vu, om manyinja ham anêêl nambe ham-ame alohvu nambe mando metumin danggata le, om ham angge, gêên haay haluuh damingg vu ham-ande haay nala vu hil vaalu. ⁴⁷ ^kIn Omaaho Bop nêêl vu haay nambe,

‘Saambiing-ambe gana naatu hil vaalu sen sil-ame Yudaa-to silate kin tumin in otaato mop metumin-ate vu hil-ambe na nohvu taaku pin.’

⁴⁸ ^lOm hil vaalu sen sil-ame Yudaa-to lango vakasin-anju tombe londpayo nivasa lôôt, de lavand hôôk Anutu-te tanasin, tonde sil vaalu sen Anutu holin sil lung la in nambe sil mando metumin danggataa-to, ond lawii-having. ⁴⁹ Tombe lanêêl Omaaho Bop-ate tanasin la lohvu taakuu-ju pin. ⁵⁰ ^mLemu hil Yuda laanjiihin vêêh-aso sen haalend bop-ambe dayêênin Anutuu-to, osin yêêv bop-aso vu taakuu-jôôto, be lawiing nindanjeen vu Pol ayuuh Banabas, de latiiy yuuh in silate taaku be yuuh lala. ⁵¹ ⁿTombe yuuh tatehin kambus sen nando lak yuuh vahand-ato in taato naambe nipaya neep vu sil, tonde mem yuuh lala Ikoniam, ⁵² de Yesu-te hil vu Antiok ond yoo dando osin londpayo nivasa lôôt de Vavi Vaambuung nando having sil.

Pol ayuuh Banabas dawiiing kul vu Ikoniam

14 ¹ Tombe yik vu Ikoniam ond Pol ayuuh Banabas lalukala Yuda-te dumb alo be yuuh lawiing tanasin osin niwêêk, tombe Yuda yuuh

^s 13:41 Hab 1:5 ^h 13:43 Sin 11:23; 14:22 ⁱ 13:45 Sin 14:2 ^j 13:46 Sin 3:26; 18:6; Luk 7:30 ^k 13:47 Ais 49:6 ^l 13:48 Sin 11:18 ^m 13:50 Sin 17:4,12 ⁿ 13:51 Mat 10:14; Sin 18:6

Glik ngeeyaata lôôt lawii-having. ²°Lemu Yuda vaalu sen me-lawiihaving-ato ond laanjiihin hil vaalu sen sil-ame Yudaa-to, be sil ahend kalin lôôt vu Omaaho Bop-ate hil, ³°Lemu Pol ayuuh Banabas dandôô-ju lôôt, be yuuh oo mondanêêl Omaaho Bop-ate tanasin de yuuh-ame layêênin e. Tonde

Omaaho Bop hôôvu yuuh-ambe yuuh lawiing taahu taahu vaha vaha osin niwêêk, in nambe hil lanjak ni naambe Omaaho Bop kaandu yuuhate vakasin sen yuuh tatekin yite samu samuu-to. ⁴Tombe hil vu taakuu-ju me-londpayo lavuh ti le, om vaalu lawii-having Yuda de vaalu lawii-having sinaale yuuh. ⁵°Tombe hil vaalu sen sil-ame Yudaa-to osin hil Yuda laving silate yêêv-aso be lawiingin nambe lambiing nindanjeen vu Pol ayuuh Banabas, de lanyis yuuh ak tatuuh-ambe yuuh lanjimb. ⁶°Le yuuh lango banye om yuuh lapak-ambe lala taaku Listla yuuh Debi sen neep hôôk Likonia-te taakuu-to, de taaku vaalu sen neep ngaahôô-to having, ⁷tombe yuuh lala mondanêêl banye nivasa langaah vu taakuu-ju pin.

Yuuh lawiing kul vu taaku Listla yuuh Debi

⁸°Omaaho ti nando Listla ond tangganaan hako osin vaha nipaya, tombe vaha me-niwêêk e, de me-nala mop daka le, ⁹°ond yoo monambe nanye in vakasin sen Pol nanêêl-ato. Tombe Pol nayi lôôt e mem lak ni nambe wii-having lohvu le nivasa dôôk, ¹⁰om Pol nêêl la osin lava bopaata nambe, “Ombalaah ovaham-ande okandi baale nivasa.” Tombe sim kandi naale pavis-ambe la.

¹¹°Hil ngeeyaata layi va sen Pol wiing-anjo tombe lateey hôôk hil Likonia lavand nambe, “Anutu heey latu omaahonôôn ak-ambe lalukalaam vu yiyi.” ¹²Tombe lanêêl silate anutu voon-ate yuuh lak Banabas ayuuh Pol, ango haale nambe Sus lak Banabas, de ango haale nambe Hemis lak Pol in nambe yoo nakaas lôôt. ¹³Tombe kul vaha sen natung salivangin vu Sus hôôk yite dumb sen naale taakuu-ju nanyendangaa-to, ond hako kao moow heey osin ngaaola be hato vinavi in nambe na gaving hil-ambe lana gatung salivangin vu yuuh.

¹⁴Sinaale Banabas ayuuh Pol langoyin atombe yuuh lakweek yuuhate lolop in yuuh alondpayo nimeen lôôt, de yuuh latup-ambe lala daale dateey bopaata hôôk hil lavuunaatôôv nambe, ¹⁵°“Ham hil-e, ham navu ambiing vaatii-ja? Yik haay omaahonôôn nambe ham-anja. Lemu haay naanêêl banye nivasa vu ham in nambe ham gavuuu va malis nambêênja na, de ham anggilin ham nom vu Anutu metumin-ate sen hatung

° 14:2 Sin 13:45 ° 14:3 Mak 16:20; Sin 19:11; Hiblu 2:4 ° 14:5 Sin 14:19; 2Ti 3:11

° 14:6 Mat 10:23 ° 14:8 Jon 9:1; Sin 3:2 ° 14:9 Sin 3:4; Mat 9:28 ° 14:11 Sin 28:6

° 14:15 Sin 10:26; Saam 146:6

baandoni osin ngaanggis de lôôy having va pin sen nando hôôk-ato.
¹⁶ *Keen, vu bôôy ond hil pin oo mondawiing va lohvu sil akand de Anutu me-nêêlin e, ¹⁷ x lemu Anutu-te samu samu taato yi nambe nando keen, in navu luk vu baandoni natolak-ambe vanôôn pin nalup nivasa, osin navu vanôôn-ambe nalohvu ham pin, de nawiing-ambe ham nando osin ham alompayo nivasa.”

¹⁸ Yuuh lanêêl vakasin-anju lemu hil aniwêêk lôôt nambe gatung salivangin vu yuuh, le ma de yuuh lanêêl lôôt atombe hil-ame latung salivangin e.

Layiis Pol ak tatuuh

¹⁹ y Lung laa tonde hil Yuda vaalu vu Antiok osin Ikoniam lalup-ambe laanjihiin hil atombe layiis Pol ak tatuuh, tombe laandiiy la taaku nanyendanga in kand vu nambe yimb lung la. ²⁰ Le sim Yesu-te hil lalaam-ambe lambuuh yi tatup atombe kandi vasa hôôk-ambe laah bayêên, de samiinaanôôn atombe yuuh Banabas lala Debi. ²¹ z Yuuh lanêêl banye nivasa langaah vu taakuu-ju, tombe hil ngeeyaata latu Yesu-te hil vuu-ju vêêl e, mem yuuh lahilin vahand-ambe lalaah Listla yuuh Ikoniam-ande Antiok. ²² a Tombe yuuh kaandu Yesu-te hil niwêêk lôôt nambe, “Ham awii-having om ham oo baale niwêêk, in yaawiingin nambe yana Anutu-te taaku ond yiy baaku nimeen pin naamunggin e mem.” ²³ b Tonde yuuh laholin yêêv lohvu taaku pin in ganggin hil bel-ate, de yuuh lalakin yuuh in vanôôn-ande me-laya le de yuuh lalohak in sil, be yuuh lavu yêêv-asôônju lukala Omaaho Bop nama in londpayo la timu vu yi.

Yuuh lalaah taaku Antiok Silia yesin

²⁴ Yuuh lato Pisidia lavuunaatôôv-ambe latok lala Pampilia, ²⁵ tombe yuuh lanêêl tanasin vu Pampilia-te taaku bop Pega vêêl e mem yuuh lala lato Atelia. ²⁶ c Tombe yuuh lalak sip vu Atelia be yuuh lalaah Antiok, taakuu-ju sen bôôy sil lavu yuuh lukala Anutu nama be sil kataangg Anutu in nambe dôôvu yuuh-ambe yuuh lambiing kul-ato. Om gêên yuuh lala lawiing kul lung la de yuuh latok lalaah taakuu-ju yesin laah. ²⁷ d Tombe yuuh lasupin hil bel-ate pin, le mem yuuh latulin va pin sen Anutu hôôvu yuuh-ambe yuuh lawiing-ato vu sil, de yuuh lanêêl having nambe, “Gêên Anutu wiing-ambe hil vaalu sen sil-ame Yudaa-to lango yite tanasin-ambe lawii-having.” ²⁸ Tonde Pol ayuuh Banabas dando having sil vuu-ju lôôt.

* 14:16 Sin 17:30 x 14:17 Saam 147:8; Jer 5:24 y 14:19 Sin 17:13; 2Ko 11:25; 2Ti 3:11

z 14:21 Mat 28:19 a 14:22 Sin 11:23; 15:32; 18:23; Mat 7:14; 1Tes 3:3 b 14:23 Sin 13:3

c 14:26 Sin 13:1-2; 15:40 d 14:27 Sin 11:18; 15:4,12

Supin bop vu Yelusalem

15 ¹eOmaaheey vu Yudia lato be lanêêl tanasin vu Omaaho Bop-ate hil vu Antiok nambe, “Ham anjiinggis-ambe sil galaah ham anim naavi nohvu Mose-te gambum, le naambe nama, ond Anutu me-le gako ham jak e.” ²fLanêêl nambêênju tombe Pol ayuuh Banabas ahend kalin vu sil om sil lanêêl sil lôôt. Tombe hil bel-ate lawiing Pol ayuuh Banabas, osin sil oote hil vaalu laving-ambe lala in samu vakasin sen lanêêl sil in-anjôôto gaving sinaale-so osin himbop-aso vu Yelusalem.

³Hil bel-ate lawiing sil lala, be laloh taaku Pinisia yuuh Samaalia lavuun in danêêl banye vu sil nambe hil vaalu sen sil-ame Yudaa-to lahilin sil alondpayo, om Omaaho Bop-ate hil lango tombe londpayo nivasas lôôt. ⁴gTonde latok lala Yelusalem atombe hil bel-ate vuu-ju laving sinaale-so de himbop-aso lako sil lak, tonde mem Pol ayuuh Banabas latulin va pin sen Anutu hôôvu yuuh-ambe yuuh lawiing-ato vu sil. ⁵Lemu Palisai vaalu sen lawii-having Yesu-te tanasin-ato kandi be lanêêl nambe, “Sil galaah nind naavi de ham naanêêl vu sil naambe sil oo sapa Mose-te tanasin, ond mem Anutu gako sil jak.”

⁶Sinaale-so laving himbop-aso lasupin in nambe sil bakaas in vakasin-anju. ⁷hOm sil lakaas ngeeyaata lôôt in vakasin-anjo, tombe Pita kandi naale be nêêl vu sil nambe, “Halingg-aso-e, bôôy ond ham alak ni nambe Anutu holin sa hôôk ham lavuun in nambe sa naanêêl banye nivasas-to langaah vu hil vaalu sen sil-ame Yudaa-to, in sil gango be lambiing gaving. ⁸iDe Anutu yoo lak omaahonôn pin alondpayo ni, om vu Vavi Vaambuung vu sil, yik nambe sen vu vu yiyi-ato in taato naambe yi sil anivasa, ⁹jde me-samu yiyi-ande wiing nipaya vu sil e, malis. Yik sil alondpayo la timu vu Anutu tombe kawiiy silate nipaya la, de wiing-ambe sil alondpayo nikaapulis ak. ¹⁰kLe nambe tana sen gêên ham awiingin sahi Anutu? Mose-te tanasin nimeen bopaata sen yiyi o yate himbop-aso bôôy-ato yame aalohvu nambe baakuu-to, ond nambe tana sen ham awiingin danjingin ak Yesu-te hil? ¹¹lYaawii-having lak Omaaho Bop Yesu-te samu samu nambe Anutu le gako yiyi ana mando metumin, de hil-anju ond yik va timu.”

¹²mPita nêêl nambêênju tombe hil pin sen lasupin-anjôôto lavand ma lôôt, de mondambe nanyend in Banabas ayuuh Pol-ate vakasin, de yuuh datulin sen Anutu hôôvu yuuh-ambe yuuh lawiing taahu taahu osin niwêêk vaha vaha vu hil vaalu sen sil-ame Yudaa-to.

^e 15:1 Gal 5:2 ^f 15:2 Sin 11:30; Gal 2:1 ^g 15:4 Sin 14:27 ^h 15:7 Sin 10:1-43

ⁱ 15:8 Sin 10:44; 11:15 ^j 15:9 Sin 10:34-35 ^k 15:10 Mat 11:30; Gal 3:10; 5:1

^l 15:11 Gal 2:16; Ep 2:5-8 ^m 15:12 Sin 14:27; Gal 2:9

¹³ Yuuh lanêl lung la tonde Jems nêl nambe, “Halingg-aso, ham gango sate vakasin e. ¹⁴ Simon nêl vu ham lung la nambe hil vaalu sen sil-ame Yudaa-to, ond Anutu yoo ka vu munggin-ambe holin sil vaalu in daatu yite hil. ¹⁵ Tonde Anutu-te vakasin sen sil lanêl langaah bôôy-ato ond yik dangga timu nambe,

¹⁶ “Omaaho Bop nêl nambe, “Vu taamusin sale aanom in saambu dôk Devit-ate bayêen sen matelak-ambe la neep-ato, om sa daav va sen wiing payaa-to dukanaah, de sa samu be nivasa jak naah, ¹⁷ in nambe omaahonôn vaalu dando ond hil vaalu sen sil-ame Yudaa-to, lemu soo haalengg lak sil lung la, om sil e mosalo Omaaho Bop.” ¹⁸ Omaaho Bop sen yoo ka vu nyendoos-ambe nêl langaah-ato ond nêl nambêenja.’

¹⁹ “Ke, om sa kangg vu nambe hil vaalu sen sil-ame Yudaa-to langgilin londpayo na vu Anutu ond yame aambu nimeen vu sil e. ²⁰ Nganjok yiy kaavu kaapiya na vu sil naambe sil gavuu va sen hil datung vu anutu tatuhin vaha-sônju na, osin vêeh ayuuh moow-ame gako sil danjeen e, de me-lanja vahivak sen danggingg ka be nayimb-ato le, osin me-lanja va pin anihees e. Va yumbeyuuh-anjo sil gavuu na in nambe Yuda lanji sil nivasa, ²¹ in Mose-te tanasin ond hil dasevin vu dumb alo hôk busin sawaasin pin, de yoo danêl lohvu taaku pin vu bôôy-ambe tok laam gêen-anjo.”

Sinaale-so lawiing kaapiya la vu Kalisi-te hil vu taaku vaalu

²² Jems nêl vakasin-anju lung la, tonde sinaale-so de himbop-aso osin hil bel-ate pin layi nivasa, om laholin silate yêev Yudas de haale ango nambe Basabas yuuh Silas in nambe lambiing yuuh lana Antiok gaving Pol ayuuh Banabas. ²³ De sil kaavu kaapiya ti be lavu hôk Yudas ayuuh Silas namand, tombe kaapiyaa-ju nêl nambe, “O halingg-aso, hey sinaale-so osin himbop-aso ond hey kaavu kaapiyaa-ja laas vu ham vaalu sen ham-ame Yudaa-to, ham vu Antiok de vu Silia pin de vu Silisia. ²⁴ Ond hey hango banye nambe heyate hil vaalu lalaas-ambe lanêl silate vakasin heey, tombe wiing-ambe ham akam yu-yuuh de ham alompayo nimeen ak, lemu hey-ame aanêl-ambe sil lalaas e. ²⁵ Om sen hey hango banye ond hey pin aanjôy vakasin lung la, le mem hey aaholin omaaho yuuh-ambe hey aawiing yuuh lalaas having Banabas ayuuh Pol sen hey ahengg having yuuh lôôt-ato, ²⁶ ond yuuh-ame kand navu yuuh daka le, yuuh oo kand navu Omaaho Bop Yesu Kalisi. ²⁷ De hey aawiing Yudas ayuuh Silas lalaas-anja ond vakasin sen hey kaavu laas-anjaato yuuh oo le daanêl gaving vu ham, ²⁸ in Vavi Vaambuung vêl hey alungg

ⁿ 15:14 Sin 15:7-9 ^o 15:16-18 Emo 9:11-12 ^p 15:20 Eks 34:15-17; Jen 9:4; Lev 17:10-16

^q 15:21 Sin 13:15 ^r 15:24 Sin 15:1 ^s 15:28 Mat 23:4

ak-ambe hey aanêel lung laa-ja, de hey-ame aambu nimeen vu ham lôôt e. Yik vakasin lung laa-ja, de va sen-anjo ond yik ham samu nivasa ²⁹naambe, ham-ame angga va sen datung salivangin vu anutu tatuhin vaha-sôoto le, osin ham-ame angga va pin anihees e, de ham-ame angga vahivak sen danggingg ka be nayimb-ato le, de vêêh ayuuh moow-ame gako sil danjeen e. Ham galuuh damim vu vaa-ja ond mem nivasa. Yik heyânêengg vakasin lung laa-ja. Ham mando nivasa.”

³⁰Sil kaavu kaapiya lung la le mem lawiing-ambe sil lako be lala Antiok. Latok lala be lasupin hil bel-ate le mem lavu kaapiya vu sil, ³¹tombe lasevin kaapiyaa-ju be mem lapêêlis in vakasin anivasa sen lukaneep kaapiyaa-to. ³²“De Yudas ayuuh Silas-anju ond yuuh danêel Anutu-te vakasin ngeeyaata lôôt langaah-ambe kaandu Omaaho Bop-ate hil, ³³tonde yuuh dando Antiok busin ngeeyaata having sil vêêl e mem londpayo nivasa de lawiing yuuh lalaah vu hil Yelusalem sen lawiing yuuh lalaam-ato. ³⁴[Lemu Silas oo ka vu nambe mando Antiok om nando.] ³⁵De Pol ayuuh Banabas dando Antiok, tombe yuuh laving hil vaalu be sil davu taahu hil osin danêel Omaaho Bop-ate banye nivasa langaah.

Pol ayuuh Banabas lavuuh yuuh

³⁶Busin heey la vêêl e mem Pol nêel vu Banabas nambe, “Wanaah gatup hôök taaku pin sen wala aanêel Omaaho Bop-ate tanasin vu sil bôôy-ato, be waangge naambe hil sen lawii-having-ato dando nivasa me malis.” ³⁷Tombe Banabas wiingin nambe Jon sen haale anggo nambe Maak-ato na gaving yuuh, ³⁸le Pol nêel nambe, “Me-lohvu le, in omaahôô-ja ond bôôy havuuh hoow vu Pampilia de me-la wiing kul having hoow e, om wame gako yi le.” ³⁹Tombe yuuh kalêêh yuuh lôôt om anggo yoo la de anggo yoo la, tombe Banabas hako Maak-ambe yuuh lalak sip-ambe lala Saiplas, ⁴⁰de Pol hako Silas-ambe yuuh lala, tombe Yesu-te hil lanêel nambe, “Omaaho Bop-ate samu samu na gaving muuh.” ⁴¹Tombe yuuh datup hôök taaku Silisia yuuh Silia be davu kaandu hil bel-ate lak tanasin.

Pol hatup hôök kul tu balon yuuh

16 ¹Pol ayuuh Silas latok lala Debi osin Listla, tombe sim yuuh latokak Yesu-te omaaho ti vuu-ju haale nambe Timoti, ond tangganaan vêêh Yuda ti wii-having Yesu de mangganaan vu Glik. ²Tombe Omaaho Bop-ate hil vu Listla osin Ikoniam lanêel vu Pol nambe,

^t 15:29 Sin 15:20 ^u 15:32 Sin 11:27; 13:1; 14:22 ^v 15:37 Sin 12:12,25

^w 15:38 Sin 13:13; Kol 4:10 ^x 15:39 Sin 4:36; 13:4 ^y 15:40 Sin 14:26 ^z 16:1 Sin 14:6; 2Ti 1:5 ^a 16:2 Pil 2:19-22

“Timotii-ju omaaho nivasa.” ³ Tombe Pol wiingin nambe Timoti na gaving yi, om hako be la halaah ninaavi in nambe hil Yuda sen dandô-juuto lanjji Timoti naambe Yuda keen ti, in sil pin lalak ni nambe mangganaaname Yuda ti le. ⁴ Tonde mem yaal latup hôok bayêen ti ti be yaal lanêel tanasin sen sinaale-so himbop-aso lanjôdy lung la vu Yelusalem-ato vu Yesu-te hil pin nambe, “Yik ham oo taamuyin-anja.” ⁵ Tombe mem hil bel-ate lawii-having niwêek lôôt-ambe datu ngeeyaata nalak busin pin.

Pol yi omaaho ti vu Makedonia

⁶ Vavi Vaambuung nêêlin yaal nambe yaal-ame daanêel tanasin vu hil Esia le, om yaal lala taaku Plisia yuuh Galata. ⁷ Yaal lato ngaaho vu Misia be yaal lawiingin nambe lana Bitinia, le sim Yesu-te Vavi Vaambuung nêêlin yaal, ⁸ om yaal laloh mop Misia be latok lala Toloas. ⁹ Tonde busin atombe Pol yi taahu taahu ti, ond yi de omaaho ti vu Makedonia naale be kataangg yi nambe, “Ganjakanaam lôdy vaalu in gandôovu hey vu Makedonia.” ¹⁰ Pol yi taahu taahu-ju lung la, tonde sa having yaal-ambe hey salo mop in nambe hey ana Makedonia pavis, in hey alak ni nambe Anutu teey hey in nambe hey ana naanêel banye nivasa vu sil.

Lidia hilin lopayo

¹¹ Om sip hako hey vu Toloas-ambe la nivalok vu Samotles, tombe hey naahop-anju be heendiiy e mem hey aatok ala Niapolis, ¹² tombe sim hey hatup voon vuu-ju be hey aatok ala hil Lom-ate taaku Pilipai sen tu Makedonia-te taaku bopaataa-to, be hey nando busin heey vuu-ju. ¹³ De busin sawaasin atombe hey aaloh taaku nanyendangga be hey ala hato bel ti, in heyaambe mak taaku sen Yuda dasupin osin dalohak hôok-ato neep-anju, tombe sim hey aatokak vêeh heey lasupin-ambe dando, om hey hato nando having sil-ambe hey vakaas vu sil. ¹⁴ Tombe vêeh ti vu taaku bop Taiataila haale nambe Lidia, de yite kul nambe navu tôomb amembu be hil daanggo vu yi, ond vêeh-anju nalohak vu Anutu lak busin pin, om Omaaho Bop wiing-ambe lopayo ahelavis ak, de yoo wii-having vakasin sen Pol nanêel-ato. ¹⁵ Om lipis bel having yite hil, tonde kataangg hey-ambe nêel niwêek nambe, “Ham sahi nambe saawii-having Omaaho Bop keen ond ham andukanaam mando dôok sate bayêen.” Om hey ala nando having yi.

Latung Pol ayuuh Silas hôok kalaambus vu Pilipai

¹⁶ Busin ti hey ala in nambe ana taaku sen dalohak nandô-to, tombe vêeh kul vaha malis ti tovu hey vu mop. Vêeh-anju mamu nando having yi, om nanêel vakasin sen nôon jak vu taamusin-ato langaah, tombe

^b 16:3 Gal 2:3-5 ^c 16:4 Sin 15:23-29 ^d 16:5 Sin 2:47 ^e 16:6 Sin 18:23

^f 16:15 Sin 16:33; 18:8 ^g 16:16 Sin 19:24

hil daanggo yi om yite yêêv-aso daluh mone bopaata. ¹⁷^hOnd vêêh-anju laam-ambe navu taamuyin hey o Pol-aso, tombe nateey lôôt nambe, “Hil-anja latu Anutu baandoni-te hil kul vaha-so om danêêl Anutu-te samu samu sen gako ham jak-ato vu ham-anja.” ¹⁸ⁱVêêh-anju yoo monateey nambêênju lak busin pin tombe Pol ahekalin ak, om hilin-ambe nêêl vu mamu sen lukando vêêh-ato nambe, “Sa naanêêl vu hong jak Yesu Kalisi haale naambe onggavuuh vêêh-anja de gana.” Tombe mamu hato la in vêêh-anjuuto pavis.

¹⁹Tombe sim vêêh-anjute yêêv-aso layi nambe me-datovu mone laah e, om lalôôh Pol ayuuh Silas-ambe laandiiy yuuh lala talind vu yêêv bop-aso, ²⁰^jtombe lako yuuh lala vu yêêv-aso be lanêêl nambe, “Omaaho yuuh-anja yuuh Yuda om yuuh lawiing-ambe hil-ame dando nivasa le, ²¹yuuh danêêl vakasin lak gumbum sen me-lohvu in nambe yiyi Lom sapa hôôk-ato le.” ²²^kDe yik hil bayêên-anju lanêêl vakasin ak yuuh having, om yêêv-aso lakaah yuuhate lolop, tonde lanêêl nambe hil gaveek yuuh. ²³Om laveek yuuh lôôt, le mem latung yuuh

lukala kalaambus, de lanêêl niwêêk vu omaaho sen nanggin kalaambus-ato nambe yoo ganggin nivasa. ²⁴Tombe yêêv kalaambus hango de lanêêl niwêêk nambêênju vu yi, om la hatung yuuh la bayêên alo sen neep lavuun-ato, le mem having yuuh vahand lak haah.

²⁵Tonde la busin lavuun atombe Pol ayuuh Silas lalohak-ambe lawiing laalo vu Anutu, be kalaambus-aso pin deep dangoyin. ²⁶Tonde jemaapi bopaata ti valup pavis-ambe taapinin ak bayêên kalaambus lôôt, tombe sim pavis atombe vinavi pin hataahin osin hees aniwêêk sen sil talu kalaambus-aso lak-ato kavaayin pin. ²⁷^lTombe yêêv kalaambus kandi le yi nambe vinavi pin hataahin, tombe sim ka vu nambe mak kalaambus-aso pin lapak-ambe lala, om hatul yite yipak in nambe yoo nyiis yi be jimb, ²⁸lemu Pol teey bopaata lôôt nambe, “Êê, game ganyiiis hong e, hey pin oo nando.” ²⁹Tombe yêêv-anjuuto teey-ambe sil taalungg kin la, tonde hatup-ambe lukala bayêên kalaambus alo be la hato pataav baambu neep voon-ambe monahees hôôk Pol ayuuh Silas vahand. ³⁰^mTonde hako yuuh-ambe la voon, le mem lingin yuuh nambe, “Himbop ayuuh, saambiing vaati in nambe Anutu gako sa jak?” ³¹Le yuuh lanêêl nambe, “Galompayo na timu vu Omaaho Bop Yesu ond mem Anutu le gako hong jak gaving vanem o noom-aso.” ³²Tonde yuuh lanêêl Omaaho Bop-ate tanasin vu omaahôô-ju osin hil pin sen dando having yii-to. ³³ⁿTombe yik hôôk busin-anju omaahôô-ju hako yuuh-ambe la lipis payêês sen laveek yuuh-ato, tonde yuuh lalipis yi having yite hil pin pavis lak Yesu haale.

^h 16:17 Mak 1:24,34 ⁱ 16:18 Mak 16:17 ^j 16:20 Mak 13:9; Sin 17:6; Mat 5:11

^k 16:22 2Ko 11:25; Pil 1:30; 1Tes 2:2 ^l 16:27 Sin 12:18-19 ^m 16:30 Sin 2:37

ⁿ 16:33 Sin 16:15

³⁴Tonde hako Pol ayuuh Silas-ambe lalakala yite bayêên, be vu vanôôn-ambe yuuh laya, de having yite hil pin sen sil dando hôök bayêên tii-to be lapêêlis lôôt in lawii-having Anutu.

³⁵Tonde langaah ak atombe yêêv-aso lawiing ahevaavu heey lato be lanêêl vu yêêv kalaambus nambe, “Onggataahin vinavi in omaaho yuuh-anjaato be yuuh lana.” ³⁶Tombe yêêv kalaambus laah nêêl vakasin-anju vu Pol ayuuh Silas nambe, “Yêêv bop-aso lawiing vakasin laam nambe sa gataahin vinavi de mana, om muuh gato ana osin malompayo melaas.” ³⁷Le Pol nêêl vu ahevaavu-so nambe, “Haay-anjo haay Lom”, le yoo laveek haay lak hil pin amend, de latung haay hôök kalaambus malis amu, de me-latovu haayanêêngg vakasin ti le, ma. Le nambe tana sen davu lambiing-ambe haay gato ana kaatokin-anjo, malis lôôt. Yoo lanaam-ambe gako haay ana ond mem.”

³⁸Tombe ahevaavu-so lako vakasin-anjo be lalaah lanêêl vu yêêv bop-aso, tombe yêêv-asôônju lango nambe yuuh Lom, om layêênin lôôt. ³⁹Tombe sil lato be samu vakasin osin melaas vu yuuh vêêl e mem lako yuuh-ambe lato lala voon, tonde sil kataangg yuuh nambe yuuh gavuuu taakuu-ju de yuuh lana. ⁴⁰Om Pol ayuuh Silas lavuuh bayêên kalaambus-ande yuuh lala Lidia baan, tombe yuuh lakaas having Omaaho Bop-ate hil-ambe yuuh kaandu sil lak tanasin vêêl e mem yuuh lala.

Hil Tesalonika lawiingin nambe lanyiis Pol ayuuh Silas

17 ¹Yuuh lala mop sen la taaku Ampipolis ayuuh Apoloniaa-to be yuuh latok lala Tesalonika sen hil Yuda-te dumb ti naalêê-to. ²Tombe yik Pol wiing nambe sen yoo nawiing-ato om lukala dumb alo having sil, be sil lakaas in Anutu-te vakasin sen lukaneep kaapiyaa-to hôök busin sawaasin yaal. ³Nêêl tatekin lôôt-ambe taato vu sil nambe omaaho sen Anutu yoo holin yi vulôôt in nambe dôôvu yiyi-ato ond Anutu-te vakasin neep nambe le gako nivaane be jimb de kandi jak vu hil yimbin-ate, tonde nêêl having nambe, “Yesu sen sa naanêêl vu ham-anjo ond yi omaaho sen Anutu yoo holin yi vulôôt-ato.” ⁴Tombe hil sen lango vakasin-anjuuto vaalu lawii-having-ambe sil sapa Pol ayuuh Silas, de Glik sen kand navu Anutuu-to ond sil ngeeyaata lala sapa Pol ayuuh Silas having, tonde vêêh osin banyend ngeeyaata laving. ⁵“Lemu hil Yuda ahend anipaya, om lako hil anipaya heey sen yoo dando talind ayuuh amêê-to, be lasupin sil lavuh ti, le mem lala laanjiihin hil taakuu-ju lôôt,

° 16:37 Sin 22:25 ¢ Sinaale 16:37 Hil Lom vaalu ond sil vu Lom nivalok, de vaalu ond sil-ame Lom nivalok e. In omaaho ti wiingin nambe gako haale Lom ond baanggo jak mone bop, tonde silate gambum ango neep nambe yêêv Lom ji omaaho ti nivasa ond naanêêl haale Lom jak yi. De Pol ond yi Yuda lemu mangganaan ayuuh tangganaan lako haale Lom lung la, om Pol ond yi Lom having. Gangge Sinaale 22:27-28 ¤ 16:39 Mat 8:34
 ¤ 17:1 1Tes 2:1-2 ¤ 17:3 Luk 24:26; Sin 3:18; 9:22 ¤ 17:4 Sin 13:50 ¤ 17:5 1Tes 2:14

tombe sil pin kandi osin ahend kalin-ambe lambuuh Jeson ambaan, be sil salo Pol ayuuh Silas in nambe lanôôh yuuh-ambe gako yuuh na vu himbop-aso. ⁶Le me-latovu yuuh e, om sil laandiiy Jeson having Omaaho Bop-ate hil vaalu be lala vu kaansol-aso be lateey nambe, “Hil-anja dawiing-ambe hil vu taaku pin-ame dando nivasa le, de gêên lalaam dandôô-jo, ⁷tombe Jeson hako sil-ambe lala dando having yi. Sil pin-anju davu kalêêh yêêv bop Sisa lava, de danêêl nambe silate omaaho lulemak ango nando, haale nambe Yesu.” ⁸Tombe hil taakuu-ju pin laving kaansol-aso lango vakasin-anju, om kand yu-yuuh lôôt. ⁹Tombe lanêêl-ambe Jeson-aso laanggo kot vêêl e mem lato lala.

Pol ayuuh Silas lala taaku Belia

¹⁰Tonde busin hôôk atombe Omaaho Bop-ate hil lawiing Pol ayuuh Silas lala taaku Belia. Yuuh latok lala Belia tombe yuuh lahuli-lala hil Yuda-te dumb. ¹¹Tombe hil Yuda sen dando Beliaa-ju sil anind vasa savok hil Yuda vu Tesalonika, om lako tanasin ak pavis osin londpayo nivasa, de lak busin pin ond dasevin Anutu-te kaapiya lôôt in nambe lanjak ni naambe yuuhate vakasin la lohvu me malis. ¹²Tombe Yuda ngeeyaata lawii-having, be vêêh bop Glik ngeeyaata osin moow ngeeyaata laving. ¹³Tonde hil Yuda vu Tesalonika lango banye nambe Pol nêêl Anutu-te tanasin vu taaku Belia having, tombe sil lala laanjiihin hil ngeeyaata vu Belia, be sil kandi lak in nambe lambiing nindanjeen vu Pol-aso, ¹⁴lemu Omaaho Bop-ate hil lango banye om lawiing Pol la hato lôôy pavis, de Silas ayuuh Timoti yoo dando Belia. ¹⁵De hil sen lako Pol-ambe lalaa-to ond lako yi be lala taaku Atens, tonde sil lalaah ond lako Pol-ate vakasin laah vu Silas ayuuh Timoti nambe yuuh lana vu yi pavis.

Pol nando Atens

¹⁶Pol monanggin Silas ayuuh Timoti vu Atens, tombe sim yi le hil taakuu-ju silate anutu tatuhin vaha-so ngeeyaata lôôt, om yi vaa-ju le me-lohvu lopayo le, ¹⁷om lukala dumb alo be vakaas having hil Yuda osin hil vaalu sen kand navu Anutuu-to, de lak busin pin la nakaas having hil sen dando talind-ato. ¹⁸Tombe hil tanasin vaha ti danêêl sil nambe Epikulian, tonde hil tanasin vaha ango danêêl sil nambe Stoik, ond lakaas having Pol, de sil vaalu lanêêl nambe, “Omaaho nakaas nindanjeen-anjo wiingin nambe naanêêl vaati?” De vaalu lanêêl nambe, “Mak nanêêl vakasin ak vaheey-ate Anutu.” In Pol nêêl Yesu-te banye nivasa osin nêêl Yesu kandi lak laah-ato vu sil ondeey lanêêl nambêênju. ¹⁹Om lako Pol-ambe

° 17:6 Sin 16:20 ° 17:7 Luk 23:2; Jon 19:12 ° 17:11 Jon 5:39 ° 17:12 Sin 13:50

° 17:13 Sin 14:19 ° 17:17 Sin 18:19

lala vu kaansol-aso be lanêêl nambe, “Hey aawiingin nambe otatekin vakasin anindoos sen onanêêl vu hil-anjaato be hey gango le, ²⁰in hey hango gate vakasin-anju tombe hey sahi le ango yoow, om hey aawiingin nambe anjak danggakook ani le.” ²¹In hil Atens osin hil vaalu sen lalaam dando Atens-ato ond yoo lawiingin nambe gango vakasin mo-moos-ambe bakaas ak.

²²Om Pol la naale hôôk kaansol-aso lavuun, le mem nêêl nambe, “Ham Atens, saahe nambe ham oo nalohak vu anutu vaha vaha, ²³de sa hatup hôôk-ambe saalohvu hamate taaku pin, de saahe va sen ham nalohak vuuto, tombe saatokak alata ti sil kaavu vakasin ti neep ak nambe, ‘Manyinjo Anutu sen yiyi doosin-ato yite.’ Ke, Anutu sen ham doosin-ande ham monalohak vuu-ja ond peey-anjo sa naanêêl langaah vu ham. ²⁴^bAnutu sen hatung ngaanggis osin va pin sen nando voon-anjôôto, yik Omaaho Bop sen nanggin baandoni osin voon-ato, ond Anutuu-ju me-nando hôôk dumb sen omaahonôôn dahaav-ato le. ²⁵^cAnutuu-ju ond yoo navu metumin osin aviloos-ambe va pin vu omaahonôôn, om me-nativak in vati in nambe omaahonôôn namand biing kul vu yi le, malis. ²⁶^dDe Anutu hatung omaaho timu nyendoos le mem wiing-ambe yiyi omaahonôôn pin sen yiyi nando lohvu taaku pin-ato ond yaapumak omaaho timuu-ju, tombe Anutu hatung busin sen yiyi mandôô-to osin holin yate taaku nalu ti ti sen yiyi mandôô-to vulôôt. ²⁷^eYik Anutu wiingin nambe hil oo salo be palaahin, tombe daatovu yi, in me-nando diin in yiyi pin e. ²⁸Ond yik yii-ju sen yiyi nando moos de yiyi nala de yiyi nando. Nambe sen hamate hil laalo dangga-so lanêêl nambe, ‘Yik yaatu yite noondin having.’ ²⁹^fKe, yaatu Anutu-te noondin, om yame yakangg bu naambe Anutu ni nambe va kanu sen omaahonôôn oo kand navu be davu samu lak gool ayuuh siliva osin tatuuh-ato le. ³⁰^gIn bôôy ond omaahonôôn doosin Anutu, om va sen sil dawiiing-anjuuto ond Anutu yi mu, le sim gêên ond nêêl vu hil lohvu taaku pin nambe, ‘Ham anggilin ham alompayo.’ ³¹^hIn yoo holin yite omaaho ango in nambe gangoyin hil pin-ate vakasin-ambe naanêêl nivalok dôôk busin sen hatung lung laa-to, om omaahôô-ju Anutu wiing-ambe kandi lak laah vu hil yimbin-ate in nambe hil pin lanjak ni naambe Anutu yoo holin yi in kul-anju keen.”

³²Sil lango vakasin sen kandi lak vu hil yimbin-atêêto, tombe sil vaalu lanêêl pale, de vaaluk lanêêl nambe, “Buti le onaanêêl vakasin-anjo be hey gango jesin naah e.” ³³Lanêêl lung atonde Pol havuuh sil-ande hato be la, ³⁴tonde hil vaalu lawii-having Pol-ambe sil sapa yi, ond tik kaansol haale nambe Daionisias, de vêêh ango haale nambe Damalis, tonde yik hil vaalu having.

^b 17:24 1King 8:27; Sin 7:48 ^c 17:25 Saam 50:12; Ais 42:5 ^d 17:26 Diu 32:8

^e 17:27 Ais 55:6; Saam 145:18; Jer 23:23 ^f 17:29 Jen 1:27; Ais 40:18-20; 44:10-17;

Sin 19:26 ^g 17:30 Sin 14:16 ^h 17:31 Saam 9:8; 96:13; Sin 10:42

Pol la nando Kolint

18 ¹Pol nando Atens vêêl e mem la Kolint,
²ⁱtombe tovu Yuda ti haale nambe Akwila, baan Pontas, ond yuuh vane Plisila daahen vu Itaali be lalup, in omaaho lulemak Klodias nêêl vu hil Yuda pin nambe sil gavuuuh taaku bop Lom sen neep Itaali-te taakuu-to de lana, om yuuh lala dando Kolint. Om Pol la vu yuuh,
³^jtombe yi nambe yaalate kul sen yaal danduuuh sel bayêên-atêêto timu, om nando having yuuh-ambe yaal mondawiing kul-anju. ⁴De lohvu busin sawaasin pin ond Pol la vakaas having hil hôôk Yuda-te dumb alo, in nambe hil Yuda osin Glik lambiing gaving.

⁵^kTonde Silas ayuuh Timoti vu Makedonia be lato, le mem Pol nêêl tanasin lôôt vu hil Yuda lak busin pin nambe Yesu ond omaaho sen Anutu yoo holin yi vulôôt-ato. ⁶^lLemu sil mahôôh Pol lôôt, osin lanêêl yi pale, om tatehin kambus sen nando lak yite lolop-ato in taato silate nipaya de nêêl vu sil nambe, “Nyevahaan naatovu ham ond yoo neep vu ham, de sak malis, de peey-anjo ond sim sana vu hil vaalu sen sil-ame Yudaa-to.” ⁷Tombe Pol vu dumb-anju be lakala omaaho ti haale nambe Tisias Jastas-ate bayêên, ond omaahôô-ju ka navu Anutu, de baan nando ngaaho vu hil Yuda-te dumb. ⁸^mTombe yêêv sen nanggin dumb-ato haale nambe Klispas, having vane be noondin pin lawii-having Omaaho Bop, de hil Kolint ngeeyaata lango Pol-ate tanasin, tombe yik lawii-having-ambe lalipis bel.

⁹ⁿDe busin ti tombe Pol yi taahu taahu ti, ond yi de Omaaho Bop nêêl vu nambe, “Game ganjêênin osin game mando lavam masin e, onaanêêl lôôt, ¹⁰^oin sa nando having hong om omaaho ti me-le biing nindanjeen vu hong e, in sate hil ngeeyaata dando taakuu-ja.” ¹¹Tombe Pol nando having hil Kolint lohvu ta ti be vahaan, de yoo motaahu sil hôôk Anutu-te tanasin lôôt.

¹²Lemu Galio tu hil Akaia-te yêêv bop, tombe hôôk busin-anju hil Yuda sen dando Akaiaa-to pin ond londpayo lavuh ti in nambe lambiing nindanjeen vu Pol, om lako Pol la in biing vakasin. ¹³Tombe lanêêl nambe, “Omaahôô-ja navu taahu hil nambe lanohak vu Anutu jak tanasin ti yoow, le me-lohvu Mose-te tanasin e.” ¹⁴Tombe Pol wiingin nambe naanêêl vakasin naah, le Galio nêêl vu hil Yuda nambe, “Ham Yuda, naambe omaahôô-jo biing va nindanjeen osin biing va nipaya lôôt, ond mem lohvu nambe sa gango ham lavam, ¹⁵^ple sen ham alaam vu sa in vakasin malis amu osin haale heey de ham oote tanasin, ond

ⁱ 18:2 Lom 16:3 ^j 18:3 Sin 20:34; 1Ko 4:12 ^k 18:5 Sin 17:14-15; 9:22

^l 18:6 Sin 13:46,51; 20:26; Luk 9:5 ^m 18:8 1Ko 1:14 ⁿ 18:9 1Ko 2:3 ^o 18:10 Jos 1:9; Ais 41:10; Jer 1:8; Jon 10:16 ^p 18:15 Sin 23:29; 25:18-19; Jon 18:31

mam ham oo samu. Sak sa nimbaya nambe same gango vakasin jak va naambêênja le.” ¹⁶ Tonde luus sil-ambe lala. ¹⁷ Tombe lalôôh yêêv ti haale nambe Sotenis nanggin hil Yuda-te dumb, be layiis hôôk bayêên vinavi sen dawiiing vakasin hôôk-ato, lemu yêêv bop Galio me-nêêl vakasin ti le.

Pol tok laah Antiok Silia

¹⁸ ^qPol nando Kolint busin ngeeyaata having, le mem lôôh Omaaho Bop-ate hil namand-ande la, tombe Plisila yuuh laya Akwila lala having. Tombe vu taaku Senkia ond Pol nêêl-ambe sil laving luvalus la in jôôy vakasin ti vu Anutu, tonde mem yaal lalak sip-ambe lala in lana Silia. ¹⁹ ^rSil lala lato Epesas atombe Pol havuuh Akwila yuuh Plisila dandôô-ju, de yoo huli-la Yuda-te dumb alo be vakaas having hil Yuda. ²⁰ Tombe sim sil kataangg nambe mando busin heey gaving sil vêêl e, le Pol-ame wii-having sil lavand e, ²¹ ^som lôôh sil namand-ande nêêl vu sil nambe, “Naambe Anutu wiinggin ond sale aanom vu ham jesin naah.” Tonde lak sip vu Epesas-ambe la. ²² Latok lala Sisalia tombe Pol la valup-ambe vakaas having hil bel-ate vu Yelusalem vêêl e mem laah hato Antiok.

Pol hatup hôôk kul tu balon yaal

²³ Pol nando Antiok busin ngeeyaata le mem kandi lak vuu-ju be la hatup hôôk taaku Galata osin Plisia be navu kaandu Yesu-te hil pin.

Apolo nêêl tanasin vu Epesas

²⁴ Tombe Yuda ti vu Aleksandlia haale nambe Apolo, valu-nando Epesas ond omaaho yoo nakaas nivasa, de yoo lak Anutu-te tanasin sen neep hôôk yite kaapiyaa-to ni, ²⁵ ^tin sil taahu yi hôôk Omaaho Bop-ate mopaatôôv tombe lopayo naanjiihin yi lôôt, om yoo nanêêl osin navu taahu hil hôôk va sen Yesu wiing-ato nivalok, lemu Jon-ate belipisin timu ond lak ni. ²⁶ ^uDe nanêêl tanasin hôôk hil Yuda-te dumb alo niwêêk lôôt, tombe Plisila yuuh laya Akwila lango, om yuuh lako be la nando having yuuh, be mem yuuh tatekin Anutu-te tanasin nivasa lôôt vu yi yesin laah. ²⁷ ^vTombe Apolo wiinggin nambe na Akaia, om Omaaho Bop-ate hil vu Epesas laliinggis lung la le mem sil kaavu kaapiya la vu Yesu-te hil vu Akaia nambe sil gako Apolo jak nivasa. Om Apolo tok la Akaia tombe hil sen Anutu samu sil-ambe lawii-having yii-to ond Apolo hôôvu sil nivasa lôôt, ²⁸ ^wtonde hil Yuda sen dando Akaiaa-juuto ond sil o Apolo-so lanêêl sil in tanasin hôôk hil pin amend, tombe Apolo-te vakasin anivasa lôôt om sil-ame lalohvu le, in yoo tatekin Anutu-te vakasin sen neep

^q 18:18 Sin 21:24 ^r 18:19 Sin 17:17 ^s 18:21 Lom 1:10; 1Ko 4:19; Jem 4:15

^t 18:25 Lom 12:11; Sin 19:3 ^u 18:26 Sin 19:8 ^v 18:27 2Ko 3:1; Kol 4:10

^w 18:28 Sin 9:22; 17:3

hôök kaapiyaa-to vu sil nambe Yesu yi omaaho sen Anutu yoo holin yi vulôôt-ato.

Pol la Epesas

19 ¹*Busin sen Apolo nando Kolint-ato ond Pol vu taaku Plisia be la monaloh kandu vaalu be la hatu Epesas, tombe tovu Yesu-te hil vaalu vuu-ju, ²*tombe lingin sil nambe, “Ham awii-having-ambe Vavi Vaambuung lakala ham bôôy a?” Le lanêêl nambe, “Malis, hey-ame hango nambe Vavi Vaambuung ti nando le.” ³Tombe Pol lingin sil nambe, “De ham alipis bel lak tanasin lati?” Tombe lanêêl laah vu nambe, “Hey aalipis ak Jon-ate belipisin.” ⁴*Tombe Pol nêêl nambe, “Bôôy Jon lipis hil lak bel ond sil lahilin londpayo le mem lalipis bel, de Jon nêêl vu sil nambe lambiing gaving omaaho angos sen le taamuyin yii-to, ond omaahôô-ju yik Yesu.” ⁵Lango Pol-ate vakasin-anju tombe lalipis bel lak Omaaho Bop Yesu haale, ⁶*tonde Pol hambe nama lak sil, tombe Vavi Vaambuung lakala sil-ambe lakaas bayêên bu ti ti lavand osin lanêêl Anutu-te vakasin langaah. ⁷Hil-anju sil pin lohvu nomaayuuh-ambe laam yuuh.

⁸Tonde Pol huli-la Yuda-te dumb alo, be nanêêl tanasin niwêêk lohvu kwaav yaal, ond nanêêl langaah lôôt in nambe sil dakaas ak vakasin sen Anutu nanggîn yite hil-ato in nambe lambiing gaving. ⁹^bLemu hil vaalu londpayo niwêêk lôôt om nind baya nambe me-lambiing gaving e, om lanêêl vakasin anipaya lak Omaaho Bop-ate tanasin hôök hil pin amend, om Pol havuuh hil Yuda de supin Yesu-te hil-ambe la nakaas having sil lak busin pin vu omaaho ti haale nambe Tilanas-ate dumb kaapiya. ¹⁰^cPol wiing nambêênju lohvu ta yuuh, tombe hil Yuda osin Glik sen dando lohvu Esia-te taaku pin-ato sil pin lango Omaaho Bop-ate tanasin.

Siva noondin-ate vakasin

¹¹^dAnutu kaandu Pol-ambe wiing taahu taahu heey osin niwêêk ti yoow, ¹²^eom dako Pol-ate tôômb laasêêp-ate yuuh ame be lala datung lak hil anilakin, tombe nind vasa nalak de mamu nipaya navuuh sil-ande hatu nala. ¹³^fTonde Yuda-te hil lôômb vaalu mondatup hôök lohvu taaku pin in nambe gatiy mamu nipaya na, de sil vaalu danêêl Omaaho Bop Yesu haale in nambe gatiy mamu nipaya na in hil, de lanêêl vu mamu nipaya nambe, “Sa naanêêl niwêêk vu ham jak Yesu haale sen Pol nanêêl yite vakasin-ato naambe ham gato ana.” ¹⁴Tombe Yuda-te kul vaha sen datung salivangin-ato silate yêêv bop ti haale nambe Siva, ond

* 19:1 1Ko 3:6 ^y 19:2 Sin 2:38; 8:16; Jon 7:39 ^z 19:4 Mat 3:1-2,11 ^a 19:6 Sin 8:17;
10:44,46 ^b 19:9 2Ko 6:14-18 ^c 19:10 2Ti 1:15 ^d 19:11 Sin 14:3 ^e 19:12 Sin 5:15
^f 19:13 Mak 9:38

noow namaavaalu be vindak yuuh-ato lawiing vaa-ju, ^{15g}tombe mamu nipaya nêêl laah vu sil nambe, “Yesu ond sa lak ni, de Pol ond sa lak ni having, lemu ham-anjo vu tana?” ¹⁶Tombe omaaho sen mamu nipaya hôôvuu-to pasong-ambe la yiis sil lôôt-ambe laanggôôl sil, tombe nind naavi nihe-hees de kweek silanêênd lolop lôôt, om sil lavuuh bayêên-anju de lapak-ambe lala nind nôôn. ^{17h}Tombe Yuda osin hil Glik pin sen dando Epesas-ato lango banye be layêênin lôôt, om lako Omaaho Bop Yesu haale lak, ¹⁸de hil sen lawii-having lung laa-to, ond sil ngeeyaata dalaam-ambe dahôôl londpayo osin danêêl va pin sen dawiiing-ato langaah. ¹⁹Tonde hil palaas dangga osin hil lôômb dangga-so de hil sen dako naambôôy ayuuh amêê-to, ond lasupin silate kaapiya lôômb ayuuh ame-têêto be lasi lak kin lak hil pin amend. Kaapiya pin-anju laanggo lak mone bopaata lôôt lohvu 50 taosen siliva. ²⁰ⁱTombe Omaaho Bop-ate vakasin tu bopaata be niwêêk ak.

Hil Epesas lawiing lavand ak Pol lôôt

^{21j}Lung atonde Vavi Vaambuung vêêl Pol aka lak, om Pol aka vu nambe na gatup hôôk na Makedonia osin Akaia vêêl e mem na Yelusalem, de nêêl nambe, “Sanaa-ju vêêl e mem taamusin atombe sana Lom gaving.” ^{22k}Om wiing yite omaaho yuuh sen yuuh dahôôvu yii-to, Timoti yuuh Elastas, be yuuh lala Makedonia de Pol yoo nando Esia daka having.

^{23l}Tombe hôôk busin-anju hil lakaas ngeeyaata in Omaaho Bop-ate tanasin, om lawiing nindaandun bopaata, ^{24m}in dangga nambe omaaho ti haale nambe Demitlias, yite kul nambe navu samu va lak siliva, om yoo navu samu vêêh anutu tatuhin vaha Atemis-ate dumb kanu heey lak siliva, tombe hil daanggo vaa-ju om naluh mone bopaata be nahôôvu hil sen dawiiing kul-anjuuto. ²⁵Tonde supin yite hil osin hil vaalu sen sil pin dawiiing kul timuu-to, le mem nêêl vu sil nambe, “Ham hil-e, ham alak ni nambe yate kul-anjo ond yiyi naaluh mone bopaata lak. ²⁶ⁿDe Pol-anja ond ham ahe osin ham hango nambe navu palapin hil ngeeyaata, lemu me-wiing vu Epesas amu le, malis, wiing-ambe lohvu taaku Esia pin, de nanêêl nambe anutu sen omaahonôôn namand navu samuu-to ond me-Anutu keen e. ²⁷Tombe Pol-ate vakasin-anju navu biing-ambe yate kul-anjo haale biing paya, de yiyi-ame yoote kul timuu-jo le, malis. Navu biing-ambe hil pin lanji vêêh anutu bop Atemis-ate dumb bop naambe va malis, de navu daanggôôl yite haale bop gaving. Anutu vêêh-anju ond hil Esia pin osin hil vu taaku pin dalohak vuu-to.”

^g 19:15 Mak 1:24,34 ^h 19:17 Sin 5:5,11 ⁱ 19:20 Sin 12:24 ^j 19:21 Sin 23:11; Lom 1:13

^k 19:22 Lom 16:23; 2Ti 4:20 ^l 19:23 2Ko 1:8 ^m 19:24 Sin 16:16 ⁿ 19:26 Sin 17:29

²⁸ Sil lango vakasin-anju tombe ahend kalin bopaata lôôt-ambe lateey nambe, “Yiyy Epesas-ate anutu vêêh Atemis bopaata.” ²⁹ °Tonde hil pin lateey lôôt atombe taakuu-ju nindaandun bopaata, de sil pin latup-ambe lala taaku sen lasupin hôôk-ato, be sil lalôôh hil Makedonia yuuh, Gaias ayuuh Alistakas sen yuuh davu sapa Pol-ato, be laandiiy yuuh lala having sil. ³⁰ Tombe Pol wiingin nambe na baale hôôk hil-anju lavuun le Yesu-te hil lanêêlin, ³¹ de yêêv bop heey vu Esia sen Pol-ate nipaapu sil-ato, ond lanêêl banye la vu Pol having, de sil kataangg nambe me-dukana taaku supin-anju le. ³² Tombe hil pin-anjuuto lawiing nindaandun bopaata, om vaalu dateey vakasin ango, de vaalu dateey vakasin ango, tonde hil ngeeyaata doosin va sen lasupin lalaam-anjo danggakook. ³³ Tombe hil Yuda lakôôh silate omaaho ti haale nambe Aleksanda la naale lavuun, tombe hil vaalu lanêêl vu nambe, “Onaanêêl naambêênjo.” Om Aleksanda valaah nama in nambe sil lavand nama de naanêêl vakasin vu sil, ³⁴ lemu sil lalak ni nambe yi Yuda, om sil pin lavuh ti be lateey nambe, “Yiyy Epesas-ate anutu vêêh Atemis bopaata.” Sil mondateey nambêênjo lohvu taaku me yuuh, ³⁵ tonde silate yêêv sen navu kaavu vakasin ayuuh amêê-to naale sil lavand jeen, de nêêl nambe, “Ham Epesas, omaaho lati me-lak ni le, nambe yiyy Epesas-anjo yiyy nanggin vêêh bop Atemis-ate dumb bop osin tatuuh vaambuung sen tok vu baandonii-to? ³⁶ Omaaho ti me-le mahôôh ham in vakasin-anju le, om ham baale de ham-ame ambiing danjeen e. ³⁷ Tonde ham anggiyy omaaho yuuh-anja laam, lemu yuuh-ame lahôôndak vati hôôk dumb alo le, de yuuh-ame lanêêl yate vêêh anutuu-juuto pale le. ³⁸ De naambe Demitlias having yite kul vaha-so silate vakasin ti neep vu omaaho ti, ond busin sen lambiing vakasin-ato neep, de yêêv-aso dando, om yik sil oo lana lambiing vakasin. ³⁹ De naambe vakasin heey oo naahen neep vu ham, ond ham oo samu dôôk busin sen supin-ato nivalok. ⁴⁰ In gêên vandiisin-anjo yiyy aawiing nindanjeen om yiyy navu naatovu vakasin nyevahaan, de va sen yaawiing nindaandun-anjo danggakook keen ti me-neep e, om naambe lanjingin yiyy in danggakook ond yale naanêêl vaati?” ⁴¹ Nêêl lung la tonde luus sil-ambe lala.

Pol la Makedonia osin Glik

20 ¹ Nindaandun-anju lung la le mem Pol teey Yesu-te hil lalaam vu yi, be kaandu sil lak tanasin heey vêêl e, mem lôôh sil namand-ande la Makedonia, ² tombe yoo mokaandu hil lak tanasin vu Makedonia be la hato Glik. ³ Pol nando Glik-ambe kwaav yaal lung la, de wiingin nambe jak sip-ambe na Silia, tombe sim hango de hil Yuda lanjôôy

vakasin in nambe lanyis-ambe jimb, om ka vu nambe sapa vaha be naah osin Makedonia. ⁴Tombe Pilas noow Sopata vu taaku Belia la having

Pol, tonde omaaho yuuh vu Tesalonika, Alistakas ayuuh Sekandas, de Gaias vu taaku Debi, de Timoti, tonde Tikikas ayuuh Tolopimas vu Esia, hil-anju laving Pol-ambe lala. ⁵Tombe lamunggin-ambe mondanggin haay Pol vu Toloas. ⁶Tonde busin bop busin haluusin sen hil akand navu sen Anutu haluuh hil Islel hôök vu Ijip bôôy-ato lung la, le mem haay alak sip vu Pilipai be haay ala. Haay monala be busin namaavaalu lung la, le mem haay aatok ala Toloas vu sil, tombe hey nandôô-ju lohvu busin namaavaalu be vindak yuuh.

Pol wiing-ambe maanggêem Toloas ti kandi vasa hôök

⁷Hôök Sonda tombe hey aasupin in hey angga vanôôn osin paasa, tonde Pol monanêêl vakasin vu hil in ka vu nambe samiinaanôôn ond navu na, om monanêêl vakasin-ambe la busin lavuun ak.

⁸Tombe sil taalungg hôök lam ngeeyaata be monatum hôök bayêên alopayo ti baandoni sen hey aasupin nando lak-ato, ⁹tonde Pol oo monanêêl vakasin ahusaandiin lôôt, tombe maanggêem ti haale nambe Yutikas ond nando lak bayêên avi vu baandoni. Bayêên-anju lopayo katap yaal tombe maanggêem-anju me monayip atombe neep la, om lupake vu lopayo ti neep baandonii-to be la voon, tombe lala lalôôh ak osin me yimbin. ¹⁰Tombe Pol luus-ambe la hatô pataav-ambe neep ak maanggêem-anju, tonde kaambi de nêêl vu sil nambe, “Ham alompayo me-nimeen e, kanu nando.” ¹¹Tonde Pol lak-ambe laah bayêên alo baandoni tombe kalêêh balet-ambe ya, tonde yoo monakaas lôôt having sil, be langaah ak e mem la. ¹²De lako maanggêem-anjuuto be lala, de londpayo nivasa lak laah in nando moos.

Sil vu Toloas-ambe lalakala Mailitas

¹³Pol nêêl nambe noh voon-ambe na, de hey vaalu anjak sip-ambe naamunggin in naambe hey naatovu Pol vu taaku Asos ond hey gako jak sip vuu-ju. ¹⁴Om Pol tovu hey vuu-ju tombe hey hako lak sip-ambe hey ala Mitilini. ¹⁵Tonde hey vu Mitilini be hey monala be bus hôök, de langaah ak atombe hey ala ngaaho vu taaku Kaios, tonde hey monala be bus hôök, de langaah ak atombe hey aatok ala Semos, tonde hey monala be heendiyy e mem hey aatok ala taaku Mailitas. ¹⁶De Pol aka vu nambe me-mando busin ngeey vu Esia le, ondeey hey haluuh Epesas hôök-ande hey ala Mailitas, in yoo wiingin nambe na pavis in ji busin Pentikos vu Yelusalem.

^p 20:4 Sin 19:29; 21:29; Ep 6:21 ^q 20:7 Sin 2:42,46 ^r 20:10 1King 17:21

Pol vakaas having himbop-aso vu Epesas

17^sTombe vu Mailitas ond Pol nêêl vakasin la Epesas vu hil bel-ate himbop-aso nambe lanaam vu yi. 18^tOm sil lato be Pol nêêl vu sil nambe, “Ham oo alak ni nambe va sen saawiing nyendoos vu Esiaa-to de lohvu busin pin ond sa nando having ham. 19^uDe hil Yuda lanjôôy vakasin in nambe daanggôôl sa om nimeen osin sahisin ngeeyaata tovu sa, lemu sa laanggôôl sa haalengg, de sa naawiing Omaaho Bop-ate kul osin sa mengg luk. 20De vakasin nivasa sen samu ham-ato ond saanêêl pin, de same aavun ti in ham e, sa taahu ham vu talind-ande vu hamate bayêên alo having. 21De lak busin pin ond sa naanêêl tanasin langaah vu hil Yuda osin Glik in nambe langgilin londpayo na vu Anutu be lambiing gaving Omaaho Bop Yesu. 22^vLe gêên ond Vavi Vaambuung nêêl niwêêk om sa nala Yelusalem, tonde va sen le naatovu sa vu Yelusalem-ato ond sa doosin. 23^wSa lak ni mu nambe lohvu taaku pin ond Vavi Vaambuung nanêêl taato vu sa nambe sale aanduus kalaambus osin nimeen naatovu sa. 24^xLemu sa kangg-ame navu sa ningg naavi nambe va nivasa in nambe sa naapuvu tatin e, malis. Soo naawiingin taamuyin mopaatôôv sen sa naaloh-ato, be saambiing kul sen Omaaho Bop Yesu vu vu saa-to jung na le. Kul-anju sa naanêêl Anutu-te banye nivasa sen Anutu nawiing samu samu vu yiy-ato langaah, 25^yom ham angge, gêên sa lak ni nambe ham sen sa laas-ambe saanêêl tanasin lak Anutu nanggîn yite hil-ato langaah vu ham, ond ham pin-ame le angge sa mengg jesin naah e.

26^z“Om gêên-anjo sa naanêêl langaah vu ham naambe, ham ti nambe na menama ond me-neep vu sa le, 27^ain Anutu-te tanasin ond soo aanêêl pin vu ham, de same aavun vakasin ti le. 28^bOm ham oo ganggin ham, de ham ganggin bik sipsip pin sen Vavi Vaambuung wiing-ambe ham atu silate yêêv-ato, osin ham ganggin Anutu-te hil sen yoo vaanggo lak Noow-ate nihees-ato. 29^cIn sa lak ni nambe sa gavuuham ham-ande sana, ond voow bamaan anipaya le dukanaam ham lavuun-ambe biing nindanjeen nipaya vu Omaaho Bop-ate bik sipsip-aso lôôt. 30^dTonde hamate hil vaalu yoo le kandi be daanêêl tanasin na paya, in sil daandiiy Yesu-te hil lanaah sapa sil. 31^eOm ham amem oo naatum, de ham akam bu sen sa nando having ham lohvu ta yaal-ato ond langaah-ande busin same sawaah e, soo monaanêêl tanasin vu ham ti ti osin sa mengg luk. 32^fOm peey-anjo saambiing ham andukana Anutu nama osin yite vakasin

^s 20:17 Sin 18:21 ^t 20:18 Sin 18:19; 19:10 ^u 20:19 Sin 20:3 ^v 20:22 Sin 19:21

^w 20:23 Sin 9:16; 21:4,11 ^x 20:24 Sin 21:13; 2Ti 4:7 ^y 20:26 Sin 18:6 ^z 20:28 1Ti 4:16; 1Pi 5:2-4

^a 20:29 Mat 7:15; Jon 10:12 ^b 20:30 1; Jon 2:19 ^c 20:31 Mak 13:37; Sin 19:8,10; 1Tes 2:11

^d 20:32 Sin 26:18

samu samu in nambe ganggin ham, de lohvu nambe bu niwêêk vu ham osin bu va nivasa sen yoo hatung vu yite hil-ato vu ham. ³³eSame naawiingin hil-ate siliva yuuh gool osin tôômb ayuuh ame le, ³⁴fYik ham oo alak ni nambe sa namangg yuuh-anjo yoo wiing kul ondeey hôôvu sa in va sen saativak in-ato, de hôôvu hil vaalu sen dando having saa-to having. ³⁵gTonde sa taahu ham lôôt in nambe yaambiing kul aniwêêk naambêênjo in yaandôôvu hil anipaya. De yakangg bu vakasin sen Omaaho Bop Yesu yoo nêêl-ato nambe, ‘Yiyy gako va vu hil-ato ond yahengg anivasa jak, nganjo yaambu va vu hil ond le biing-ambe yahengg anivasa jak savok.’”

³⁶hPol nêêl vakasin-anjo lung la, tonde hatung kaatu de lohak having sil pin. ³⁷Tombe hil pin lasu tonde sil kaambi Pol-ande lamuuh gaambôôk, ³⁸i de londpayo nimeen lôôt in vakasin sen Pol nêêl nambe, “Ham-ame le angge sa mengg jesin naah e.” Lung atonde langgiy Pol la sip.

Pol lakala sip in na Yelusalem

21 ¹Hey havuuh sil-ande hey alak sip-ambe hey ala nivalok vu taaku Kos, tonde heendiyy atombe mem hey aatok ala Los, be hey haluuh Los lom-ande hey aatok ala Patala. ²Tonde sim hey aatovu sip ti nala Pinisia om hey alakalaah sip-anju be hey ala. ³Hey monala be hey aahe taaku Saiplas neep laah osin nama kêênj tombe hey haluuh lom, de hey ala be hey aatok ala Taia sen neep Silia-te taakuu-to, in sip gatung kupak mandôô-ju. ⁴jTombe hey salo Yesu-te hil vuu-ju be hey nando having sil lohvu busin namaavaalu be vindak yuuh, tonde Vavi Vaambuung vêêl sil alund ak om lanêêl vu Pol nambe me-na Yelusalem e.

⁵kHey nando be busin lung la le mem sil pin vu taakuu-ju osin vanêêndin ayuuh noondin langgiy hey ala lôôy nanyendangga, tombe hey hatung kaatu de hey aalohak. ⁶Tombe hey aalôôh hey namangg lung la le mem hey alakala sip-ande sil lalaah sil ambaand.

Agabas vu kôôvu Pol vu Sisalia

⁷Hey vu Taia be hey ala lôôt-ambe aatok ala Tolemes, be hey vakaas having Omaaho Bop-ate hil vuu-ju, de hey nando busin ti having sil.

⁸lTonde samiinaanôn atombe hey kandi vu Tolemes-ambe hey aatok ala Sisalia, tombe hey ala sinaale Pilip-ate bayêên-ambe hey nando having yi. Pilip-anju laholin yi having hil namaavaalu vindak ti, in

e **20:33** 1 Sml 12:3; 1Ko 9:11-12 f **20:34** Sin 18:3; 1Tes 2:9 g **20:35** Mat 10:8

h **20:36** Sin 21:5 i **20:38** Sin 20:25 j **21:4** Sin 20:23 k **21:5** Sin 20:36 l **21:8** Sin 6:5; 8:40

dahôôvu sinaale bop-aso munggin-ato, ⁹mde nowaavêêh yumbeyuuh dando de me-lalak moow e, ond sil danêêl Anutu-te vakasin langaah.

¹⁰"Hey nando Sisalia busin heey, tonde sim omaaho ti nanêêl Anutu-te vakasin langaah, haale nambe Agabas, ond vu Yudia be hato vu hey. ¹¹"Tombe lôôh Pol-ate let-ambe yoo duuh vaha yuuh nama de nêêl nambe, "Vavi Vaambuung nêêl nambe, 'Hil Yuda vu Yelusalem le daanduuh let mangganaan naambêênjo, be lambu yi dukana hil vaalu sen sil-ame Yudaa-to namand.' " ¹²"Hey hango vakasin-anju tombe hey having hil bayêên-anju be hey aanêêl niwêêk lôôt vu Pol nambe me-jak-ambe na Yelusalem e. ¹³"Le Pol nêêl vu hey nambe, "Nambe vaati sen ham nasu be ham nawiing sa longgpayo nimeen ak? Naambe sil talu sa me lanyis sa vu Yelusalem-ambe saanggim ak Omaaho Bop Yesu haale ond yik lung." ¹⁴Om me-wii-having hey lavangg e, tombe hey lavangg ma de hey aanêêl nambe, "Omaaho Bop oote vakasin nôôn jak."

Pol la vakaas having himbop-aso vu Yelusalem

¹⁵Busin heey lung la vêêl e mem hey hatongin heyate va yuuh ame be hey ala valup Yelusalem, ¹⁶tombe Yesu-te hil vaalu vu Sisalia lavang hey. Sil langgiy hey-ambe hey ala nando having Neson. Neson-anju vu Saipilas de yoo wii-having Yesu bôôy. ¹⁷Tonde hey aatok valup Yelusalem atombe Omaaho Bop-ate hil lako hey ak osin londpayo nivasa, ¹⁸'de samiinaanôôn atombe Pol having hey-ambe hey ala vu Jems, in sil o himbop-aso pin lasupin dandôô-ju. ¹⁹"Tombe Pol lôôh sil namand, tonde mem hatulin va pin sen Anutu wiing-ambe kul nôôn ak vu hil vaalu sen sil-ame Yudaa-to vu sil.

²⁰"Himbop-aso lango Pol-ate vakasin lung la le mem lako Anutu haale lak-ambe lanêêl vu Pol nambe, "Hali-e, gangge Yuda ngeeyaata lôôt lawii-having Yesu lung la, le yoo dapuvu Mose-te tanasin aniwêêk lôôt, ²¹"lemu sil lango nambe onanêêl tanasin vu hil Yuda vaalu sen dando hôôk hil ango-te taakuu-to nambe sil gavuu Mose-te tanasin, de sil-ame galaah noondin-aso nind naavi le, de sil-ame sapa silate gambum bôôy jesin naah e. ²²Om peey e yaambiing vaati? Keen, sil davu gango banye naambe galaam lung la, ²³om otaamuyin va sen hey navu naanêêl vu hong-anjo. Heyate hil yumbeyuuh lanjôôy vakasin

ti vu Anutu, ²⁴"om onggako sil-anju be ham samu ham nohu Mose-te tanasin nêêl-ato, tonde ombaanggo va vu sil in nambe sil gatung salivangin jak vêêl e, ond mem lohvu nambe sil daakêêl lundvalus. Gambiing naambêênja ond hil pin e lanjak ni naambe vakasin sen

^m 21:9 Sin 2:17 ⁿ 21:10 Sin 11:28 ^o 21:11 Jon 21:18; Sin 20:23; 21:33

^p 21:12 Mat 16:22 ^q 21:13 Sin 20:24 ^r 21:18 Sin 15:2,13; Gal 1:19 ^s 21:19 Sin 15:12

^t 21:20 Sin 15:1,5 ^u 21:21 Sin 16:3; Gal 2:3 ^v 21:24 Nam 6:1-21; Sin 18:18

lanêêl ak hong-ato nôôn ma, tonde lanjak ni gaving naambe goo navu sapa Mose-te tanasin pin. ²⁵ "De hil sen sil-ame Yudaa-to lemu lawii-having Omaaho Bop-ato, ond yiyi kaavu kaapiya be yaanêêl vu sil lung la in vakasin sen yaanjôôy bôôy-ato, nambe sil-ame lanja va sen datung salivangin vu anutu tatuhin vaha-sôôto le, de me-lanja va pin anihees e, de me-lanja vahivak sen hil danggingg ka be nayimb-ato le, tonde vêêh ayuuh moow-ame gako sil danjeen e."

²⁶ "Om samiinaanôôn atombe Pol hako hil yumbeyuuh-anju tombe wiing va pin sen samu ninaavii-to having sil. Wiing nambêênju tonde huli-la Anutu-te dumb bop alo be nêêl vu kul vaha sen datung salivangin-ato nambe sil mando be na gato busin ti le mem sil ti ti gatung silate salivangin.

Hil Yuda lalôôh Pol

²⁷ Tombe ngaaho lak in nambe busin namaavaalu be vindak yuuh-ato jung na in sil gatung salivangin, tombe hil Yuda vu Esia layi de Pol nando hôôk Anutu-te dumb bop alo, om laanjiihin hil pin-ambe lalôôh Pol, ²⁸ "de lateey nambe, "Ham Islel, ham andôôvu hey. Omaahôô-jo ond yi sen nanêêl tanasin lohvu taaku pin-ambe naanggôôl yate tanasin osin yiyi pin having Anutu-te dumb bop-anjo, de hako Glik heey-ambe lahuli-lalaam dumb bop alo ond yik wiing taaku vaambuung-anjo nipaya lak having."

²⁹ "Lanêêl nambêênju in sil layi Tolopimas vu Epesas nando talind bop Yelusalem having Pol, tombe kand vu nambe mak Pol giyy-ambe huli-la Anutu-te dumb bop alo having. ³⁰ Tombe hil Yelusalem-anju pin ahend kalin lôôt, om sil latup-ambe lasupin lalaam timu be lalôôh Pol, de laandiiy vu dumb alo be lala voon, tonde laayiyi vinavi sen dumb bop-anjuuto pavis.

Hil Lom-ate ngaamong vaha-so lalôôh Pol

³¹ Yoo mondayiis Pol lôôt in nambe jimb, de vakasin valup vu hil Lom ngaamong vaha-sote yêêv bop nambe hil Yelusalem pin dawiiing nindaandun bopaata. ³² Om pavis atombe hako yite hil ngaamong vaha-so heey laving yêêv ngaamong vaha-so heey, tombe latup-ambe lato vu sil. Tombe mondayiis Pol, le sim layi de hil ngaamong vaha-so laving silate yêêv bop-ambe lato, om latôômin-ambe daale. ³³ "Tonde yêêv bop ngaamong vaha-te la lôôh Pol, be nêêl nambe daanduuh Pol jak hees aniwêêk yuuh, tonde lingin sil nambe, "Latii-jo? Wiing vaati?" ³⁴ Tombe hil vaalu dateey vakasin ango de vaalu dateey vakasin ango, be dawiiing

^w 21:25 Sin 15:28-29 ^x 21:26 1Ko 9:20 ^y 21:28 Sin 6:13; Esi 44:7 ^z 21:29 Sin 20:4; 2Ti 4:20 ^a 21:33 Sin 20:23; 21:11

nindaandun bopaata, om hil ngaamong vaha-sote yêêv bop-ame nango vakasin danggakook anivasa le, om nêêl-ambe lako Pol la hil ngaamong vaha-so baand. ³⁵Lala lalup vinavi tombe hil lawiingin nambe lanyiis Pol, om ngaamong vaha-so lalôôh Pol lak baandoni be lala, ³⁶in hil ngeeyaata davu taamuyin sil-ambe dateey lôôt nambe, “Ham anyiis-ambe jimb.”

Pol nêêl yite dangga tatekin vu hil Yuda

³⁷Tombe hil ngaamong vaha-so lawiingin nambe gako Pol-ambe landukana silate bayêên alo, le Pol nêêl vu yêêv bop ngaamong vaha-te nambe, “Lohvu nambe sa naanêêl vakasin ti vu hong vêêl e?” Tombe yêêv bop-anju lingin nambe, “In onakaas Glik lavand a? ³⁸“Sa kanggu vu nambe hong Ijip ti sen bôôy gayiis ngaamong having gaaman-ato, de ohako hil ngeeyaata lohvu 4 taosen-ambe lako

yipak, de ganggiyi sil lala taaku lumbalaamb.” ³⁹Le Pol nêêl nambe, “Sak sa Yuda, de ataak hako sa neep Taasas Silisia. Sate taakuu-ju taaku bopaata ti om sa kataangg hong naambe ganjiinggis-ande sa naanêêl vakasin vu hil.” ⁴⁰Tombe yêêv bop-anju liinggis, om Pol naale lak vinavi de valaah nama lak, tombe hil pin lavand ma, le mem nêêl vakasin hôôk Yuda lavand Hiblu vu sil.

22 ¹Nêêl nambe, “Halingg-aso aamangg-aso, ham gango sate vakasin sen sa navu naanêêl vu ham-ato le.” ²Tombe hil pin lango de Pol vakaas hôôk hil Yuda lavand Hiblu vu sil om lavand ma lôôt, tonde Pol nêêl nambe, ³“Sa Yuda, ataak hako sa neep Taasas vu Silisia-te taakuu-to, lemu sa bop ak vu Yelusalem-anjo. Tombe saaluus Gamaaliel-ate dumb-ambe yoo taahu sa hôôk yate himbop bôôy-ate tanasin pin lôôt, om soo navu sapa Anutu niwêêk lôôt, yik nambe ham pin gêên-anja. ⁴“De soo monaawing nindanjeen lôôt vu Kalisi-te hil in nambe lanjimb, moow ayuuh vêêh ond sa talu sil-ambe sa nako la kalaambus. ⁵Be kul vaha sen datung salivangin-ato silate yêêv bop having kaansol-aso pin lalak ni om sil oo daanêêl gaving, in sil kaavu kaapiya vu halingg-aso vu Damaskas, de lavu be sa hako be sala Damaskas in nambe sa naanduuh sil vuu-ju, be sa gako sil lanom Yelusalem in lambu nivaane vu sil.”

Pol hatulin vakasin lak sen tu Kalisi-te hil ti

(Sinaale 9:1-19; 26:12-18)

⁶“Tombe sa monala be sala hato ngaaho vu Damaskas de taaku me laam naale lavuun, tonde pavis atombe kin bopaata ti tum vu baandoni be têêlang ak sa, ⁷tombe saalupake be sala naahop voon, tonde sa hango

^b 21:36 Luk 23:18; Sin 22:22 ^c 21:38 Sin 5:36-37 ^d 22:3 Sin 5:34; Lom 10:2

^e 22:4 Sin 8:3; 22:19

lava ti laam vu sa nambe, ‘Saul, nambe vaati sen onawiing nindanjeen vu saa-jo?’ ⁸Tombe saalingin nambe, ‘Omaaho Bop, olati?’ Le nêêl vu sa nambe, ‘Sa Yesu Nasaalet sen goo monawiing nindanjeen vu saa-jo.’ ⁹Tombe hil sen laving saa-to layi kin-anju, lemu me-lango omaaho sen vakaas vu saa-to lava nivasa le. ¹⁰Tombe saalingin nambe, ‘Omaaho Bop, sale aambiing naambe vaati peey?’ Le Omaaho Bop nêêl vu sa nambe, ‘Okandi be gana Damaskas, le mem sale naanêêl kul pin sen lak ganim lung laa-to vu hong.’ ¹¹Tonde sa mekanu hôôk in kin-anju têêlang hôôk sa mengg lôôt, om hil sen laving saa-to laliv namand hôôk sa de sil laandiy sa la Damaskas.

¹²“Tombe omaaho ti haale nambe Ananaias ond yoo samu tanasin pin, tombe Yuda pin vu Damaskas layi yi nivasa, ¹³ond hato naale having sa be nêêl nambe, ‘Hali Saul-e, gamem naatum naah.’ Tombe yik sa mengg tum pavis-ambe saahe yi. ¹⁴Le mem nêêl nambe, ‘Yate himbop-aso bôôy silate Anutu yoo holin hong in nambe ganjak yite lopayo ni, ondeey gahe Omaaho Nivalok osin ohango lava, ¹⁵de gale naanêêl yite vakasin jak va sen ohango osin gahêê-to langaah vu hil pin. ¹⁶Om onando in? Okandi be ganjipis bel de okataangg jak haale in kawiiy gate nipaya na.’

¹⁷“Tombe saalo-valup Yelusalem-ambe sa monaalohak hôôk Anutu-te dumb bop alo, tombe sim sa kanungg yi ¹⁸de Omaaho Bop nêêl vu sa nambe, ‘Opavis. Onggavuuh Yelusalem-ande gana pavis, in sil-ame le lambiing gaving vakasin sen onavu naanêêl jak saa-to le.’ ¹⁹Tombe saanêêl vu nambe, ‘Omaaho Bop, sil oo lalak ni nambe bôôy ond sa naalohvu dumb pin-ambe sa naalôôh hil sen lawii-having hong-ato, be sa natung sil hôôk kalaambus osin sa naveek sil. ²⁰De bôôy layiis Stiven sen nanêêl gate vakasin-ato be yimb, ond sa naale having-ambe saahe nivasa, osin soo monanggin hil sen layiis Stiven-ato silate lolop.’ ²¹Le Omaaho Bop nêêl vu sa nambe, ‘Gana, sa navu aambiing-ambe gana dinaandiin lôôt vu hil vaalu sen sil-ame Yudaa-to.’ ”

Pol vakaas having hil Lom-ate yêêv bop ti

²²^kHil Yuda lango Pol-ate vakasin-anju tombe lateey bopaata nambe, “Ham anyiis-ambe jimb. Hil nambêênja me-mando metumin e.” ²³Mondateey nambêênju de daate silate lolop osin daate kambus la baandoni, ²⁴om yêêv bop ngaamong vaha-te nêêl-ambe lako Pol lukala ngaamong vaha-so baand, tonde nêêl vu ngaamong vaha-so nambe sil gaveek Pol de sil gango vakasin danggakook sen lawiing nindaandun lak yii-to. ²⁵Om landuuh Pol lak hees, le Pol nêêl vu hil ngaamong vaha-sote yêêv ti sen naalêê-juuto nambe, “Ham-ame gango Lom ti-te vakasin e, de

^f 22:16 Sin 2:21; Lom 10:13 ^g 22:18 Sin 9:29-30 ^h 22:19 Sin 8:3; Sin 26:9-11

ⁱ 22:20 Sin 7:58; 8:1 ^j 22:21 Sin 9:15; 13:2 ^k 22:22 Sin 21:36 ^l 22:25 Sin 16:37

ham oo gaveek yi, ond mak lohvu^m?” ²⁶Yêêv hango vakasin-anjo tombe sim la nêêl vu ngaamong vaha-sote yêêv bop nambe, “Onavu gambiing vaati? Omaahôô-ju yi Lom.” ²⁷Tombe yêêv bop laam-ambe lingin nambe, “Onaanêêl vu sa le, hong Lom keen a?” Tombe Pol liinggis nambe, “Êê-e, keen.” ²⁸Tombe yêêv bop-anju nêêl vu nambe, “Sa vaanggo haale Lom-anjo lak mone bopaata le mem saatu Lom.” Tonde Pol nêêl vu nambe, “Lemu sak ataak hako sa be sa Lom.” ²⁹Om hil sen lawiingin nambe gango Pol-ate vakasin-ato ond sil seelin in yi pavis, tombe yêêv bop lak ni nambe Pol Lom le talu yi, om yik yêênin having. ³⁰Tonde hil ngaamong vaha-sote yêêv bop wiingin nambe gango nivasa naambe hil Yuda lanêêl nambe Pol wiing vaati paya, om samiinaanôn atombe sil kavaayin hees aniwêêk in Pol, tonde wiing vakasin la vu yêêv sen datung salivangin-ato osin kaansol-aso pin, be sil lasupin lalaam, le mem hako Pol la hato naale hôôk sil amend.

Pol la naale kaansol-aso mend

23 ¹Pol nayi kaansol-aso niwêêk lôôt le mem nêêl nambe, “Halingg-aso, sa kangg vu nambe va sen Anutu nayi nambe nivasaa-to, ond soo monaawiing vu bôôy-ambe tok laam gêên-anjo.” ²Nêêl nambêênju tombe kul vaha sen datung salivangin-ato silate yêêv bop Ananias nêêl vu hil sen daale ngaaho vu Pol-ato nambe, “Ham patap avi.” ³Tombe Pol nêêl vu nambe, “Onavu kaasiy galompaya lak va nivasa malis amu, lemu Anutu le nyiis hong. Onandôô-ja in sahi sate vakasin nohvu tanasin a? Le okalêêh tanasin de ganêêl nambe lanyiis sa.” ⁴Tombe hil sen daale ngaaho vu Pol-ato lanêêl vu nambe, “Ganêêl vakasin anipaya lak Anutu-te yêêv bop salivangin-ate in?” ⁵Le Pol nêêl laah nambe, “Halingg-aso, tanasin neep hôôk kaapiya nambe, ‘Game naanêêl vakasin anipaya jak gate yêêv-aso sen ham timuu-to le,’ lemu saambe mak kul vaha salivangin-ate me-te yêêv bop yi le, ondeey saanêêl nambêênja.”

⁶Pol lak ni nambe kaansol-asôônju sil vaalu Sadusi de vaalu Palisai, om nêêl bopaata vu sil nambe, “Halingg-aso, sa Palisai de Palisai noondin sa. Saawii-having nambe Anutu le biing-ambe hil yimbin e kandi jak naah, yik danggakook-anja sen sil lawiing vakasin vu saa-jo.” ⁷Nêêl vakasin-anjo tombe Palisai yuuh Sadusi lanêêl sil vaha-vahaan, ⁸in hil Sadusi danêêl nambe hil yimbin-ame le kandi jak e, de angela osin

^m Sinaale 22:25 Yêêv Lom ti nambe nôôh omaaho ti in nambe biing vakasin, le me-nêêl yite vakasin danggakook langaah e, ond sil talu be gaveek in nambe naanêêl langaah. Le naambe nôôh hil Lom ti ond lanêêlin nambe me-gaveek e, de gango yite vakasin amu. ⁿ 22:29 Sin 16:38 ^o 23:1 Sin 24:16 ^p 23:2 Jon 18:22-23 ^q 23:3 Mat 23:27 ^r 23:5 Eks 22:28 ^s 23:6 Sin 4:2; 24:15,21; 26:5 ^t 23:8 Mat 22:23

mamu me-nando le, lemu Palisai lawii-having va yaal-anjo. ⁹“Tombe lawiing nindaandun bopaata, om hil Palisai-te tanasin dangga-so vaalu lateey niwêêk lôôt nambe, “Hey-ame aatovu va nipaya ti vu omaahôô-ja le, mak mamu ti me angela ti nêêl vakasin vu yii-ja.” ¹⁰Tombe sil lanêêl sil bopaata lôôt, om yêêv bop ngaamong vaha-te yêênin nambe hil-anju le daandiiy Pol naah-ande nom atombe ninaavi bapuuu, om nêêl-ambe hil ngaamong vaha-so lala lavu vêêl Pol in hil-anju, de lako lukala silate bayêên alo. ¹¹“Tonde hôôk busin atombe Omaaho Bop naale having Pol be nêêl nambe, “Galompayo niwêêk in ganêêl sate vakasin langaah vu Yelusalem-anjo, tonde gale gana naanêêl langaah vu Lom gaving.”

Yuda landuuh vakasin nambe lanyiis Pol-ambe jimb

¹²Samiinaanôn atombe Yuda lasupin-ambe landuuh vakasin nambe sil-ame lanja vanôn osin daanum e, de lanyiis Pol-ambe jimb e mem. De sil lanjôôy vakasin nambe sil tatuhin ond Anutu le nyiis sil-ambe lanjimb. ¹³Tombe hil sen lanjôôy vakasin lak Pol-anjôôto sil ngeeyaata savok doo-yuuh la, ¹⁴ond sil lala vu kul vaha sen datung salivangin-ato silate yêêv-aso osin himbop-aso be lanêêl vu sil nambe, “Hey aanduuh vakasin lung la nambe hey-ame angga vanôn daka le, hey oo mando be hey aanyiis Pol jimb e mem, de hey aanjôôy vakasin nambe hey tatuhin ond Anutu le nyiis hey-ame hey aanggimb. ¹⁵“Om ham o kaansol-aso ambiing vakasin na vu yêêv bop ngaamong vaha-te naambe ham awiingin nambe ham gango Pol-ate vakasin danggakook anivasa jesin naah e, om sil gako Pol naam vu ham. De hey samu hey lung la in nambe gato mop lavuun ond hey aanyiis-ambe jimb.”

¹⁶Lung laa tonde Pol maha hango nambe hil latung dum in nambe lanyiis Pol-ambe jimb, om la valup hil ngaamong vaha-so baand-ambe lukala be nêêl vu Pol, ¹⁷tombe Pol teey yêêv ngaamong vaha ti laam-ambe nêêl vu nambe, “Onaanggiy maanggêem-anjo na vu hamate yêêv bop in wiingin nambe naanêêl vakasin ti vu yi.” ¹⁸Om yêêv hako be yuuh lala vu yêêv bop tombe nêêl nambe, “Pol sen kalaambus-ato teey sa be

kataangg nambe sa gako maanggêem-anjo naam vu hong in wiingin nambe naanêêl vakasin ti vu hong.” ¹⁹Tombe yêêv bop ngaamong vaha-têênju lôôh hôôk maanggêem nama, de laandiiy-ambe yuuh lala daale lundoos e mem lingin nambe, “Gawiingin naanêêl vaati vu sa?” ²⁰Tombe mem nêêl vu nambe, “Hil Yuda landuuh vakasin lung la nambe sil kataangg hong naambe onggako Pol na gato vu kaansol-aso jeey, ond sil davu tatuhin in nambe sil gango Pol-ate vakasin danggakook nivasa jesin naah, ²¹om gêên mondanggin hong in nambe ganjiinggis in sil lavand. Lemu game gango sil lavand e, in silate hil

“ 23:9 Sin 25:25 “ 23:11 Sin 18:9; 19:21; 27:24; 28:16,23 “ 23:15 Sin 25:3

vaalu ngeeyaata lôôt savok doo-yuuh la datung dum in nambe lanyiis Pol, de sil lanjôôy vakasin nambe me-lanja osin daanum e, de lanyiis Pol-ambe jimb e mem, de sil lanjôôy vakasin having nambe sil tatuhin ond Anutu le nyiis sil-ambe lanjimb.” ²²Tombe yêêv bop vu kôôvu nambe, “Game naanêêl vu omaaho ti naambe galaam-ambe ganêêl vakasin-anjo langaah vu sa le.” Tonde nêêl-ambe la.

Lako Pol la vu yêêv bop Piliks

²³Tombe hil ngaamong vaha-sote yêêv bop teey yite yêêv yuuhapim lalaam-ambe nêêl vu yuuh nambe, “Manggolin hil ngaamong vaha nohvu 200, de manggolin hil 70 gaving in lanjamando hôôs, de hil 200 in sil lanôôh yiyi lungg, tombe ham ana Sisalia peey busin dôôk taaku me namaavaalu be vindak yumbeyuuh. ²⁴De ham samu hôôs heey vu Pol gaving in jamando be na, tombe ham oo gako yi nivasa be ham ambu dukana yêêv bop Piliks nama.” ²⁵De yêêv bop-anju kaavu kaapiya having nambe, ²⁶“Sa Klodias Lisias kaavu kaapiyaa-jo laas vu hong omaaho osin haalem bop yêêv bop Piliks. ^{27x}Sa naanêêl vu hong naambe Yuda lalôôh omaahôô-ja be lawiingin nambe lanyiis-ambe jimb, lemu sa hango nambe yi Lom om sa having hil ngaamong vaha-so be hey ala aavu vêêl yi hôôk sil namand. ^{28y}Tombe saawiingin nambe gango yite vakasin danggakook sen sil lanêêl lak yii-to, om sa hako la hato vu silate kaansol-aso. ^{29z}Tombe saahe le sil akand vu vakasin lak sil oote tanasin vaalu, om sil lanêêl vakasin lak yi, de same aatokak vakasin ti neep in nambe yaanyiis-ambe jimb e, me yiyi gatung hôôk kalaambus e. ^{30a}Tonde sim vakasin ti valu-vu sa nambe landuuh vakasin kaatokin nambe lanyiis omaahôô-ja be jimb, om saawiing laas vu hong pavis, de saanêêl vu hil sen sil lanêêl vakasin ak yii-to nambe sil oo lanaas daanêêl vakasin sen lanêêl lak yii-to vu hong. Yik vakasin lung laa-ja.”

³¹Tombe hil ngaamong vaha-so lango vakasin om lako Pol-ambe lala hôôk busin, tombe latok lala Antipatlis. ³²Tonde samiinaanôôn atombe hil ngaamong vaha-so lalaah sil ambaand, de hil sen dando lak hôôs-ato ond yoo lako Pol-ambe lala. ³³Tombe latok lala Sisalia be lavu kaapiya vu yêêv bop tonde lako Pol la vu. ³⁴Tombe yêêv bop sevin kaapiya le mem lingin Pol nambe, “Hong vu tana?” Le Pol nêêl nambe, “Sa vu Silisia.” ³⁵Tombe yêêv bop nêêl nambe, “Hil sen danêêl vakasin ak hong-ato balup e mem sa gango gate vakasin.” Tonde nêêl-ambe sil oo mondanggin Pol nando hôôk Helot-ate bayêên.

Yêêv bop Piliks nangoyin Pol-ate vakasin

24 ¹Busin namaavaalu lung la vêêl e mem kul vaha sen datung salivangin-ato silate yêêv bop Ananias having himbop-aso

* 23:27 Sin 21:30-33; 22:25-27 y 23:28 Sin 22:30 z 23:29 Sin 18:14-15

a 23:30 Sin 24:5-8

be lato, de sil ti haale nambe Tetaalas ond yoo yite kul nambe naanêel hil-ate vakasin vu yêêv gaaman-aso, ond lala lato tombe latulin vakasin sen lawiingin nambe daanêel lak Pol-ato vu yêêv bop. ²Yêêv bop teey Pol-ambe laam e mem Tetaalas nêel vakasin lak Pol nambe, “O himbop Piliks, goo nahôovu hey om hey nando nivasa lôôt de ngaamong ayuuh ame ma, de hong omaaho galumkook bop om ohatongin va pin sen bôôy wiing paya lohvu taaku pin-ato. ³Om hey aahe va sen gawiing-anja be hey alonggpayo nivasa lôôt lak busin pin. ⁴Le same aanggilin hong lôôt e, yik sa kataangg hong naambe hong omaaho nivasa om onggango heyânêengg vakasin boow dakaajo. ⁵^bIn hey aahe de omaahôô-ja nipaya de naanjiihin hil Yuda lohvu taaku pin-ambe me-dando nivasa le, de tu tanasin vaha ti sen danêel sil nambe Nasaale-ato ond silate lukook bop ti. ⁶Tombe wiingin nambe biing-ambe Anutu-te dumb bop anipaya jak om hey aalôôh yi, [de hey aawiingin sahi yite vakasin jak heyate tanasin, ⁷lemu yêêv bop ngaamong vaha-te Lisias valu-handu hey-ande vu vêel omaahôô-ju pavis in hey, de hako be la, ⁸de nêel nambe hil sen lawiing vakasin ak yii-to ond lanaam vu hong.] Om goo ganjingin omaahôô-ja lôôt, le mem yoo le naanêel va pin sen hey aawiing vakasin vu yii-jôôto vu hong.” ⁹Tombe yik hil Yuda lahôovu Tetaalas om lanêel vakasin lak Pol having nambe, “Vakasin pin-anja keen lôôt.”

Pol hatulin yite vakasin vu Piliks

¹⁰Om yêêv bop vêel ka lak vu Pol, tombe Pol nêel nambe, “Sa lak ni nambe goo monangoyin hil-anjote vakasin vu bôôy-ambe tok laam gêên-anjo, om sa longgpayo nivasa be sa naanêel sate vakasin vu hong. ¹¹^dDe naambe ganjingin hil ond le daanêel naambe sa valup Yelusalem in nambe saanohak ond gêên lohvu busin nomaayuuh-ambe laam yuuh lung laa-jo, ¹²de same naanêel omaaho ti hôôk Anutu-te dumb bop alo be hil Yuda latokak sa le, de same naanjiihin hil vu dumb vaalu lopayo me vu talind in nambe sil ahend kalin e, ¹³de vakasin sen lawiing vu sa gêên-anjo ond sil-ame lalohvu nambe daanêel vakasin nôôn keen ti vu hong e, nôôn ma. ¹⁴^eLemu sa naanêel vakasin-anjo danggakook ti langaah vu hong naambe, sa naalohak vu hey o himbop bôôy-asote Anutu lak tanasin sen hil-anja lanêel

nambe tanasin vaha ti yoow-ato, de saawii-having Mose-te tanasin pin osin Anutu-te vakasin sen yite hil vaalu kaavu langaah-ambe neep hôôk kaapiyaa-to having. ¹⁵^fDe saawii-having, yik nambe sen hil-anja, nambe Anutu le biing-ambe hil yimbin kandi jak, hil anivalok osin hil anipaya pin le kandi jak, ¹⁶^gondeey soo monaawiing niwêek in nambe sa longgpayo

^b 24:5 Sin 17:6 ^c 24:6 Sin 21:28-30 ^d 24:11 Sin 21:17 ^e 24:14 Sin 24:5

^f 24:15 Jon 5:28-29 ^g 24:16 Sin 23:1

yoo nanjip nivasa dôôk Anutu osin omaahonôôn amend jak busin pin. ^{17h}Tonde sala nando ta heey vu bayêên vaalu, de saalo-valup Yelusalem ond sa hako mone yuuh ame having in dôôvu hil Yuda sen dativak in va yuuh amêê-to, osin sala hatung salivangin vu Anutu. ¹⁸ⁱDe sa samu sa be sa nando hôôk Anutu-te dumb bop alo tombe sil latovu sa, de vaheey-ame dando having sa le, de vaheey-ame dawiiing nindaandun e. ¹⁹Lemu hil Yuda heey oo vu Esia be lalup atombe lalôôh sa, om naambe hil-anju silate vakasin ti neep vu sa ond sil oo lanaam baale hôôk gamem-ambe daanêêl vu sa ond mem nivasa. ²⁰Le naambe malis ond hil sen daalêê-jo latokak nambe sanêêngg vakasin ti neep sen sa naale hôôk kaansol-aso mend-ato nambe saawiiing vati paya, ond yoo daanêêl vu hong. ^{21j}Mak vakasin timu sen sa naale hôôk sil amend-ambe saateey vu sil bôôy-anjuuto, nambe saawii-having nambe Anutu le biing-ambe hil yimbin e kandi jak naah, yik danggakook-anja sen gêên lawiing vakasin vu saa-jo.”

^{22k}Tombe yêêv bop Piliks lak vakasin sen Omaaho Bop-ate hil lawii-having-anju danggakook ani om nêêl vu hil Yuda nambe, “Ham ganggin-ande yêêv bop ngaamong vaha-te Lisias gato le mem sale gango hamate vakasin-anja be sa naanêêl.” ^{23l}Tonde nêêl vu hil ngaamong vaha-sote yêêv nambe, “Ongganggin Pol, lemu game gambu teenin yi lôôt e, de yite hil lawiingin nambe landôôvu yi in va yuuh ame, ond game naanêêlin e.”

Piliks vu teenin Pol lohvu ta yuuh

²⁴Busin heey lung la vêêl e mem Piliks ayuuh vane Dalusila lato, vêêh-anju yi Yuda. Tombe Piliks teey Pol laam-ambe hango de Pol tatekin Yesu Kalisi-te danggakook sen lawii-having yii-to vu yi, ^{25m}tonde nêêl vakasin nambe yaambiing va na nivalok, de yiyi ganggin yiyi vu va nipaya, tonde Anutu le gangoyin yate vakasin vu taamusin. Pol nêêl nambêênjo tombe Piliks yêênin lôôt, om nêêl nambe, “Gana le, de sa naatovu busin ti le mem sa naateey hong jesin naah.” ²⁶Tonde Piliks yoo ka monavu nambe Pol e bu mone heey vu in nyiis yite vakasin jimb, om nanêêl-ambe Pol la nakaas having yi.

²⁷ⁿTonde ta yuuh la lung la tombe Posias Pestas hako kul lak lukalaah Piliks ahembaan, de Piliks wiingin nambe hil Yuda lanji yi nivasa, om me-teey Pol-ambe hatu la le, yoo vu teenin Pol-ambe nando de la.

Pol nêêl nambe Sisa gango yite vakasin

25 ¹Pestas hako yite kul yêêv ak-ambe nando lohvu busin yaal vêêl e mem vu Sisalia be la valup Yelusalem. ^{2o}Tombe kul vaha sen datung salivangin-ato silate yêêv-aso osin hil Yuda-te himbop-aso lala vu yi,

^h 24:17 Lom 15:25-26; Gal 2:10 ⁱ 24:18 Sin 21:26-27 ^j 24:21 Sin 23:6

^k 24:22 Sin 23:26 ^l 24:23 Sin 27:3; 28:16,30 ^m 24:25 Jon 16:8 ⁿ 24:27 Sin 25:9

^o 25:2 Sin 24:1; 25:15

be sil latulin vakasin sen sil layi Pol payaa-to, de sil kataangg niwêêk lôôt nambe, ^{3p}“Gandôôvu hey-ambe gambiing omaahôô-ju naam Yelusalem vu hey.” Lanêêl nambêênju in kand vu nambe Pol naam atonde langgôôpis-ambe lanyiis vu mop lavuun-ambe jimb. ⁴Tombe Pestas nêêl laah vu sil nambe, “Sil mondanggin Pol nando Sisalia, de sa mando daka vêêl e mem sa naah-anju, ⁵om hamate yêêv-aso gaving sa be hey aanduus-ambe hey ana, le mem naambe yinêên nipaya ti neep ond lambiing vakasin vu yi.”

⁶Pestas nando busin namaavaalu be vindak yaal me mak busin nomaayuu lung la le mem laah hatô Sisalia, de samiinaanôôn atombe lakala nando bayêên sen dawiiing vakasin hôôk-ato, de nêêl-ambe lako Pol laam. ^{7q}Tombe Pol la hatô le mem hil Yuda sen sil vu Yelusalem-ambe lala latôô-juuto, ond sil lambuuh Pol tatup-ambe lawiing vakasin animeen ngeeyaata lak Pol, lemu me-latokak vakasin danggakook keen ti le, ⁸om Pol nêêl nambe, “Same naanêêl vakasin ti paya lak hil Yuda-te tanasin, me lak Anutu-te dumb bop, me lak Lom-ate yêêv bop Sisa having e, malis.” ^{9r}Tombe Pestas wiingin nambe hil Yuda lanji yi nivasa om lingin Pol nambe, “De gawiingin nambe gana balup Yelusalem in sa gango gate vakasin vuu-ju?” ¹⁰Le Pol nêêl nambe, “Sa naale hôôk Sisa-te yêêv bop hong gamem-anjo, om saambiing vakasin mandôô-jo ond mem lohvu, de goo galak ni lung la nambe same aawiing va nipaya ti vu hil Yuda le. ¹¹Om naambe sanêêngg nipaya ti neep de saawiing va nipaya ti lohvu lanyiis sa be saanggimb, ond same aawiingin nambe napak e. Le naambe vakasin sen lawiing vu saa-jo me-nôôn keen e, ond omaaho ti me-lohvu nambe bu sa dukana sil namand e, om saawiingin Sisa gango sate vakasin.” ¹²Tombe Pestas vakaas having yite yêêv-aso vêêl e mem nêêl vu Pol nambe, “Ganêêl nambe Sisa gango gate vakasin, om lung-ande gale gana vu Sisa.”

Pestas nêêl Pol-ate vakasin vu Aglipa

¹³Busin heey la vêêl e mem Yuda-te omaaho lulemak Aglipa yuuu vanga Benaisi lato Sisalia in nambe lanji Pestas, ^{14t}tombe yuuu dandôô-ju busin ngeeyaata,

om Pestas nêêl Pol-ate vakasin vu omaaho lulemak Aglipa nambe, “Piliks vu teenin omaaho ti be yoo nando bôôy-ande la, ^{15t}de sala nando Yelusalem bôôy-ato ond kul vaha sen datung salivangin-ato silate yêêv-aso osin hil Yuda-te himbop-aso lawiing vakasin lak yi, de lanêêl vu sa nambe sa naanêêl-ande hil lanyiis-ambe jimb, ¹⁶lemu saanêêl laah vu sil nambe, ‘Hey Lom-ate gambum nambe hey-ame aambu omaaho ti dukana

^p 25:3 Sin 23:15 ^q 25:7 Sin 24:5-6,13 ^r 25:9 Sin 24:27 ^s 25:14 Sin 24:27

^t 25:15 Sin 25:1-2

hil namand malis e. Omaaho ti sen hil lanêel nambe wiing vati payaa-to, ond yoo baale hil sen lawiing vakasin vu yii-to mend, le

mem yoo naanêel yite vakasin gaving.’ ¹⁷Tombe hil-anja laving sa be lalaam, le same hanggin e, yik samiinaanôn atombe sa lakala nando lak bayêen sen dawiiing vakasin hôôk-ato, tonde saanêel-ambe lako Pol laam. ¹⁸”Tombe hil-anja daale be lawiing vakasin vu yi, tombe sa kangg vu nambe davu daanêel naambe wiing va nipaya heey, ¹⁹le ma de sil oo lanêel vakasin lak sil oote tanasin sen davu sapa Anutuu-to, tonde vakasin ango lak omaaho ti yimb, haale nambe Yesu, ond Pol nanêel nambe omaahôô-ju nando metumin gêen. ²⁰”Tombe sa hangoyin Pol-ate vakasin, le sa doosin danggakook lôôt om saalingin yi nambe, ‘De gawiingin nambe gana balup Yelusalem e mem sa gango gate vakasin-anjo vuu-ju?’ ²¹Lemu Pol nêel nambe ahevaavu-so yoo mongganggin yi mandôô-jo in wiingin nambe Sisa gango yite vakasin, om saanêel nambe sil ganggin yi vêel e mem sale aambiing na vu Sisa.” ²²Tombe Aglipa nêel vu Pestas nambe, “Soo aawiingin nambe gango omaahôô-ju naanêel yite vakasin.” Tombe Pestas nêel nambe, “Jeey e mem ongango.”

²³”Om samiinaanôn atombe Aglipa yuuh Benaisi lalaam osin vunakin amengali ngeeyaata lôôt, be yuuh lahuli-lala bayêen sen dawiiing vakasin hôôk-ato lopayo having yêev bop ngaamong vaha-so heey, tonde himbop bayêen dangga-so heey laving, le mem Pestas nêel-ambe lako Pol laam, ²⁴*tombe Pestas nêel nambe, “O omaaho lulemak Aglipa, de ham pin sen ham nando having hey-anjo, ham angge omaahôô-ja, ond hil Yuda pin vu Yelusalem, de vuu-jo having, ond lalaam vu sa be lateey niwêek lôôt nambe me-mando metumin e, ²⁵lemu saahe de me-wiing vati paya lohvu nambe jimb e. Nganjo yoo nêel nambe Sisa gango yite vakasin ondeey saanêel lung la nambe saambiing-ambe na vu Sisa, ²⁶lemu same aatokak yite vakasin ti neep langaah in nambe sa kaavu kaapiya na vu yate himbop Sisa le. Om omaaho lulemak Aglipa, saanggiy omaahôô-jo laam vu hong, de ham pin sen-anjo having, in nambe yiy gango yite vakasin nivasa be yiy naatokak yite vakasin heey, le mem sa kaavu hôôk kaapiya. ²⁷In nambe saambiing kalaambus ti na vu Sisa, le same aambiing vakasin sen lawiing ak yii-to na gaving e, ond manyinjo sa sahi le me-lohvu le.”

Pol tatekin yite vakasin vu Aglipa

26 ¹Tombe Aglipa nêel vu Pol nambe, “Om hong-o, onaanêel gate vakasin.” Tombe Pol nama lak-ande nêel nambe, ²“O omaaho lulemak Aglipa, sa longgpayo nivasa lôôt in sa navu tatekin sate vakasin vu hong peey jak va pin sen hil Yuda lawiing vakasin lak saa-to, ³in goo

” 25:18-19 Sin 18:15 † 25:20-21 Sin 25:9-12 * 25:23 Mat 10:18; Mak 13:9

* 25:24 Sin 22:22; 25:2,7

galak Yuda-te gambum ani lung la, osin vakasin pin sen hey naanêêl hey in-ato, om sa kataangg hong naambe onggango sate vakasin lôôt de game ganimtambo jak pavis e.

4“De sa naanêêl vu hong naambe, hil Yuda pin lalak ni nambe vu bôôy sen sa unoopasiv-ato be tok laam gêên-anjo, ond sa nando having sate hil osin sa nando Yelusalem, ⁵om naambe hil Yuda lanji nivasa ond sil oo kaandu sate vakasin gaving, in lalak ni nambe soo navu sapa hey Palisai-te gambum aniwêêk lôôt savok Yuda-te gambum vaalu la. ⁶De gêên lawiing vakasin vu sa be sa laam naalêê-jo, ond danggakook nambe saawii-having-ambe sa nanggin vakasin anivasa sen Anutu jôôy lung la vu yate himbop-aso bôôy-ato nambe nôôn jak. ⁷De yate himbop-aso bôôy dangga nomaayuh-ambe laam yuuh oo mondalohak vu Anutu niwêêk lôôt hôök busin-ande langaah, de lawii-having-ambe danggin vakasin timuu-ju in nambe daatovu nôôn, tombe yik sa having. O omaaho lulemak, saawii-having-ambe sa nanggin vakasin-anju, ond danggakook-anju sen hil Yuda lawiing vakasin lak saa-jo. ⁸Le nambe vaati sen ham vaalu kam vu nambe yame aambiing gaving naambe Anutu me-le biing-ambe hil yimbin kandi jak e?

9“Tonde bôôy sa kangg oo vu nambe sa daanggôôl Yesu Nasalet haale ond mem nivasa, ¹⁰om sa laanggôôl haale vu Yelusalem, de kul vaha sen datung salivangin-ato silate yêêv-aso lanêêl nambe saambiing vaa-jo jak sil haalend, om saanduuh Anutu-te hil ngeeyaata lôôt-ambe sa hatung sil hôök kalaambus, de lanjôôy silate vakasin in nambe lanyiis Anutu-te hil-anju be lanjimb, ond yik sa having. ¹¹De lak busin pin saavu nimeen vu sil hôök dumb pin, tonde sa haanjiihin sil in nambe daanêêl Omaaho Bop pale, de sahengg kalin bopaata lôôt vu sil om sala aawiing nindanjeen vu sil vu taaku vaalu sen neep diin-ato having.”

Pol hatulin vakasin lak sen tu Kalisi-te hil ti

(Sinaale 9:3-19; 22:6-16)

¹²“Om sa hako kaapiya be sala Damaskas lak yêêv-aso salivangin-ate haalend. ¹³O omaaho lulemak, sa monala mopaatôôv tonde taaku me laam naale lavuun, tombe saahe kin ti vu baandoni be laam têêlang lôôt kaluuh taaku me, ond têêlang ak sa osin hil sen laving saa-to, ¹⁴tombe hey pin aalupake be ala naahop voon. Tonde sa hango vakasin ti hôök hey Yuda lavangg Hiblu laam vu sa nambe, ‘Saul, nambe vaati sen goo monawiing nindanjeen vu saa-jo? Onawiing nambêênja lemu menahôôvu hong e.’ ¹⁵Tombe saalingin nambe, ‘Omaaho Bop, olati?’ Le Omaaho Bop nêêl nambe, ‘Sa Yesu sen goo monawiing nindanjeen vu saa-jo. ¹⁶Om okandi baale kasiy, in sa taato sa vu hong in dangga nambe

^γ 26:5 Pil 3:5-6 ^z 26:6 Sin 23:6; 28:20 ^a 26:9 Sin 8:3

saaholin hong in nambe onaatu sate kul vaha, be onaanêêl va sen gahe sa lung laa-jo, osin va sen soo le taato sa vu hong vu taamusin-ato. ¹⁷Om sa navu aambiing-ambe gana vu hil vaalu sen sil-ame Yudaa-to, de sale aanôôh hong vêêl in hil Yuda osin hil vaalu namand in nambe me-lanyiis hong-ambe ganggimb e. ¹⁸^bOm gana gambiing-ambe sil amend naatum in nambe sil galuuh damind vu taaku mekanu, de langgilin sil lanom melangaah, osin sil gavuuuh Saalang-ate niwêêk na de lanom vu Anutu, be mem lambiing gaving sa, ond mem sale kawiiy silate nipaya na, de sil mando gaving hil pin sen Anutu yoo holin sil lung laa-to.’

¹⁹“O omaaho lulemak Aglipa, saahe va baandonii-ju om same kalêêh lava le, malis. ²⁰^cSaanêêl tanasin vu hil Damaskas munggin, tonde mem saanêêl vu hil Yelusalem, de saanêêl lohvu taaku Yudia pin osin vu hil vaalu sen sil-ame Yudaa-to having. Saanêêl vu sil nambe, ‘Ham galuuh damim vu hamate nipaya, de ham anggilin ham alompaya na vu Anutu, de ham ambiing va nivasa in yanjak ni naambe ham ahilin ham vasa.’ ²¹^dYik saawiing kul nambêênjo ondeey hil Yuda lalôôh sa hôôk Anutu-te dumb bop, be lawiingin nambe lanyiiis sa be saanggimb, ²²^ele ma de Anutu hôôvu sa be tok laam gêên-anjo, om sen sa naalêê-jo de sa naanêêl vakasin vu hil mali-malis pin osin vu himbop-aso having. De vakasin sen sa naanêêl-ato ond yik vakasin timu sen bôôy Anutu-te hil vaalu laving Mose be lanêêl nambe le nôôn jak-ato, ²³^fnambe, ‘Omaaho sen Anutu yoo holin yi vulôôt in nambe dôôvu yiy-ato, ond le gako nivaane be kandi jak naah vu hil yimbin-ate naamunggin vu hil pin, in naanêêl vakasin melangaah-ate vu hil Yuda osin hil vaalu sen sil-ame Yudaa-to gaving.’ ”

Pol navêêl Aglipa ka lak in nambe biing gaving

²⁴Pol monanêêl nambêênju tombe Pestas nêêl bopaata lôôt nambe, “Pol-e, vati wiing hong a? Galuus dumb lôôt om wiing-ambe galumkook nawiing paya.” ²⁵Le Pol nêêl nambe, “Himbop Pestas, vati me-wiing sa le, malis. Sa lukook neep om sa naanêêl keen, ²⁶^gde omaaho lulemak Aglipa lak va pin-anju ni ondeey saanêêl langaah vu yi de same aayêênin e, in sa lak ni nambe va pin-anju ond ti me-hôôpis in yi le, malis, in vaa-ju me-hôôk taaku vunin e. ²⁷De omaaho lulemak Aglipa, gawii-having Anutu-te vakasin sen hil lanêêl langaah bôôy-ato? Sa lak ni lung la nambe gawii-having-ato.” ²⁸Tombe sim Aglipa nêêl vu Pol nambe, “Onaanêêl daka gaving ond sa navu aanggilin sa longgpaya be sa naatu Kalisi-te omaaho ti.” ²⁹Tombe Pol nêêl nambe, “Daka gaving me taamusin ond yik nivasa having, de sa naalohak vu Anutu in hong having hil pin sen ham nango sate vakasin gêên-anjo nambe ham naambe sa, lemu hees aniwêêk sen landuuh sa lak-anjo me-naanduuh ham e.”

^b 26:18 Ais 35:5; 42:7,16; Ep 2:2; Kol 1:13; Sin 20:32 ^c 26:20 Mat 3:8

^d 26:21 Sin 21:30-31 ^e 26:22 Luk 24:44-47 ^f 26:23 1Ko 15:20 ^g 26:26 Jon 18:20

³⁰Pol nêêl nambêênju tombe omaaho lulemak Aglipa having yêêv bop-ambe Benaisi, osin hil pin sen

dando having-ato, ond sil pin kandi daale, ³¹^htombe sil lato lala voon le mem yoo lanêêl vu sil nambe, “Omaahôd-ju me-wiing nipaya in nambe jimb me duus kalaambus e.” ³²ⁱTonde Aglipa nêêl vu Pestas nambe, “Mu nêêl nambe Sisa gango yite vakasin ondeey, nganjo nama ond lohvu nambe yaambiing-ambe gato na.”

Pol lak sip-ambe la in na Lom

27 ¹^jLanêêl lung la nambe hey o Pol-aso be hey anjak sip-ambe hey ana Itaali sen Lom neep-ato, om lavu Pol having kalaambus vaalu lalukala yêêv ti haale nambe Julias nama in nambe ganggin sil, yêêv-anju nanggin Sisa-te ngaamong vaha-so doo-namaavaalu. ²^kTombe hey alak hil Adlamitiam-ate sip ti, in sip-anju navu na hil Esia-te taaku nalu ti ti, om hey ala, tombe hil Makedonia ti Alistakas vu taaku Tesalonika la having hey. ³^lDe samiinaanôn atombe hey aatok ala Saidon, de Julias wiing nivasa vu Pol om liinggis-ambe Pol la yi yite hil-ambe ya vanôn ayuuh ame vu sil.

⁴Tonde hey kandi vu Saidon-ambe hey ala, le vavi luus hey om sip loh neep Saiplas vaalu in nambe nalu lavuun-anju gilin vavi, ⁵tombe hey valu-aaloh ngaaho vu Silisia yuuh Pampilia, be hey aatok ala Maila sen neep Lisia-te taakuu-to. ⁶Tombe vu taakuu-ju hil ngaamong vaha-sote yêêv-anjôto yi de hil Aleksandlia-te sip ti navu na Itaali, om nêêl-ambe hey alakala sip-anju. ⁷Tombe hey ala lemu sip oo monala melaas lohvu busin ngeeyaata, tombe lawiing kul bopaata lôôt, le mem hey ala ngaaho vu taaku Naidas, le vavi bopaata lôôt om hey-ame aalohvu in nambe ana nivalok e, om hey valu-aaloh Klit vaalu ngaaho vu taaku Salmoni neep-ato in nambe nalu lavuun-anju gilin vavi. ⁸Tombe lawiing kul bopaata lôôt in vavi luus hey-ambe hey ala monaahulis taaku Klit nanyendanga, be hey aatok ala taaku ti danêêl haale nambe Nanyelasu Nivasa. Taakuu-ju neep ngaaho vu bayêên bop Lasia.

⁹Busin ngeeyaata lung la, de busin bop sen Yuda dalakin sil in vanôn-ande me-dayaa-to ond lung la, tonde vavi bopaata wiing-ambe lôôy anipaya lak om me-lohvu nambe hey ana nivasa le, om Pol nêêl vakasin vu

sil nambe, ¹⁰^m“Ham hil-e, sa lak ni nambe nimeen bopaata le naatovu yiyi, de va ngeeyaata le na menama gaving. Me-kupak osin sip amu na menama le, malis, yiyi omaahonôn having, om yame ana le, yiyi mando.” ¹¹Lemu hil ngaamong vaha-sote yêêv wii-having omaaho sen nako sip-ato osin sip mangganaan lavand, de me-wii-having Pol lava le,

^h 26:31 Sin 23:29; 25:25 ⁱ 26:32 Sin 25:11 ^j 27:1 Sin 25:12 ^k 27:2 Sin 19:29

^l 27:3 Sin 24:23 ^m 27:10 Sin 27:22

12 de lôôy nanyendangga nanyelasuu-ju me-nivasa in nambe sip mando kwaav yumbeyuuh hôôk sen vavi bopaata-te busin-anjuuto le, om hil ngeeyaata lanêêl nambe hey gavuuu taakuu-ju de hey ana, in kand vu nambe mak hey e naatok ana hil Klit-ate taaku

ango vu Piniks in nanyelasu nivasa, om hey aandôôpis-ambe mem hey mando nivasa in vavi jamba.

Vavi wiing-ambe lôôy anipaya lak lôôt

13 Vavi noow valup atombe kand vu nambe hey e aanggulis lôôy nanyendangga be hey ana nivasa nohvu sen lanêêl-ato, om sil laandiiy angka lak-ande hey oo monaahulis hil Klit-ate lôôy nanyendangga. 14 Yik hey ala daka tonde sim vavi jamba ti laam vu lonak, 15 tombe vavi luus sip lôôt, om sil-ame lalohvu nambe langgilin sip na nivalok vu vavi le, tombe sil lawiing e ma, om lôôy oo monako hey amu. 16 Tombe hey valu-aaloh ngaaho vu nalu lavuun daka sen hilin vavii-to danêêl nambe Koda, om hey aawiing kul bopaata lôôt, be hey laandiiy dinggi laam ngaaho, 17 le mem sil laandiiy lakalaam sip baandoni, tonde sil laanggin sip lak hees aniwêêk tatin in nambe

sip-ame gapok e. De sil layêênin nambe vavi le juus hey-ambe hey ana andahôôk laahel anipaya ti ngaaho vu Aplika, om sil lalôôh sel vêêl-ande lôôy oo monako hey amu.

18 Vavi osin lôôy oo mopakepin hey lôôt, om samiinaanôôn atombe sil laate kupak heey lukala lôôy, 19 de heendiyy atombe sil oo laate va yuuh ame sen nando lak sip anivalok-ato lukala lôôy having. 20 Tonde busin ngeeyaata ond hey-ame aahe taaku mekaalus osin matam daka le, yik vavi nipaya yoo mopakepin hey lôôt, tombe mem hey akangg vu nambe hey navu ana mengg nama, de hey-ame le mando nivasa le. 21 De busin ngeeyaata me-laya vanôôn e, tombe Pol la naale hôôk sil lavuun-ambe nêêl vu sil nambe, “Ham hil-e, nambe bôôy-ato ham gango sa lavangg-ambe yiyi mando Klit, ond yame le naatovu nimeen bopaata naambêênjo le, de va yuuh ame me-na menama le. 22” Om gêên sa naanêêl vu ham naambe ham alompayo niwêêk jak in ham ti me-le na menama le, yik sip timu yoo le na menama. 23 In Anutu sen yite omaaho ti saa-jo, de sa naalohak vu yii-to, ond yite angela ti hatu vu sa gêên busin-ambe nêêl nambe, 24 “Pol, game ganjêênin e, gale gana baale dôôk Sisa me. De gangge hil sen ham nando lak sip-anjo, ond Anutu ka pasiv om le biing-ambe ham pin e mando metumin.’ 25 Om ham hil-e, ham alompayo niwêêk jak in saawii-having Anutu nambe vaa-ju le nôôn jak nohvu sen nêêl vu saa-jo, 26 om yale ana andahôôk nalu lavuun ti le.”

27 Hey oo monaayêês lôôy Edlia be la busin nomaayuuh-ambe laam yumbeyuuh, de hôôk busin lavuun atombe kul vaha-so sen dako sip-ato,

° 27:22 Sin 27:10,31 ° 27:24 Sin 23:11 P 27:26 Sin 28:1

ond sil sahi nambe sip valup ngaaho lak vu lonak, ²⁸om sil talu tatuuh ak hees-ande laate lukala lôôy, de sil taahu vu laahel kambini be laam, be layi le waak lohvu ³⁷mita. Tonde hey valu-ala daka, tombe yik sil laate tatuuh-ambe sil taahu laah, le lohvu ²⁷mita. ²⁹Tombe sil layêênin nambe sip e jakana tatuuh, om lawiing angka yumbeyuuh vu sip ahus lukala lôôy, de sil laanjiihin taaku me nambe langaah jak pavis. ³⁰Tonde hil kul vaha-so sen dako sip-ato ond davu salo mop in nambe gavuuu sip-ande lana, om sil taaluuhin dinggi luus de sil tatuhin nambe davu baate angka sen sip naluu-to dukana lôôy, ³¹lemu Pol nêêl vu ngaamong vaha-sote yêêv osin hil ngaamong vaha-so nambe, “Naambe hil-anju me-mando jak sip e, ond ham e ana mem nama.” ³²Om ngaamong vaha-so katôôv hees in dinggi de lôôy hako la.

³³Tonde heendiisin atombe Pol kataangg sil pin nambe lanja vanôôn, om Pol nêêl nambe, “Busin nomaayuuh-ambe laam yumbeyuuh lung la ond ham naham oo monalak-ambe ham nando malis amu, ham ame aha vanôôn daka le, ³⁴om sa kataangg ham naambe ham angga vanôôn daka be ham sakem dukanaah, in ham ti me-le na menama le.” ³⁵Nêêl nambêênju tonde hako balet-ambe naale hôôk sil amend, le mem lohak osin pêêlis la vu Anutu tonde kalêêh-ambe ya, ³⁶tombe hil pin alondpayo ahelavis ak-ambe laya vanôôn having. ³⁷De hey pin sen hey nando lak sip-anjôôto hey ngeeyaata lohvu ²⁷⁶. ³⁸Sil laya vanôôn-ambe sakend lukalaah, tonde laate vanôôn wit lukala lôôy in nambe sip ahelavis jak.

Sip wiing paya

³⁹Langaah ak atombe sil layi taaku, le me-lalak taakuu-ju ni le, lemu layi lôôy nanyendangga nanyelasu ti ond lonak anivasa, om sil lanêêl nambe sil sahi naambe lohvu ond mem sil gako sip guli-na lonak-anju. ⁴⁰Tonde mem

sil kavaayin hees in angka pin de lukala lôôy, tonde sil kavaayin hees in haah yuuh sen dahilin sip nalu lak-ato in nambe biing kul naah, de sil lasi sel ti lakalaah in nambe vavi dôôk. Tonde hey ala in nambe ana lonak, ⁴¹le ma de sip lakala laahel ti nando hôôk lôôy lavuun-ato be hahôôk hôôk, de sip nalu niwêêk ak tonde lôôy yiis sip ahus lôôt-ambe hapok. ⁴²Tombe ngaamong vaha-so kand vu nambe lanyiis kalaambus-aso be lanjimb, in sil e lanjêês lôôy-ambe lanjak ana lonak de dapak-ambe lana, ⁴³lemu ngaamong vaha-sote yêêv wiingin nambe Pol mando metumin om nêêlin sil, de nêêl nambe hil vaalu sen dayêês bel-ato ond sil pasong landukana lôôy naamunggin-ambe lanjak ana lonak, ⁴⁴tonde hil vaalu ond sil danjip ak haah paak osin sip anye paak-ambe lana. Om hey aawiing nambêênju tombe hey pin oo alakala lonak.

¶ 27:31 Sin 27:22 ¶ 27:34 Mat 10:30 ¶ 27:35 Mat 15:36; 1Ti 4:4-5 ¶ 27:44 Sin 27:22-25

Pol nando Molta

28 ¹Tombe hey alakala lonak lung la, le mem hey hango lanêêl nalu lavuun-anju haale nambe Molta. ²“Tombe hil taakuu-ju sil samu hey nivasa lôôt, de luk osin vavi vaaku hey om sil lavaav kin-ande lanêêl-ambe hey pin ala vanyuuh kin. ³Tonde Pol supin kin kaalok bun ti be vaav, tombe kin hapang nyêêy ti om loolak-ambe hato, tombe ya Pol nama. ⁴Tombe hil taakuu-ju layi de nyêêy siyak hôôk Pol nama, om sil oo lanêêl vu sil nambe, “Omaahôô-ju mak yiis omaahonôôn ti yimb, om vu lôôy-ambe lakalaam atombe tovu nyevahaan-ambe navu jimb.” ⁵“Tonde Pol tandinin nama tombe nyêêy la yêês kin, lemu Pol-ame hango nivaane le. ⁶“Tombe sil mondanggin in nambe navu buuk me dupake be jimb meta, om mondanggin lôôt, le ma de vati me-tovu Pol e, om lanêêl vakasin ango lak nambe, “Yi anutu ti.”

⁷De yêêv bop vu nalu lavuun-anju haale nambe Pablias, yite ngaanggis neep ngaaho vu taakuu-ju, ond hako hey ala baan-ambe hanggin hey nivasa lôôt lohvu busin yaal. ⁸Tonde sim Pablias mangganaan anivaane be ahe nalup osin nihees-ambe neep, om Pol la vu be lohak, de hambe nama lak yi tombe nivasa hôôk. ⁹Pol wiing nambêênju om hil anilakin vaalu vu taaku nalu lavuun-anju lalaam-ambe Pol wiing sil anind vasa hôôk having. ¹⁰Tombe hil-anju samu hey nivasa lôôt, de busin sen hey ala lak-ato, ond lako vanôôn ayuuh ame laam-ambe latung lakala sip vu hey.

Pol tok la Lom

¹¹Hey nandôô-ju kwaav yaal lung la, tonde mem hey alak hil Aleksandlia-te sip in valu-nando nalu lavuun-anju hôôk busin sen vavi bop-ambe lôôy wiing payaa-to, ond hako hey-ambe hey ala, de sip-anju ond anutu Sus noow ayuuh kanund daale lak sip nalu. ¹²Tombe hey aatok ala taaku Sailakus, be hey nandôô-ju busin yaal. ¹³Tonde hey vuu-ju be hey vanju hôôk-ambe hey aatok ala Lisiam, de samiinaanôôn atombe vavi noow valup om hako hey-ambe hey ala lôôt, de heendiyy atombe hey aatok ala Putiolai. ¹⁴Tombe vu taakuu-ju hey aatovu Omaaho Bop-ate hil vaalu, om lanêêl-ambe hey nando having sil busin namaavaalu be vindak yuuh, tonde mem hey kandi vuu-ju be hey ala Lom. ¹⁵Tonde Omaaho Bop-ate hil vu Lom lango banye nambe hey valup, tombe sil lato latovu hey vu taaku Apias osin taaku sen danêêl nambe Tatuva Yaal-ato. Pol yi sil atombe pêêlis vu Anutu de lopayo niwêêk ak. ¹⁶^xHey aatok alaam Lom atombe laliinggis om Pol oo nando lak bayêên ti be ngaamong vaha ti yoo monanggin yi vuu-ju.

^u 28:2 2Ko 11:27 ^v 28:5 Mak 16:18 ^w 28:6 Sin 14:11 ^x 28:16 Sin 24:23

Pol nêêl banye nivasa vu Lom

¹⁷Pol nando busin yaal lung la le mem teey hil Yuda sen dando Lom-anjuuto silate himbop-aso be lasupin lalaam, le mem nêêl vu sil nambe, “Halingg-aso, same aawiing vati in nambe daanggôôl yate hil osin yate himbop-aso bôôy silate gambum e, lemu hil landuuh sa vu Yelusalem, tombe lavu sa lukala hil Lom namand. ¹⁸Tombe hil Lom lango sate vakasin lôôt, le me-latokak nipaya ti lohvu nambe lanyiis sa be saanggimbe e, om lawiingin nambe lambiing-ambe sana mu, ¹⁹lemu hil Yuda nind baya om sanêêngg mopaatôôv ti me-neep e, ondeey sa kataangg Sisa nambe gango sate vakasin gaving, le same aawiingin nambe aambiing vakasin vu sate hil e. ²⁰Yik danggakook-anja sen saateey ham in nambe saangge ham-ambe sa bakaas gaving ham, de saawii-having va sen yiyi Islel pin nanggin-ato, yik manyinja sen landuuh sa lak hees aniwêêk-anjo.” ²¹Tombe lanêêl vu nambe, “Hil Yudia me-kaavu kaapiya be lanêêl ombanyem vu hey e, de Yuda ti me-laam-ambe hatulin vakasin osin nêêl vakasin anipaya ti lak hong e, ²²lemu hey aawiingin onaanêêl gate vakasin-ambe hey gango le, in hey alak ni nambe hil vu taaku pin danêêl vakasin anipaya lak ham tanasin vaha ti sen ham navu sapa Yesuu-to.”

²³Tombe sil latung busin ti le mem hôôk busin tii-ju hil ngeeyaata lalaam vu Pol vu bayêên sen nando lak-ato, om Pol oo motatekin tanasin danggakook lak Anutu nanggin yite hil-ato hôôk samiinaanôôn-ambe la busin hôôk having vu sil, de nanêêl Mose-te tanasin osin Anutu-te vakasin sen yite hil vaalu lanêêl langaah bôôy-ato vu sil in nambe lambiing gaving Yesu. ²⁴Tombe hil vaalu lawii-having yite vakasin de hil vaalu me-lawii-having e, ²⁵om sil-ame londpayo lavuh ti le, tombe lawiingin nambe lana le Pol nêêl vu sil nambe, “Vavi Vaambuung nêêl vu Anutu-te omaaho Yesaia be nêêl vu yate himbop-aso bôôy, keen lôôt nambe,

²⁶“Gana vu hil-anju be onaanêêl vu sil naambe, “Ham e gango lôôt lemu ham-ame le naatokak dangga le, de ham e angge lôôt le ham-ame le anjak ni le.”

²⁷In hil-anju londpayo niwêêk ak osin nanyend doos ak, de sil amend yip in nind baya nambe me-lanji va lak mend e, de me-gango vakasin e, osin kand-ame bu vakasin danggakook e, de sil-ame langgilin londpayo nom vu sa in nambe saambiing-ambe nind vasa jak e.’

^y 28:17 Sin 25:8 ^z 28:18 Sin 26:31 ^a 28:19 Sin 25:11 ^b 28:20 Sin 24:15; 26:6-7

^c 28:22 Sin 24:14 ^d 28:26-27 Ais 6:9-10; Mat 13:14-15

^{28 e}“Om sa naanêêl langaah vu ham naambe Anutu-te samu samu la vu hil vaalu sen sil-ame Yudaa-to lung la, in sil e gango vakasin.”

²⁹ [Pol nêêl vakasin-anju lung la, tonde hil Yuda lalaah atombe yoo lanêêl sil bopaata lôôt.]

^{30 f}Tonde Pol oo vaanggo bayêên ti be nando hôôk lohvu ta yuuh, tombe yite vaatêêvak sen dalaam vu yii-to ond yoo nako sil pin lak nivasa, ^{31 g}de yoo monanêêl vakasin lak Anutu nanggîn yite hil-ato, osin navu taahu Omaaho Bop Yesu Kalisi-te vakasin vu hil, ond yoo nêêl neep langaah lôôt de omaaho ti me-nêêlin e.

^e 28:28 Saam 67:2; Luk 3:6; Sin 13:46; 18:6 ^f 28:30 Sin 28:16 ^g 28:31 Sin 28:23